

O Le Liahona

**O Auala e Fa e
Lagonaina ai le Olioli
i le Aoaoina, i. 10**

Pule i le Ola: O Se Tagi
Faananau, ma le Leleo
mo se Fesoasoani, i. 18

Lesona o Talafaasolopito
o Aiga mai ia Liae, i. 26

O Le Vaifofo i le Tuinanau, i. 30





"Ma o lenei, lōu atalii e, Sepulona, ou te manao ia e manatua, afai e te tuu atu lou faalago/lago i le Atua seiā faapea ona tele, o le a ia laveaīna oe i fafo mai ou tofotofoga, ma ou faalavelave, ma ou puapuaga, ma o le a sii oe i lugia i le aso gataaga."

Alema 38:5

Liahona, Oketopa 2016

O SAVALI

4 Savali a le Au Peresitene Sili: O Faamanuiaga o le Usiusitai

Saunia e Peresitene
Thomas S. Monson

7 Savali a Faiaoga Asiasi: O Le Aiga ua Faauuina e le Atua


TALA FAAALIA

16 O Fanau Iti ma le Faamanatuga

Saunia e Aaron L. West
I le taumamafa ai i le faamanatuga, e mafai ai e fanau iti ona saunia e osi ni feagaiga.

18 Malamalama i le Pule i le Ola: Faailoilo o Lapataiga ma Puipuiga

Saunia e Kenichi Shimokawa
Aoao pe faapefeca ona fesoasoani e puipuia le pule i le ola ma fesoasoani i tagata o le aiga o e ua sao mai le pule i le ola.



4

24 O Upu Faaperofeta i se Nofoga sa Lei Mafaufauna

Saunia e Colette Lindahl

O nisi o mekasini o le Liahona sa tuua i se fale mautotogi na suia ai le olaga o se tasi o tagata lea na taitai atu ai o ia i le talalelei.

26 Talafaasolopito o Aiga: Filemu, Puipuiga, ma Folafolaga

Saunia e Elder Bradley D. Foster
A tatou aoina faamaumauga o talafaasolopito o o tatou aiga ma ave ia igoa o o tatou tuaa i le malumalu, o le a faamanuitaina i tatou ma a tatou fanau.

30 Alofa po o le Tuinanau

Saunia e Joshua J. Perkey
O le a le vaifofo o le tuinanau, le manao ia maua mea i se uiga e feteenai ma le finagalo o le Atua?

36 Auauna Atu i Talaatu o Ioritana

Saunia e R. Val Johnson
ma Rachel Coleman

Sa aafia le faitau afe o olaga i se ulugalii matutua faamisiona o galuega alofa e ala i le auauna atu i nofoaga sa manaomia ai e le Alii i laua.

MATAGALUEGA

8 Auaunaga i le Ekalesia: O A'u Aso Sa e Faatumulia i Auaunaga

Saunia e Jeffery A. Hogge

9 Manatunatuga: Tausamaaga Mulimuli e Maleva

Saunia e Cheryl Harward Wilcox

10 Aoao Atu i le Ala a le Faaola: O Le Olioli i le Aoaoina

Saunia e Tad R. Callister

40 O Leo o Le Au Paia o Aso e Gata Ai

44 O o Tatou Aiga, O o Tatou Auaiga: Anapogi ma Tatalo mo Ema

Saunia e Cecilia Norrung

80 Seia Tatou Toe Feiloai: O Le Atamai Faalelagi o le Ekalesia a le Alii

Saunia e Peresitene
Gordon B. Hinckley



I LE FAAVAA

Luma: Ata na pueina e Leslie Nilsson.
I totolu o le faavaa pito i luma: Ata na pueina e jamievanbuskirk/GettyImages. I totolu o le faavaa pito i tua: Ata o le laau na pueina e Ryan McVay ma Christopher Elwell/Thinkstock.



46

46 Tutu Atu o ni Tagata Moni o le Meleniuma

Saunia e Peresitene Russell M. Nelson
O fautuaga e fa e uiga i le auala e tu atu ai o se tagata moni o le meleniuma.



Vaai pe mafai ona e mauaina le Liahona o loo natia i le lomiga lenei. Faaiteite: E i ai ni laau aina suamalie a ou tuaoi?



54 O Le Vavega o le Vevela Feoloolo

Saunia e David A. Edwards
E mafai faapeflea e le onosai ona fesoasoani ia te oe i le faiga o le sanuisi sisi e tao ma lelei atoa ma avea atili ai foi e faapei o Iesu Keriso?

57 Pepa Lautele o Savali: Vaa Faalemafaufau ia te Oe Lava la o Toe Atiae

58 Mana e Tumau ai

Saunia e Jessica Turner e pei ona faamatala ia Lynne Crandall
O le faia o mea faatauvaa e faamalosia ai lo'u faatuatua na fesoasoani e faamalolo ai a'u ma agai ai i luma i le mavae ai o se faalavelave tau taavale.

61 O Tali mai Taitai o le Ekalesia: O Le Auala e Faia ai Keriso ma Totonugalemu o Tatou Olaga


Saunia e Elder D. Todd Christofferson

62 O se fua mo le aoaoina

Saunia e Rosemary Thackeray
Mulimuli i laasaga nei e fa e fai ai ia sasala le manogi o le afioga a le Atua i lou agaga.

64 Fesili ma Tali

Ua tau mai e nisi tagata ia te au ou te manaomia le i ai o ni uo e le tutusa o matou tulaga faatonuina ina ia mafai ona faamalosia ai o'u [tulaga faatonuina]. Pe moni lenei mea?



76

66 Ua O e Fagogota

Saunia e Julia Ventura

Sa popole Hayden o le a faasesegi ese uma e lona uso laitiiti ia i'a. Ae sa sili atu lona popole ina ua leiloa lona uso laitiiti.

68 O Tali mai se Apostolo:

E mafai faapeflea ona ou fesoasoani e faia lo'u fale o se nofoaga filemu?

Saunia e Elder Gary E. Stevenson

69 O La Tatou Itulau

70 O Tamaiti E Tutu Maualuluga:

O Se Tala e uiga ia Tala

Saunia e Jill Hacking

O Tala ma lona aiga sa na o i latou na auai i le Ekalesia i Turkmenistan! Tagai i le auala na tu maualuga ai o ia.

72 O Lesona mai ia Tina

Saunia e Elder Jairo Mazzagardi

Sa aoao Elder Mazzagardi e uiga i le faamaoni mai lona tina. O a ni mataupu faavae ua e aoaoina mai ou matua?

74 Toa o le Tusi a Mamona:

O Toa Tamaitai i totolu o le Tusi a Mamona

76 Tala o le Tusi a Mamona:

Faimalaga atu i le Nuu Folafolaina

79 Itulau e Valivali: E Faafafia A'u e Musika

O Le Lomiga Faamaonia Faa-Samoa a le Ekalesia
a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Apostolo e Toasefululu:

Russell M. Nelson, Dallin H. Oaks, M. Russell Ballard,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen,
Ronald A. Rasband, Gary E. Stevenson, Dale G. Renlund

Faatonu: Joseph W. Sitati

Assistant Editors: James B. Martino, Carol F. McConkie

Fautua: Brian K. Ashton, Randall K. Bennett, Craig A.
Cardon, Cheryl A. Esplin, Christoffel Golden, Douglas D.
Holmes, Larry R. Lawrence, Carole M. Stephens

Pule Faatonusili: Peter F. Evans

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinihi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Lagolago o Lomiga: Megan Seitz

Au Tusitusi ma Faatonutonu: Brittany Beattie, David Dickson, David A. Edwards, Matthew D. Flilton, Lori Fuller, Garrett H. Garff, LaRene Porter Gaunt, Jill Hacking, Charlotte Larcabal, Michael R. Morris, Eric B. Murdock, Sally Johnson Odekirk, Joshua J. Perkey, Jan Pinborough, Richard M. Romney, Mindy Anne Selu, Paul VanDenBerghe, Marissa Widdison

Pule Faatonusili Tusiati: J. Scott Knudsen

Faatonusili Tusiati: Tadd R. Peterson

Au Mamanu: Jeanette Andrews, Fay P. Andrus, C. Kimball Bott, Thomas Child, David Green, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Rachel Smith, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Glen Adair, Connie Bowthorpe Bridge, Julie Burdett, Bryan W. Gygi, Ginny J. Nilson, Gayle Tate Rafferty, Derek Richardson

Tailolomi: Jeff L. Martin

Faatonusili Lolomiga: Steven T. Lewis

Faatonusili o le Tuafutufaga: Stephen R. Christiansen

Mo le okaina o mekasini, alu i le store.lids.org po o le
Faletutuonu i Pesega. Telefoni 64127. Totogi o le
Mekasini: \$0.55 (Samoa) ī le kopī. Totogi mo le Tausaga
Atoa \$6.60 (Samoa).

Auina atu tusitusiga ma faafesi i lugu o le

initoneti i le liahona.lids.org; pe meli mai i le Liahona,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa"
po o se "faatonuā") ē lomia i le faa-Alepania, Aminia
(Sasae), Pisilama, Palekeria, Kemupotia, Sepuanio, Saina,
Kalaotia, Siekisolvakia, Tenimaka, Take, Igilisi, Esitonita,
Fit, Finelani, Farani, Siamani, Eleni, Hanikeri, Initu, Iselani,
Initoniesia, Italia, Japani, Kiripati, Korea, Latvia, Litunia,
Malakasa, Māselā, Monokolia, Nouei, Polani, Potukale,
Romania, Rusia, Samoa, Saina (ua faafaoigofieina), Silovenia,
Sipaniolu, Suetena, Swahili, Tagaloka, Tahiti, Tai, Toga,
lukureini, Urutu, ma Viatename. (E esese lava gagana.)

© 2016 Puletaofia e le Intellectual Reserve, Inc. Ua taofia
aia tatau ura. Lomia i le lunaitē Setete o Amerika.

E mafai ona kopī tala ma ata o le Liahona mo le toe
faaogaina i lotu po o le aiga ae ia le faia ai ni pisinisi. E le
tatau ona kopī nī talā po o ni ata pe afai o faasa mai i le
laiona o loa tāua ī le a e ona lea faatufugaga. Auina atu fusili
e uiga i le puletaofia e le Intellectual Property Office, 50 East
North Temple Street, Salt Lake City, UT 84150, USA; i-meli:
cor-intellectualproperty@ldschurch.org.

For Readers in the United States and Canada:

October 2016 Vol. 40 No. 10. O LE LIAHONA (USPS 311)
Samoa (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address *must* be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Post
Information Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga o loo aofia ai tusiga ma gaoioiga e mafai ona faaaoga mo afiafi faaleaiga.
O ni faataitaiga nei se lua.



"O Fanau Iti ma le Faamanatuga," itulau 16: A mavae ona fatauina o ni matua
le tusiga, e mafai ona oulu talanoaina ni
aulala e aoao atu ai la oulu fanau e uiga i
le taua o le faamanatuga ma feagaiga o le
a latou osia i se aso i le papatisoga. E mafai
ona oulu faaaogaina tatalo o le faamanatuga
(o loo maua i le Mataupu Faavae ma
Feagaiga 20:77, 79) e aoao atu ai e uiga i
folafolaga tatou te faia i le papatisoga ma
le auala e aai ai ma feinu i le faamanatuga
i Aso Sa taitasi, e faatagaina ai i tatou e toe
faafou na folafolaga. E mafai foi ona oulu
maua nisi manatu e fesoasoani ai i a oulu
fanau iti ia taulai atu ai i le Faaola i le taimi

o le faamanatuga, e pei o le faia o ni tusi
ata faigofie ua i ai ni ata o le Faaola.

"O Se Fua Faatau o le Aoaoina,"

itulau 62: Afai e i ai sa oulu fanau matutua
e suesueina ia tusitusiga paia e i latou lava,
mafaufau e fatau faatasi ma i latou lenei
tusiga ma valaaulia i latou e faataitai ia
manatu mai le tusiga. E mafai ona oulu tuu
atu i tagata taitasi o le aiga e fai se apitala-
aga mo suesuega a le tagata lava ia ma faia
ni sini ia tusitusi soo i totonus. E mafai ona
ofofua atu tagata o le aiga e faasoa mai ni
manatu ma ni uunaiga mai i a latou apitala-
aga i ni afiafi faaleaiga i le lumana.

FAAOPOOPOGA O LOO MAUA I LE INITONETI

O loo maua le Liahona ma isi punaoa a le Ekalesia i le tele o gagana i le languages.lds.org.
Asiasi i le [facebook.com/liahona.magazine](https://www.facebook.com/liahona.magazine) (e maua i le gagana Peretania, Potukale, ma
le Sipaniolo) e sue ai savali musuia, manatu mo afiafi faaleaiga, ma anomea e mafai ona
e faasoa atu i au uo ma aiga.

AUTU I LE LOMIGA LENEI

O numera e faasino i le itulau muamua o le tusiga.

Agaga Paia, 70

Aiga, 7, 26, 44, 66, 68, 70

Alofa, 30, 41

Alofa mutimutivale, 40

Anapogi, 44

Aoao atu, 16, 72

Aso Sapati, 8, 42

Auauna atu, 41, 58

Auaunaga agaalofa, 36

Faaaliga faaletagata lava ia, 46

Faamanatuga, 9, 16

Faamaoni, 72

Faamoemoe, 58

Faatuatua, 46, 58, 74, 76

Filemu, 58, 68

Galuega faafafeautalai
24, 36

Iesu Keriso, 4, 61, 76

Lototele, 74

Malumalu, 69

Molimau, 74

Mulimuli i le perofeta, 46

Musika, 79

Natura paia, 46

Onosai, 54

Perofeta, 46, 80

Poloaiga, 4

Pule i le Ola, 18

Sefuluai, 72

Suesue i tusitusiga paia,
43, 62

Talafaasolopito o aiga,
26, 42

Tamaiti, 16, 42

Tatalo, 44, 66

Tofotofoga, 18, 44, 58

Tuinanau, 30

Tulaga faatonuina, 64

Tusi a Mamona, 26, 43,
74, 76

Uo, 64

Usiusitai, 4, 30, 46

Valaauga, 8

Vavega, 44



Saunia e
Peresitene
Thomas S.
Monson

O FAAMANUIAGA OLE USIUSITAI

“O le lesona aupito sili e mafai ona tatou aoaoina i le olaga faaletino,” sa aoao mai ai Peresitene Thomas S. Monson, “e faapea a fetalai mai le Atua ma tatou usiusitai i ai, o le a tatou sa’o pea i taimi uma.”¹

O le a faamanuiaina foi i tatou. E pei ona saunoa mai Peresitene Monson i se konafesi aoao talu ai nei: “A tatou tausia poloaiga, o le a fiafia atili o tatou olaga, sili atu ona faamalieina, ma itiiti le faigata. O le a faigofie atu ona onosaia o tatou luitau ma faafitauli, ma o le a tatou mauaina faamanuiaga folafolaina [a le Atua].”²

I fuaitau nei mai aoaoga a Peresitene Monson i le avea ai ma Peresitene o le Ekalesia, ua ia faamanatu mai ai ia i tatou o poloaiga o le taiala sili lea ona mautinoa i le fiafia ma le filemu.

O Taiala mo le Malaga

“E le i aumaia poloaiga a le Atua ina ia faaoso ita ia i tatou pe avea ma ni faafitauli i lo tatou fiafia. Ae e moni le faafeagai. O Le na foaoaina i tatou ma alofa ia i tatou ma le atoatoa, e silafia le auala tatou te manao-mia ona ola ai i olaga ina ia maua le fiafiaga silisili e mafai ona maua. Ua Ia saunia ni taiala mo i tatou ia, afai tatou te mulimuli ai, o le a taitai atua i tatou ma le saogalemu i lenei malaga faaletino e tele ina lamatia. Tatou te manatuaina upu o se viiga masani: ‘Tausi Poloaiga! O i ai le malu; ma le filemu’ [tagai “Tausi Poloaiga,” *Viiga*, nu. 186].”³

Malosi ma le Malamalama

“O le usiusitai o se uiga tupito lea o perofeta; ua latou maua ai le malosi ma le malamalama i le talafaasolopito atoa. E taua mo i tatou le iloaina tatou te agavaa foi i lenei puna o le malosi ma le malamalama. E faigofie ona avanoa ia i tatou taitoatasi i le asō pe a tatou usiusitai i poloaiga a le Atua. . . .


“O le malamalama lea tatou te sailia, o tali o loo tatou mananao ai, ma le malosi ua tatou manaomia i nei aso e faafetaiaia ai luitau o se lalolagi faigata ma fesuisuiai e mafai lava ona fai mā tatou pe a tatou naunau e usiusitai i poloaiga a le Alii.”⁴

Filifili e Usiusitai

“O le uiga masani o o tatou taimi o le talia gofie. E faa-alia e mekasini ma ata televise ia tagata lauiloa o atatifaga, o toa manumanu o malae afeleti—o i latou e moomoo i ai le toatele o tupulaga talavou e faataitai i ai—e le amanaiaina ai tulafono a le Atua ma lē taofiofia ai faiga e tumu i le agasala, e foliga mai e leai se aaifiaga leaga. Aua e te talitonu i ai! E i ai le taimi o le faamasinoga—o se taimi e faapalenai ai tusi. E tofu lava le Cinderella ma lana vaeluapo—a lē o le olaga nei, o le isi. O le a oo mai le Aso Faamasino mo tagata uma. . . . Ou te aioi atu ia te outou e filifili ia usitai.”⁵

Olioli ma le Filemu

“Atonu e foliga atu ia te oe i nisi taimi o i latou i fafo i le lalolagi o loo matua fiafia lava nai lo oe. O nisi o outou



atonu e lagonaina le taofiofia e tulaga faatonuina o le amio lea e ao ia i tatou i totonu o le Ekalesia ona usitaia. Peitai, ou uso e ma tuafafine, ou te tau-tino atu ia te outou, e *leai ma se mea* e mafai ona aumaia le olioli sili atu i o tatou olaga po o le filemu sili atu i o tatou agaga nai lo le Agaga lea e mafai ona afio mai ia i tatou pe a tatou mulimuli i le Faaola ma tausi i poloaiga.”⁶

Savavali Sa’o

“Ou te molimau atu ia te outou, e le mafuatiaina o tatou faamanuiaga folafolaina. E ui ina foufou mai afa, e ui ina to mai uaga i o tatou luga, ae o lo tatou malamalama i le talalelei ma lo tatou alolofa i lo tatou Tama Faalelagi ma lo tatou Faaola, o le a faamafanafanaina ma lagolagoina i tatou ma aumaia le olioli i o tatou

loto pe a tatou savavali sa’o ma tausi poloaiga. O le a leai se mea o lenei lalolagi e mafai ona manumalo ia i tatou.”⁷

Mulimuli i le Faaola

“O ai lenei Tagata o faanoanoaga, ua masani ma le tiga? O ai le Tupu o le mamalu, lenei Alii o au? O Ia o lo tatou Matai. O Ia o lo tatou Faaola. O Ia o le Alo o le Atua. O Ia o le Mataisau o lo tatou Faaolataga. O loo Ia valaau mai, ‘Mulimuli mai ia te au.’ O loo Ia faatonu mai, ‘Ina alu ia, ma ia faapea ona fai.’ O loo Ia augani mai, ‘Tausi au poloaiga.’

“Ia tatou mulimul ia te Ia. Ia tatou faataitai i Lana faataitaiga. Ia tatou usisitai i Lana afioga. I le faia o lea mea, tatou te avatu ai ia te Ia le meaalofa paia o le lotofaafetai.”⁸ ■

FAAMATALAGA

1. “Na Latou Faailogaina le Ala e Mulimuli Ai,” *Liahona*, Oke. 2007, 5.
2. “Tausi i Poloaiga,” *Liahona*, Nov. 2015, 83.
3. “Tausi i Poloaiga,” 83.
4. “O Le Usiusitai e Aumaia ai Faamanuiaga,” *Liahona*, Me 2013, 90, 92.
5. “Talitonu, Usitai, Tumau,” *Liahona*, Me 2012, 129.
6. “Tutu i Nofoaga Paia,” *Liahona*, Nov. 2011, 83.
7. “Ia Outou Lototetele,” *Liahona*, Me 2009, 92.
8. “Mauaina o le Olioli i le Faigamalaga,” *Liahona*, Nov. 2008, 88.

AOAO ATU MAI LENEI SAVALI

Ua aoao mai e Peresitene Monson i tatou e uiga i le tele o faamanuiaga e mafai ona tatou mauaina e ala i le usiusitai, e aofia ai le malosi, malamalama, olioli, ma le filemu. Mafaufau e fesili atu ia i latou e te aoaoina pe o faapefea ona faamanuiaina i latou e ala i le tausiaina

o poloaiga. Atonu e te uunaia i latou ia faaauau pea ona mafaufau i o latou faamanuiaga ma tusi i lalo o latou manatu ma aafiaga i se apitalaaga. Atonu foi e te manao e uunaia i latou e faaali atu le lotofaafetai i le Atua mo o latou faamanuiaga e ala i le faaauau pea ona usiusitai.

O Afi ma Lesona o le Usiusitai

Sa faamatala mai e Peresitene Thomas S. Monson se tasi o taimi na aoaoina ai o ia i le taua o le usiusitai. Ina ua valu ona tausaga, sa asiati atu lona aiga i le latou tamai fale i luga o atumauga. Sa la mananao ma lana uo e faamama se vaega vaoa mo se afi o le tolauapiga. Sa la taumafai e faamama le vao i le veleina, tase'i ma lalafo i le malosi na la mafaia, ae sa pau le mea na la mauaina sa na o ni nai vaovao i o la lima. Sa faamalamalama mai e Peresitene Monson, "Ona ou mafaufau lea i le tali tonu lea na oo mai i lo'u mafaufau e valu tausaga le matua. Sa ou fai atu ia Danny, 'E na o le pau lava le mea ta te manaomiaina o le susunuina o nei vao. E tau lava na ona ta *susunuina* o se li'o i totonu o vao!"

E ui lava na ia iloaina sa lei faatagaina o ia e faaaoga se afitusi, ae sa ia tamoe atu i le tamai fale e aumai, ma sa la

faamumuina ai ma Danny se tamai afi i lena vaega vaoa. Sa la faamoemoe e pe lava le afi ia, ae nai lo lena sa sasao tele ma avea ai ma se afi matautia. Sa la taufetuli atu ma Danny mo se fesoasoani, ma sa lei pine ae faataalise mai le au matutua e tape le afi a o lei oo atu i laau.

Sa faaauau le saunoaga a Peresitene Monson, "Sa ma aoaoina ma Danny ni lesona faigata ae taua i lena aso—o se vaega tupito lava, o le taua o le usiusitai." (Tagai i le "O Le Usiusitai e Aumaia ai Faamanuiaga," *Liahona*, Me 2013, 89–90.)

E pei foi o Peresitene Monson, na e aoaoina ea se lesona o le usiusitai i se auala faigata? O a ni sini e mafai ona e faia ia tausia ai lou lava saogalemu e ala i le usiusitai i le lumanai?

TAMAITI

Filifilia le Mea Tonu

Ole filifilia o le mea tonu e avatua i tatou ia latalata atili i le Tama Faalelagi ma lesu Keriso. E fesoasoani foi ia i tatou ia fiafia ma sogalemu. Li'o auala e mafai ai ona e filifilia le mea tonu.



Faimamago
i le a'oga



Faitau tusitusiga paia



Alu i le lotu



Taalo i taaloga
lelei



Taua'imisa
ma nai ou tei



Auauna
atu i isi

Ia suesue ma le agaga tatalo lenei savali ma saili ia iloa mea e faasoatatu. O le a faapefea ona faateleina e le malamalama i le, "O Le Aiga: O Se Folafolaga i le Lalolagi" lou faatuatua i le Atua ma manuia ai i latou e te vaavaaia e ala i asiasiga a faiaoga asiasi? Mo nisi faamatalaga, ala i le reliefsonline.org.

O Le Aiga ua Faauuina e le Atua

"I upu o le [pese a le Peraimeri], 'The Family Is of God,' . . . ua faamanatu mai ai ia i tatou le aoaoga faavae mama," sa saunoa mai ai Carole M. Stephens, Fesoasoani Muamua i le Au Peresitene Aoao o le Aualofa. "Ua tatou aoao e le gata o le aiga e ou le Atua ae ua avea foi i tatou taitoatasai ma vaega o le aiga o le Atua. . . .

" . . . O le fuafuaga a le Tama mo Lana fanau o se fuafuaga o le alofa. O se fuafuaga e faatasia ai Lana fanau—Lona aiga—faatasi ma Ia."¹

Sa saunoa mai Elder L. Tom Perry (1922–2015) o le Korama a Apostolo e Toasefululua e faapea: "Tatou te talitonu foi o aiga malolosi ua masani ai e le gata o iunite faavae ia o se malo mautu, o se tamaoaiga mautu, ma se aganuu mautu o tulaga faatauaina—ae o i latou foi o iunite faavae o le faavavau ma o le malo ma le faigamalo a le Atua.

"Tatou te talitonu o le faatulagaga ma le faigamalo o le lagi o le a



fausiaina i aiga ma aiga lautele."²

"O tagata uma, e tusa lava po o a o latou tulaga faaleulugalii pe toafia foi le aofai o le fanau, e mafai ona avea ma e puipuia le fuafuaga a le Alii o loo faamatala mai i le folafolaga o le aiga," sa saunoa ai Bonnie L. Oscarson, Peresitene Aoao o Tamaitai Talavou. "Afaia o le fuafuaga lea a le Alii, e tatau foi ona avea ma a tatou fuafuaga!"³

Mau Faaopoopo

Mataupu Faavae ma Feagaiga 2:1–3; 132:19

Mafaufau I le Mea Lenei

Aisea ua avea ai le aiga ma iunite e sili ona taua i le olaga nei ma le faavavau?

FAAMATALAGA

- Carole M. Stephens, "O Le Aiga e Ou Le Atua," *Liahona*, Me 2015, 11, 13.
- L. Tom Perry, "Aisea E Taua ai le Faaipoipoga ma le Aiga—i Soo Se Mea i le Lalolagi," *Liahona*, Me 2015, 41.
- Bonnie L. Oscarson, "O Tagata e Puipuia le Folafolaga o le Aiga," *Liahona*, Me 2015, 15.
- Julie B. Beck, "Aoaoina o Mataupu Faavae o le Aiga," *Liahona*, Mat. 2011, 32, 34.

Faatuatua, Aiga, Toomaga



O Le Aoaoga Faavae o le Aiga

Sa aoao mai e Sister Julie B. Beck, le sa avea muamua ma Peresitene Aoao o le Aualofa e faapea o le mataupu paia o le aiga e faavae lea i le Foafoaga, le Pau, ma le Togiola a lesu Keriso:

"Ua saunia e le Foafoaga o le Lalolagi se nofoaga e mafai ona nonofo ai aiga. Na foafoaina e le Atua se tane ma se fafine o ni afa tutusa taua se lua o se aiga. O se vaega o le fuafuaga a le Tama Faalelagi ina ia faamauina Atamu ma Eva, ma fatuai ai se aiga e faavavau.

" . . . Ona o le Pau ua mafai ai e i laua ona maua atalii ma afafine.

"O le Togiola [a Keriso] e mafai ai e le aiga ona faamau faatasia e faavavau. Ua mafai ai ona maua e le aiga le tuputupu ae ma atoatoaga e faavavau. O le fuafuaga o le fiafia, ua taua foi o le ata o le faaolataga, o se fuafuaga na foafoaina mo aiga. . . .

" . . . O le aoaoga faavae lea a Keriso. . . . A leai le aiga, e leai se fuafuaga; leai se mafuaaga mo le olaga faaletino."⁴

O A'U ASO SA E FAATUMULIA I AUAUNAGA

Saunia e Jeffery A. Hogge

E faatumulia o'u Aso Sa, ae ou te lagona le lava i fiafetai o loo mafai ona ou auauna atu e aunoa ma ni faigata e pei ona sa fetaiai ma taitai anamua o le Ekalesia e pei o Elder Parley P. Pratt.

OLE TAEAO O LE ASO SA. I O'U LUMA ATU UA I AI SA'U FAATULAGAGA 12 ITULA O FONOTAGA, FAATALANOAGA, FAAMAUWA, MA FAAUWAGA. O LE A OU AMATA I LE TASI NOFOAGA AUTU O LE SITEKI MA FAIAU I SE ISI FALELOTU I LE ISI ITU O LE TAULAGA—E [FAIA NEI] MEA UMA I SE ASO VEVELA TELE.

OU TE TULIMATAI ATU LAVA I FONOTAGA TAITASI, FAATALANOAGA, FAAMAUWA, MA FAAUWAGA. AE O ANANAFI, A O OU MAFAUFAU I LE PISI TELE O LE A OU I AI, SA OU FAATAGAINA SINA LAGONA O LE FAANOANOA MO AU LAVA—SEIA OO INA OU TATALAINA LE *Tusi o le Talaaga o le Soifuaga o Parley P. Pratt* MA AMATA ONA FAITAU MAI LE MEA SA GATA AI LA'U FAITAU TALU AI. SA AVE FAAPAGOTA IA ELDER PRATT, FAATASI AI MA IOSEFA MA AILAMA SAMITA MA ISI, I TAIMI O ASO FAIGATA I MISURI. INA UA UMA ONA AVATU I INITIPENE, SA LOKAINA LE USOGA I SE FALETALIMALO MA MOMOE AI I LUGA O LE FOLA MA SE FASI POLOKA LAU E ALULUGA AI.

I SE TASI TAEAO MALULU, MA LE TOULU O LE KIONA SA ALA AE AI ELDER PRATT, MA, SA AUNOA MA LE ILOAINA, SA SOLA ESE AI MAI LE FALETALIMALO. SA IA AGAI ATU I LE ITU I SASAE E OSO ATU I TOTONU O LE TAULAGA MA AGAI ATU I TOTONU O FANUA LATA ANE. INA UA MAVAE ONA SAVALI PE TUSA MA SE MAILA (1.6 KM), SA TAU ATU AI ELDER PRATT I SE VAOMATUA, SA UFTIAINA E LE KIONA ONA TULAGA SAVALI ATOA AI MA LAU SA MAFAI ONA LAFI AI.

SA IA MAFAUFAU I ONA TULAGA FAIGATA. O LE FAAAUUA PEATI I LE ITU

I SASAE O LONA UIGA O LE SOLA ATU LEA I SE ISI SETETE, I SE NOFOAGA E MAFAI ONA IA AUINA ATU AI SE TUSI I LONA AIGA INA IA FAATASI MA IA. O LE TOE FOI ATU I LE FALETALIMALO O LONA UIGA O LE FALEPUIPUI MA LE MOLIAINA I NI SOLIGATULAFONO MAMAFYA. E UI SA FAAOOSOINA IA SOLA ESE, AE SA MAFAUFAU ELDER PRATT I "FAAFITALI, PO O LE OTI FOI" O LE A IA FAAMATUA'IA I ISI PAGOTA PE AFAI O LE A IA SOLA ESE.

A O IA LE MAUTONU AI, SA IA MANATUA SE MAU: "AUA AI SE FIA FAASAOGALEMUINA LONA OLA, E MAUMAU AI IA TE IA; A O LE FAAMAUWA LONA OLA ONA O A'U O LE A TOE MAUA E IA, O LE OLA LAVA E FAAVAVAU" (TAGAI MAREKO 8:35; MF&F 98:13).

SA TOE FOI ATU ELDER PRATT I LE FALETALIMALO. SA SOSOO AI MA MASINA O SAUAGA

I TOTONU O LE FALEPUIPUI—SA AUNOA MA SE AIGA, FAAMALOSIAUGA A LE AU PAIA, PO O LE TOMAI E AUAUNA ATU AI I LONA VALAAUGA FAAPOSETOLO.¹

SA TAPUNI LE TUSI, MA OU MAFAUFAU LOLOTO I PUAPUAGA A LE AU PAIA ANAMUA—O NISI O I LATOU O OU TUA. ONA O LA LATOU MOLIMAU E UIGA I LE TALALELEI MA LO LATOU FAATUATUA IA JESU KERISO, SA LATOU ONOSAIA AI LE AGALEAGAINA MA LE SAUAINA. ONA O LO LATOU TUTUMAU, UA MAFAI AI ONA OU AUAUNA ATU MA TAPUAI SAOLOTO I LE ASO, MA AUFATASI MA I LATOU I LE FAATUATUA MA LE MOLIMAU.

A O OU SAUNIUNI MO LENEI ASO SAPATI, O LOO SAOGALEMU LO'U AIGA, O LOO TULIMATAI ATU I SE ASO O TAPUAIGA I SE FALELOTU TOFILEMU. O LE FAAAUMEA A LE AU PAIA O LE A FAAFIAFIAINA AI LO MATOU ASO. O LE A MATOU OLIOLI FAATASI MA I LATOU I LE FAATINOINA O FAAMAUWA MA FAAUWAGA, FAATAUNUUINA O TIUTETAUAVE, MA LE FAAMALOSIA O LE FAATUATUA. O LE A MATOU AAI MA FEINU I LE FAAMANATUGA, MA MANATUAINA LO TATOU FAAOA MA LANA TAULAGA TOGIOLA. MA O LE PO NANEI O LE A MATOU POTOPOTO FAATASI AI I LE MATOU FALE E FAITAU LE *TUSI A MAMONA* MA TATALO FAATASI A O LEI TAOOTO I LALO I MOEGA MAFANAFANA MA ALUGA LELEI O MATOU ULU I ALUGA MALU.

UA FAATUMULIA O'U ASO SA. MO LENA MEA OU TE FAAFETAI AI LAVA MA UA FAAMANUAINA AI AU. ■

E ALALA LE TUSITALA I KALEFONIA, ISA.

FAAMATALAGA

1. Tagai Parley P. Pratt, *Autobiography of Parley P. Pratt*, ed. Parley P. Pratt Jr. (1979), 194–97.



TAUSAMAAGA MULIMULI A MALEVA

Saunia e Cheryl Harward Wilcox

"E te fia manao e taumafa i le faamanatuga?" Sa ou fesili atu ai i lo'u tina ua vaivai a talioti.

Sa ola lo'u tina i le 92 tausaga le matua ma maliu ai talu ai nei. Sa i ai o ia i le maota gasegase ina ua tonu i fomai ua le o toe i ai se isi mea e mafai ona toe faia sei vagana ai le faatoafimalieina o ia i le mea e mafai ai seia oo ina maliu.

A o faia ni tapenaga e avatu o ia i le fale, sa o mai ni alii se toalua mai se uarota i le lotoifale i totonu o le potu ma fesili mai ia te au pe faamata e fia manao lo'u tina i le faamanatuga. Sa muamua ou fai atu i ai, "Leai, faafetai." Sa faigata ia tina ona folo se meaai (tulou). Ona ou faapea atu lea, "I se isi manatu, sei ou fesili atu pea ia te ia." Sa ou faalatalata atu i lona taliga ma fai i ai, "E toalua au perisitua o loo i ai iinei. E te fia manao e taumafai e taumafa i le faamanatuga?" I se leo vaivai ae manino sa ia tali mai ai, "Ioe."

Ina ua uma ona faamanuia, sa ou pikina i luga se fasi falaoa mai le fata, vavae sina fasi mea lava ma tuu atu lemu i lona fofoga. Sa ia taumafai teisi i ai, ma sa ou faamalulu atu i nai alii ia ona ua fai sina umi o tau faatino. Sa la faamautinoa mai ia te au e le afaina. Ina ua mavae le tatalo lona lua, sa ou avae le tamai ipu uga o le vai ma tuu atu i ona laugutu. Sa ia fai sina ana

miti teisi, ae sa ou te'i i le lelei o lona foloina o le vai.

Sa ou faafetai atu i nei tuagane, ma sa o ese atu mo le isi potu na sosoo ai. Sa maliu filemu tina pe tusa ma se itula mulimuli ane.

I aso na soo ane ai, sa ou iloa ai le maeu naua o se taimi paia sa faatagaina au e faasoa ma si ou tina. O le mea mulimuli lava sa ia faia i lenei olaga o le taumafa lea i le faamanatuga. O le upu mulimuli lava sa ia saunoa i ai o le "Ioe"—ioe i le taliaina o le faamanatuga, ioe i le ofoina atu o lona taulaga o "se loto momomo ma le

agaga salamo" (3 Nifae 9:20), ioe i le tauaveina i ona luga o le suafa o Iesu Keriso ma folafola atu e manatua pea o Ia, ioe i le mauaina o Lona Agaga. O mea mulimuli lava na oo atu i ona laugutu o faatusa o le faamanatuga.

E maeu le suamalie o lana tau-samaaga mulimuli i lana tofo! E ui i le vaivai tele e minoi pe tautala, ae atonu sa ia lagonaina le maeu o lona malosi ia Keriso! Atonu e maeu lona lagonaina o lona faafetai mo Lona mana togiola ma gafatia, lea na tauaveina o ia i na taimi faaiu o lana malaga i le olaga faaletino ma faaloa-loa atu ai ia te ia le faamoemoe mo le ola e faavavau.

O vaiaso taitasi uma a o tatou aai ma feinu i le faamanatuga, tau ina ia tatou taufai maua uma le lotofaafetai mo le avanoa ua tatou maua e toe faafou ai a tatou feagaiga ma lagona ai le faamataloga ma le alofa tunoa a o tatou taumafai ia avea atili e faapei o lo tatou Tama oi le Lagi ma Lona Alo, o Iesu Keriso. Ona mafai lea ona avea o le areto ma le vai ma tatou, e pei lava foi ona i ai mo lo'u tina, "ua sili ona suamalie i luga o mea uma ua suamalie, . . . ma sili ona paepae i luga o mea uma ua paepae" (Alema 32:42). ■

E alala le tusitala i Iuta, ISA.





Saunia e
Tad R. Callister

Peresitene Aoao
o le Aoga Sa

Ao avea atili i tatou ma tagata aoaoina tuuto, o le a tatou mauaina le oli-oli faalelagi lea e oo mai i le aoaoina ma le ola ai i le talalelei a Iesu Keriso.



OLE Olioli I LE • Aoaoina

Ole tala o loo faamatalaina ai se tamaloa na lauiloa faapea o tagata e sili ona paie i totonu o le nuu. Sa le naunau o ia e galue, le naunau e saili se galuega. Sa na o le ola mai galuega a isi. Na iu lava ina le toe fia tausia e tagata o le nuu. Na latou filifili e ave o ia ma tuu i fafo atu o le nuu ma tulieseoa ia. Ao ave atu o ia e se tasi tagata o le nuu i se taavale soloanua i le tausiusiuga o le nuu, na lagona e le ave taavale ni lagona o le alofa e uiga ia te ia. Atonu e tatau ona toe tuu tasi atu se avanoa i le tamaloa ua tulieseina. Ma o lea, na ia fesili atu ai loa, “E te manao i se ato saga e amata ai se olaga fou?”

Na tali mai le ua tulieseoa, “Ua uma ona aveese pau?”¹


Faiaoga ma Tagata Aoao: E Tutusa Tiutetauave e Fai

O nisi taimi tatou te maua ai tagata e mananao ia maua se malamalamama faaleagaga e aunoa ma se galuega e fai—e mananao e faamatala atu tusitusiga paia ia i latou ae latou te le faitauina lava. Latou te mananao e faalologolo pe matamata i ni faasologa o ata pupuu malie. Latou te mananao i le faiaoga o le Aoga Sa e faia uma mea uma o le lesoma mo i latou ae itiiti sa latou sauniuniga po o o le auai i la latou vaega.

O le faafeagai, na valaaulia e le Faaola i se tasi taimi Ana tagata faalologolo e o i le fale ona e lei mafai ona latou malamalamama i Ana upu. Na Ia poloaiina i latou ia tatalo, mafaufau loloto, ma “saunia [o latou] mafaufau mo a taeao,” pe a Ia “toe sau ai ia te i [latou]” (tagai i le 3 Nifae 17:2–3).

O le lesona e faapea: O le tiutetauave e le na o le faiaoga ia sau saunia ae faapena foi le au aoao. E pei lava ona i ai le tiutetauave o le faiaoga e aoao e ala i le Agaga, e faapena foi ona i ai le tiutetauave i le tagata aoao ia aoao e ala i le Agaga (tagai i le MF&F 50:13–21).





Ua tusia i le Tusi a Mamona: “Sa le sili atu le lelei o le sa talai atu nai lo le sa faalogologo, *pe sa sili atu foi le lelei o le na aoao atu nai lo le na aoao-inia; ma sa faapea ona latou tutusiga paia*” (Alema 1:26; ua faaopoopo le faamamafa).

O nisi nei o fautuaga mo mea e mafai ona tatou faia e maua ai le olioli lea e oo mai pe a tatou faia la tatou vaega i le aoaoina ma le ola ai i le talalelei.

Aoaoina i le Aiga Suesue i Tusitusiga Paia

Ua i ai i tagata uma o le Ekalesia se tiute mo lona lava aoaoina o le talalelei; e le mafai ona tatou faamatuu atu lena tiutetauave. O le tele o lena aoaoina e oo mai e ala i le duesueina e le aunoa o tusitusiga paia. Na folafola mai e Peresitene Harold B. Lee (1899–1973): “Afai tatou te le o faiatina tusitusiga paia i aso uma, o le a faasolo ina vaivai a tatou molimau.”² Na matauina e le Apostetolo o Paulo faapea “ua sili ona amio lelei [tagata Iutaia i Perea] i tagata o Tesalonia, aua ua latou talia le upu ma le fiafia tele,” ona ia faasoa mai lea o le mafuaaga mo lena taliaina: “[Ua latou] *saili i Tusi i lea aso ma lea aso*” (Galuega 17:11; ua faaopoopo le faamamafa).

O le duesue i tusitusiga paia i aso uma o se vaega taua i le atinaeina o lo tatou faaleagaga. E leai se isi mea e mafai ona suitulaga atoatoa mo le leai o se duesuega i tusitusiga paia i la tatou faatulaga o aso taitasi. Mo

lenei mafuaaga, ua tatau ai ona faatulaga se taimi mo le duesueina o tusitusiga paia, ae le o le taimi o totoe.

O nisi atonu e faapea mai, “Ae e leai sou taimi mo le duesueina o tusitusiga paia i aso uma mai isi ou tiute e tele i le olaga.” O lenei fuaitau ua faamanatu mai ai ia te au le tala i tagata ta laau e toalua na faia se tauvaga e iloa ai po o ai e tele atu laau e taina i se aso. Na amata le tauvaga i le oso ae o le la. O itula taitasi e aluese atu ai le tamaloa laitiiti i le togavao mo le 10 minute pe a. O taimi uma lava na te faia ai lenei mea, e ataata lava le isi ma le mautinoa, ua ia manumalo i le tauvaga. E le aluese lava le tamaloa lapoa mai lana tulaga, e le taofia le taina o laau, e le malolo lava.



Ina ua faaiu le aso, na ofo le tamaloa lapoa i le iloaina o lana tama o loo la tauva, lea na foliga mai na faamaumauina le tele o le taimi, na sili atu ona tele laau sa ia taina nai lo ia. “Na faapefea ona e faia ae sa tele atu malologa sa e faia?” na ia fesili atu ai.

Na tali mai le tagata na manumalo, “Oi, sa ou faamataina lautoi.”

O taimi uma lava tatou te duesue ai i tusitusiga paia, o loo tatou faamataina la tatou toi faaleagaga. Ma o le vaega faavavega e faapea, afai tatou te faia faapea, o le a sili atu ona tatou faaaogaina ma le atamai o tatou taimi o totoe.

Saunia Mamao

Ua faaalia e duesuega faapea ua na o se vaega itiiti o tagata o le Ekalesia e muai faitau i





tusitusiga paia e talanoaina i vasega o le Aoga Sa. E mafai e i tatou taitoatasi ona fesoasoani e sua lenei tulaga. E mafai ona tatou tauaveina la tatou vaega o le aafiaga e aoao ai e ala i le o mai i le vasega ua lava saunia, ua uma ona faitau tusitusiga paia ma saunia e faasoan atu ni manatu. O la tatou sauniuniga e mafai ona avea o se mealofoa faaleagaga tatou te tuuina atu i tagata uma o le vasega.

Aoaoina i le Vasega

Auai i le Vasega

O le poloaiga ia tatala o tatou gutu (tagai i le MF&F 60:2-3) e aoga e le gata i se tulaga faafafetatalai ae faapea foi i totonu o se potu aoga. Pe a tatou auai, tatou te valaaulia le Agaga, lea e mafai ona molimau i le moni o a tatou faamatalaga ma faamalamalamaina ai o tatou mafaufau i nisi manatu. Ma le isi, o la tatou auai e ono

uunaia ai mafaufauga o se

tasi ma faamalosia
ai lona auai.

O lenei auala, ua tatou mulimuli ai i se mataupu faavae faafafiaoga lea na aoaoina e le Alii: “Tuu atu i tagata e tau-tala taitoatasi mai ae tuu i isi tagata uma e faalogologo i ana upu, ina a uma ai ona tautala mai tagata uma o le a faapea ona mafai ona faagaeetia ai o tagata uma” (MF&F 88:122; ua faaopoopo le faamamafa). O nisi taimi o le auai i le vasega e le faigofie; e manaomia ai lo tatou faia o se mea tatou te le fia faia. Ae o le faia o lenei mea e faateleina ai le tuputupu ae o tagata uma o i le vasega.

Faamaumau ni Lagona

Sa ou tauaveina mo se taimi uma lava ni kata avanoa i le lotu ma sailia manatu faaleaoaoga faavae po o uunaiga faaleagaga e mafai ona ou tusia. E mafai ona ou fai atu ma le faamaoni ua matuai faamanuiaina lava au. O lenei auala na suia ai lau vaai; ua taulai atu ai ma faateleina lou aoao-inia; ua faateleina ai lou fiafia i le lotu.


Aisea e taua tele ai le tusia o aafiaga faaleagaga tatou te maua i le lotu ma soo se nofoaga? Mafaufau mo se taimi faapea o loo talanoa atu se tina i lana tama talavou ae faapea mai o ia i se tasi taimi, “Tina, o se fautuaga lelei moni lava lena.” Ona ia aumaia lea o se api o faamatalaga ma amata ona tusia uunaiga sa ia maua mai le la talanoaga. O le taimi lava e toe tei ai le tina mai lona ofo tele, mata na te le toe manao e toe tuuina atu nisi fautuaga ia te ia?

E mautinoa lava o le mataupu faavae lava lea e tasi e faatatau i le fautuaga mai lo tatou Tama o i le Lagi. Ao tatou tusia uunaiga Na te tuuina mai ia i tatou, e mautinoa lava Lona tuuina mai o nisi faaaliga ia i tatou. Ma le isi, o le tele o uunaiga tatou te maua atonu e foliga mai i le taimi muamua o ni manatu laiti, ae afai tatou te faafaleleina ma mafaufau loloto i ai, e mafai ona tuputupu ae ma avea o ni manatu maoae faaleagaga.

Na saunoa le Perofeta o Iosefa Samita i le taua o le tusiaina o manatu ma uunaiga: “Afai e te . . . faaauau ona talanoaina ni fesili taua . . . ae le tusia i lalo, . . . atonu, mo le le tusiaina o nei mea ina ua faaali mai e le Atua, ma le le manatu i ai o ni mea e lava le taua, atonu o le a aluese

le Agaga . . . ma e i ai, pe sa i ai, se malamalama tele, o le taua e le iu, lea ua leiloa.”³





O SE Taumafaiga FaaleAtua

O Le Olioli i le Aoaoina

O le aoaoina e matua sili atu nai lo se tiute paia. Ua faatatau foi ia avea o se lagona o le olioli loloto.

I se tasi taimi, na fesiligia ai se tagata matematika anamua e suafa ia Archimedes e lona tupu e vaai pe o le pale fou o le tupu o se auro maoi pe na sua ma le le faamaoni e le faiauro ni siliva mo le auro. Na mafaufau loloto Archimedes mo le tali; ona iu lea ina oo mai le tali. O lona olioli tele i lenei mea ua ia mauaina, e tusa ai la ma le talatuu, sa ia momoe faataamilo i le aai ma alaga atu, "Eureka! Eureka!"—o lona uiga, "Ua ou mauaina! Ua ou mauaina!"

E pei o le maoae o lona olioli i le mauaina o se mataupu faavae faasienisi, e sili atu le olioli i le mauaina o upumoni o le talalelei a Iesu Keriso: o na upumoni e le gata e tauina mai ia i tatou ae faapena foi ona faaolaina ai i tatou. Mo lenei mafuaaga na fetalai ai le Faaola, "Ua ou fai atu nei mea ia te outou, . . . ia atoatoa foi lo outou olioli" (Ioane 15:11). Ma mo lenei mafuaaga na "alalaga fiafia atalii uma o le Atua" (Iopu 38:7) ina ua latou aoaoina le fuafuaga o le faaolataga. E pei ona i ai i fatulau le mana faanatura e tutupu ai, e faapena foi ona i ai i upumoni o le talalelei le mana faanatura e aumaia ai le olioli.



E le na o se poloaiga mamana ia "saili i le aoaoina" (MF&F 88:118), ae o se gaoioiga faaleatua foi. O taimi uma lava tatou te suesue ai i tusutisiga paia, o mai i le vasega ua sili atu le saunaia, auai i talanoaga a le vasega, fai fesili, ma tusia uunaiga paia, ua amata ona avea atili i tatou faapei o le Atua, ma faateleina ai lo tatou malosi ia maua le olioli o Ia lagonaina.


Tau ina ia tatou tauivi uma ia avea atili ma ni tagata aoao tuuto, o ni tagata aoao e sili atu le mamana—i le fale, totonu o vasega, ma soo se mea tatou te i ai. A tatou faia o lea, o le a tatou maua le olioli faalelagi lea e oo mai i le aoaoina ma le ola ai i le talalelei a Iesu Keriso. ■


FAAMATALAGA

1. Sa faamatalaina e Elder D. Todd Christofferson se tala talitutusa i le konafesi aoao ia Oketopa 2014.
2. Harold B. Lee, regional representatives' seminar, Tes. 12, 1970.
3. Iosefa Samita, i le *History of the Church*, 2:199.



IA SAILI LE AOAOINA





O taimi uma lava tatou te suesue ai i tusitusiga paia, o mai i le vasega
 ia sili laitiiti atu le saunia, auai i talanoaga i le vasega, fai fesili, ma
 tusia uunaiga mamana, ua amata ona avea atili i tatou faapei o le Atua,
 ma ua faateleina ai lo tatou malosi e maua ai le olioli o la lagonaina.

O Fanau Iti MA LE Faamanatuga

Sa lagonaina e le ma fanau laiti e taua le faamanatuga ia i maua. Sa ono mafai ona ma faia nisi mea sili atu e fesoasoani ai ia i latou ia iloa sa taua foi ia i latou.

Saunia e Aaron L. West

Pe sa e tomanatu ea pe aisea tatou te faatagaina ai tamaiti e lei papatisoina ona taumamafa i le faamanatuga? Pe tau ea na ona faia e taofia ai i latou mai le tauaimisa ma le pisapisao i le fia mananao i se fasi falaoa? Pe tau ea na ona faafaigofie ai o le faatautiga o le sauniga, tau na ona tausia o le filemu?

Leai e le o lena. Ou te talitonu o loo i ai ni mafuaaga loloto atu. Ou te talitonu i lenei mea ona ou te talitonu ina ua fetalai Iesu Keriso “o tagata uma,” o le uiga o Lana fetalalaiga o tagata uma. Ma pe a Ia fetalai atu i se motu o tagata, Na te le tavavaeeseina lava se tasi.

Ina ua faalauiloa atu e le Faaola toetu le faamanatuga i Lona nuu i Amerika, sa Ia faamamafa atu e faapea na i ai i le sau-niga se uiga faapitoa mo i latou sa papatisoina.¹ E faapena foi, sa Ia poloaiina ai Ona sooi ia “avatu [le faamanatuga] i le motu o tagata.”² O lena motu o tagata sa aofia ai ma “fanau iti.”³

A faaleo mai i aso nei e i latou e umia le perisitua ia tatalo o le faamanatuga, latou te ole atu i le Tama Faalelagi ia faamanua ma faapaia

le areto ma le vai “i agaga o i latou *uma*” o e e fetagofi i ai.⁴ [Latou] Uma. O tagata taitasi e tagofia—ua aofia ai ma tamaiti taitasi.

Afai o le fetagofi atu i le areto ma le vai, e maua ai e fanau nei faatusa e fai ma faamanuiaga i o latou agaga



mama, e tatau lava la ona i ai se auala e fesoasoani ai ia i latou ia maua se uiga i le sauniga.

Faatasi ai ma lenei malamalamaaga, ou te toe tepa ai i tua i aso a o laiti la'u fanau. Sa ma faia ma lo'u toalua se galuega lelei tele i le faafilemuina o i latou i le taimi o le faatautaiga o le faamanatuga. Ou te manatu sa latou lagonaina sa taua le sauniga ia i maua. Ae sa ono mafai ona ma faia nisi mea sili atu e fesoasoani ai ia i latou ia iloa sa taua foi ia i *latou*.

O le a se mea sa ono mafai ona ma faia? Sa ono mafai ona ma manatua ina e mafai foi e fanau laiti ona tausia ia folafolaga o loo i le tatalo o le faamanatuga. E mafai ona latou malamalama, i a latou lava ala iti ae mamana, le uiga o le "manatua pea" o Iesu. E mafai ona latou tautino atu e "tausi i ana poloaiga." E mafai foi ona latou faaali atu ua latou "loto e avea i o latou luga le suafa" o Keriso, ma le iloaina o le a le pine ae latou mauaina lena avanoa pe a papatisoina i latou ma faamauina.⁵

Ae a le faafouina o feagaiga? Ua aoao mai taitai o le Ekalesia e faapea, a tatou aai ma feinu i le faamanatuga, ua tatou faafouina feagaiga uma ua tatou osia ma le Alii.⁶ E le o i ai i fanau laiti ni feagaiga e faafou.

Ou te toe mafaufau i le taimi a o laiti le ma fanau. Sa le mafai ona ma fesoasoani ia i latou e toe tepa i tua i feagaiga, ae sa ono mafai ona ma fesoaoسانی ia i latou e tepa

i luma. Ou te vaai faalemafaufau ia te au lava ma se atalii talavou po o se afafine i se taeao o se Aso Sa.

"A valu tausaga lou matua," ou te faapea atu, "o le a papatisoina oe ma maua le meaalofa o le Agaga Paia. O le a e osia se feagaiga. O le feagaiga e te osia i *lena taimi* o le a pei o folafolaga e te osia i le *taimi nei* pe a e tagofia le faamanatuga.



"A ou tagofia le faamanatuga i le taimi nei, o le a ou faafouina la'u feagaiga o le papatisoga, e pei ua ou toe osia foi na folafolaga. O le a e i ai iina faatasi ma a'u, ae o le a e le faafouina se feagaiga. E le i oo i le taimi e te osia ai se feagaiga. Ae, e mafai ona e *faataitai* e osia se feagaiga. O taimi uma e te tagofia ai le faamanatuga, e mafai ona e saunia ina ia papatisoina ma faamauina. I lena ala, o le a e saunia ai pe a atoa lou valu tausaga."

Afai e foliga mai e le masani ai ona faaaoga le upu *faataitai* i lenei ala, mafaufau i le mea lenei: I se faatulagaga migao, e mafai ona fesoasoani se tama i lana fanau ia saunia mo le sauniga o le papatisoga e ala i le faaali atu ia i latou o le auala o le a latou tutu faatasi ai i le vai ma e ala i le faasoa atu o upu o le tatalo o le paptisoga. Na te le faatinoina le sauniga i lena faatulagaga. I se lagona, na te fesoasoani i lana fanau ia faataitai. I lena auala, o le a latou le popole ai e uiga i se mea o le a tupu pe a latou ulu atu i vai o le papatisoga. Ou te talitonu e mafai foi e tina ma tama ona fesoasoani i fanau ia faataitai ona osia ma tauvia le feagaiga o le papatisoga. E mafai ona avea sauniga faamanatuga taitasi ma se sauniga faataitai paia mo fanau iti a o latou fetagofi i faatusa o le Togiola a le Faaola.

O lea ou te toe foi atu ai i lau fesili muamua. Aisea tatou te faatagaina ai fanau e lei papatisoina ona taumamafa i le faamanatuga? Pe tau ea na ona "tausia o le filemu"? E leai. Tatou te fesoasoani i a tatou fanau iti ia taumamafa i le faamanatuga ina ia mafai ai ona latou manatua lo latou Faaola ma tausia Lona filemu—o se filemu e le pei o soo se mea e mafai ona ofo mai e le lalolagi.⁷ Tatou te fesoasoani ia i latou ia saunia e maua lena filemu i se faaputuga tele atu ma saga tele atu i le lumanai, pe a oo i le taimi o le a latou osia ma tausia ai feagaiga faatasi ma Ia. ■

E alala le tusitala i Iuta, ISA.

FAAMATALAGA

1. Tagai 3 Nifae 18:5, 11.
2. 3 Nifae 18:4; faaopoopo le faamamafa.
3. Tagai i le 3 Nifae 17:21–25; 18:1–4.
4. Mataupu Faavae ma Feagaiga 20:77, 79; faaopoopo le faamamafa.
5. Mataupu Faavae ma Feagaiga 20:77.
6. Tagai L. Tom Perry, "A o Tatou Fetagofi Atu Nei i le Faamanatuga," *Liahona*, Me 2006, 41.
7. Tagai i le Ioane 14:27.



MALAMALAMA I LE Pule i le Ola

FAAIFOILO O LAPATAIGA MA PUIPUIGA

Saunia e Kenichi Shimokawa, PhD

Tautua a le AAG mo Aiga, ofisa i lapani

Ina ua 16 tausaga o Kevin, na tatala le faaipoipoga a ona matua. O le taimi lava lea, na ia taofia ai le faaaogaina o ana fualaau mo le mai maliu, lea na fesoasoani ia te ia e faaleleia ai lona mafaufau. E aunoa ma le iloaina na maua o ia i le faaletonu o le mafaufau, na amata ona fefe o ia, vaivai le tino ma ese le tulaga, ma matautia le faavauvau. Na foliga mai e lei fesoasoani fualaau. Na oo i se tulaga na ia lagonaina le matua le lava i mea uma, ma ia filifili ai e pule i lona ola e aunoa ma le faailoaina i isi o lona faamoemoega.

Na faamatalaina e Kevin le aso na ia taumafai ai e pule i lona ola: “Sa ou tagi. Sa ou matuai le lava lava, na matuai vaivai lou loto. Na o lou vaai atu lava i tagata, ma manao i se tasi, soo se tasi, e fai mai, ‘O seki oe?’ E pei ona sa ou manao tele i lena mea, sa ou faalogoaina ia leo nei [i totonu o lou ulu] o fai mai, ‘Ua tatau ona e oti.’ . . . O le taimi atoa na ou tauanauina ai au lava e aua [le faia lena meal], ae sa matua malosi lava ia leo, sa le mafai ona ou teenaina.”¹

Ae paga lea, e leai se tasi na vaaia lona faavauvau. I le mautinoa faapea e leai se tasi na popole mo ia, na ia taumafai ai loa e pule i lona ola—ae sa faaolaina faavavega.

E mafai ona tatou lagonaina nisi o lona faanoanoa lofituina ma le tagi atuatuvala, le leoa mo se fesoasoani?

O le pule i le ola o se tasi lea o tofotofoga sili ona faigata i le olaga faaletino, e le gata mo i latou o loo puapuagatia i mafauauga o le pule i le ola ae faapea foi mo aiga o loo feola. Na saunoa Elder M. Russell Ballard o le Korama a Apostolo e Toasefululua: “I lau faamasinoga, e leai se taimi e sili atu le faigata mo se aiga nai lo se taimi e pule ai se tasi e pele i lona ola. O le pule i le ola o se aafiaga matautua

faaleaiga.”² I le mafaufau ai i le natura matautia o lenei tofo-tofoga, sei tatou talanoa (1) po o a mea ua tatou iloa e uiga i le pule i le ola, e aofia ai ona faailoga lapatai ma mea e mafai ona tatou faia e puipuia ai; (2) po o a mea e mafai ona fai e aiga o feola ma nuu; ma le (3) po o a mea e manaomia ona tatou faia uma lava e faamalosia ai lo tatou faamoemoe ma le faatuatua ia Keriso ina ia aua ai nei tatou lotovaivai.

Malamalama i le Pule i le Ola

E sili atu ma le 800,000 tagata e faamutaina o latou soifua i le pule i le ola i tausaga taitasi i le lalolagi atoa.³ O lona uiga e tai 40 sekona ma faamutaina e se tasi i le lalolagi lona soifua. E foliga mai e sili atu ona maualuga le fuainumera moni ona o le pule i le ola o se mataupu maaleale ma e faasaina i nisi atunuu ma o lea e le mafai ai ona lipotia. O le pule i le ola o se mafuaaga lona lua lea o le feoti o tagata e i le va o le 15 ma le 29 tausaga le matutua. I le tele o atunuu, o le pule i le ola e sili atu le maualuga i tagata ua ova ma le 70 tausaga le matutua. E tuusao lava pe ala mai isi, o le pule i le ola ua aafia ai se vaega tele o lo tatou lalolagi.

Faailoga Lapatai

Afai ua sili atu le mamafatu o luitau o le olaga nai lo tatou malosi e gafatia ai, e mafai ona tatou lagonaina le

*E pei ona aoao mai Alema, e
tatau ona tatou “tauave avega
a le tasi, ina ia māmā; . . . faa-
noanoa faatasi ma e e faanoa-
noa; ioe, ma faamafanafana
atu ia te i latou o e e manao-
mia le faamafanafanaga.”*

matautia o le popole. Afai ua le gafatia ona tauave le lotovaivai faalelagona, e mafai ona nenefu le mafaufau o se tagata ma taitai atu ai i le lagonaina faapea o le otu ua na o le pau lea o le tali. Atonu latou te lagonaina faapea e leai se tasi e mafai ona fesoasoani, lea e mafai ona taitai atu ai i le faaesea mai tagata ma faateleina ai le faavauvau ma lagona o le nofoai ma le leai o se faamoemoe, e iu lava ina taitai atu ai i le mafaufau faapea o le pule i le ola ua na o le pau lea o le tali.

Afai ua faaalia e se tasi *soo se faailoga* nei o le lapatai matautia,⁴ ua tatau loa ona tatou sailia vave se fesoasoani mai se fomai o le mafaufau po o auauanga o faalavelave faafuasei e pei o leoleo:

- Faia o ni taufaafefe e faatiga pe fasiotia i latou lava
- Sailia o ala po o ni tulaga e fasiotia ai i latou lava
- Talanoa pe tusitusi e uiga i le otu, vaivai o le a otu, po o le pule i le ola

O faailoga nei e mafai ona faaalia ai se tulaga e itiiti le manaomia vave, ae e le tatau ona tatou faatali e aapa atu ma saili se fesoasoani mo le tagata ua faaalia *soo se faailoga* nei:

- Faaalia le leai o se faamoemoe ma ua leai se mafuaaga e toe ola ai
- Faaalia le sauia po o le ita po o le saili e taui ma sui
- Le mafai ona pulea le amio
- Lagona ua maileia
- Faateleina lo latou faaaogaina o ava malosi po o fualau faasaina
- Aloese mai uo, aiga po o tagata lautele
- Lagonaina le popole po o le tetee po o le faafuasei ona fesuisuiam amioga
- Faigata na moe po o le moe i taimi uma
- Lagonaina ua avea i latou ma avega mamafa i isi

E le o tagata uma e taumafai e pule i le ola e faailoaina atu i isi o latou faamoemoega, ae o le toatele e faaalia ni faailoga lapatai e pei o [faailoga] nei. O lea ia mataala ai i faailoga nei!

E tusa lava pe e le o maua gofie le fesoasoani faafomai, o le mana o le alofa popole moni lava o uo ma aiga e mafai ona aoga tele.



Puipuiga

Afai ua manao se tasi e pule i le ola, ua i ai i aiga ma uo se matafaioi taua tele. E pei ona aoao mai Alema, e tatau ona tatou “tauave avega a le tasi, ina ia māmā; . . . faanoanoa faatasi ma e e faanoanoa; ioe, ma faamafanafana atu ia te i latou o e e manaomia le faamafanafanaga” (Mosaea 18:8, 9).

O nisi nei o mea e fesoasoani i aiga ma uo e mafai ona fai:

Aapa atu ma faalogo ma le alofa. E pei ona fautua mai Elder Ballard, “E leai se mea e sili atu le malosi nai lo le lima alofa lena e mafai ona opo maia i latou o loo tauivi.”⁵ “E tatau ona tatou vaai ia i latou . . . e ala atu i se vaaiga mai fofoga o le Tama Faalelagi,” na aoao mai ai Elder Dale G. Renlund o le Korama a Aposetolo e Toasefululuia.

“Ona faatoa mafai lea ona tatou lagonaina le popole tele o le Faaola mo i latou. . . . O lenei vaaiga lautele e matala ai o tatou loto i le le fiafia, fefe ma le lototiga o isi tagata.”⁶

Fesoasoani i mea moni. Afai o le tagata o loo tupu ai se faafitauli e aafia lona saogalemu ma mea autu e manaomia, ofo atu e saunia le fesoasoani faaletino, ae tuu atu i le tagata e filifili pe talia pe leai. Mo se faataitaiga, afai o se tagata ua fia pule i le ola ona ua leai se galuega, o le fesoasoani ia i latou e sue ni galuega e tuuina atu ai ia i latou avanoa e filifili mai ai ma fesoasoani e faasaoloto i latou mai le lagonaina o le le aoga.

Fesili i ai pe o mafaufau e pule i le ola. Afai o e popole o se tasi ua faavauvau ma ua faaalia faailoga lapatai o le pule i le ola, fesili i ai pe o latou mafaufau e pule i le ola. O le faia o lena mea e ono faigata, ae e sili le iloaina e ala i le fesili sao lava po o latou mafaufau e pule i le ola. E mafai foi ona tatala ai le faito-toa mo le tagata ia talanoa ai e uiga i o latou faafitauli ma popolega.

O faataitaiga o na fesili e ono faapea “E foliga mai ua tele naua na mea mo se tasi e taulimaina. Pe o e mafaufau e pule



i le ola?" po o le "Faatasi ai ma na tiga uma ua e oo i ai, o loo ou mafaufau pe o e fuafua e te pule i le ola." Afai latou te le o fia pule i le ola, atonu o le a latou tau atu ia te oe.

Afai e te lagonaina latou te le o talanoa mai e uiga i mafaufauga o le pule i le ola, faalatalata i uunaiga a le Agaga ia iloa ai le mea e fai. Atonu e uunaia oe ia tau lava o le nonofo ma i latou seja mafai ona latou talanoa sao atu ia te oe.

Nonofo ma le tagata ma saili se fesoasoani. Afai ua faailoa atu e se tasi ia te oe ua fia pule i le ola, nonofo ma le tagata ma tuu atu latou te talanoa ia te oe e uiga i mea o loo latou mafatia. Afai latou te talanoa e uiga i auala faapitoa ma le taimi mo le pule i le ola, fesoasoani i le tagata e faafesootai se telefoni o faalavelave po o se matagaluega o faalavelave faafuasei o mafaufau i le lotoifale.

Tali Atu i se Pule i le Ola

Pe latou te faaalia ni faailoga lapatai pe leai, o nisi tagata e pule lava i o latou ola. Afai ua

feagai ai ma le aafiaga matautia o le pule i le ola o se tasi e pele, e masani foi ona aafia tagata o loo feola o le aiga ma uo i le faavavau mamafa, loloto, ma le faigata. O nisi o auala e tali atu ai e ono aofia ai mea nei:

- Maasiasi ma se lagona le lelei
- Faateia ma le le talitonu
- Ita, mapu, po o le nofosala
- Nana le mafuaaga o le oti
- Faaesea mai tagata ma faaletonu ai fesootaiga i le aiga
- Ua pisi ma oo lava ina aafia i taimi uma i taumafaiga e puipuia le pule i le ola
- O se manaoga mamafatu ia malamalamai le mafuaaga
- Lagona o le tuuatoatasi ma le teenaina
- Tuuaia o le ua oti, o ia lava, isi, ma le Atua
- Faateleina o mafaufauga i le pule i le ola po o lagona o le faaleagaina o ia lava

- Faateleina le atuatuvalē i taimi o aso fiafia ma le atoaga o le tausaga o le malii⁷

O Mea e Mafai Ona Fai e Aiga o Feola ma Nuu

Aloese mai le faamasino. Ao avea le pule i le ola o se mataupu ogaoga, ua faamanatu mai foi e Elder Ballard ia i tatou: “O le mea moni, tatou te le iloa tulaga atoatoa e faatatau i tulaga uma o le pule i le ola. E na o le Alii e silafia itu uma, ma o ia lava foi lea o le a faamasinoina a tatou amioga i le lalolagi. A faamasinoina i tatou [e le Alii], ou te lagona o le a Ia iloiloina itu uma: o o tatou tulaga faakenera ma vailaau, o tatou tulaga faalemafaufau, o tatou gafatia faaleatamai, o aoaoga ua tatou mauaina, o uputuu a o tatou tamā, o tatou soifua maloloina, ma isi mea faapena.”⁸

Faatagaina ma faaalalo i le faagasologa faapitoa o le faavauvau o tagata taitasi. O le a faavauvau tagata i auala eseese, aua o la latou faia ma le ua malii e ese mai lava i isi tagata uma. O lea ia talia ai ma ava i le auala e aafia ai tagata taitoatas i le faavauvau.

A maliliu e pele ia i tatou, o lagona malolosi ma e mamafatu foi e mafai ona ufitiaina ai i tatou. Ae ui i lea, o le lagonaina o le faavauvau e le faapea ua leai ai se faatuatua. Na fetalai mai le Faaola, “Ia outou nonofa faatasi i le alofa, ia outou fetagisi ai i le toesea o i latou o e e otī” (MF&F 42:45). O le faavauvau o le faailoga o lo tatou alofa mo e pele ia i tatou ua maliliu ma le uiga o le faia ia i tatou.

Fesili atu mo se fesoasoani. Ao e faavauvau, e mafai ona lagonaina le mamafatu o mea. O le aapa atu mo se fesoasoani e mafai ona saunia ai avanoa paia mo isi e alolofa ai ma auauna ia i tatou. O le faatagaina o i latou e fesoasoani e mafai ona avea o se faamalologa ma le malosiaga e le gata mo oe ae faapea foi i latou.

Ia fesootai pea ma isi tagata. O isi tagata e faanoanoa faalilolilo ma e mafai i nisi taimi ona tuuatoatas, o lea ia fesootai ai pea ma ou aiga ma uo. Aapa atu i lea taimi ma lea taimi i ou aiga ua faavauvau, tausoga, ma uo, ma ofo atu le fesoasoani aua atonu latou te le o o mai ia te oe.

Faalagolago i le Faaola. I le iuga, o le Faaola lava o le punavai o le faamalologa ma le filemu. “O Lana Togiola . . . maua ai le avanoa e valaau atu ai ia te Ia o lē ua oo i o tatou vaivaiga uma faaletino ina ia faamaloloina i tatou ma tuu mai ia i tatou le malosi e lavātia ai avega o le olaga faaletino. Na te silafia o tatou tiga, ma o loo i ai o Ia iina mo i tatou. E pei foi o le Samaria agalelei, a Ia mauaina i tatou o

manunua i tafatafā ala, o le a Ia fusifusi i o tatou manua ma tausī i tatou (tagai i le Luka 10:34).”⁹

Ia tatou iloaina e manaomia uma lava ona tatou faalagolago atoatoa atu i le Alii o Iesu Keriso ma Lana Togiola ao tatou saili e fai la tatou vaega. I lena iloaina maualalo, sei tatou saili e malamalamā i o tatou aiga ma tuaoi o faavauvau, aapa atu ia i latou i le alofa, ma atiina ae faatasi se faatuatua ma se faalagolago sili atu i le Faaola, lea o le a toefoi mai ma “E soloieseia foi e le Atua loimata i o latou mata; e leai foi se toe otī, opo o se faanoanoa, po o se aue, e leai se toe puapuaga” (Faaaliga 21:4). ■

FAAMATALAGA

1. Kevin Hines, i le Amanda Bower, “A Survivor Talks About His Leap,” *Time*, Me 24, 2006, Time.com.
2. M. Russell Ballard, i le Jason Swenson, “Elder Ballard Offers Comfort and Counsel to Those Affected by Suicide,” *Church News*, Tes. 19, 2014, news.lds.org.
3. Tagai i le Faalapotopotoga o le Soifua Maloloina i le Lalolagi [WHO], *Preventing Suicide: A Global Imperative* (2014), 2.
4. Tagai i le M. David Rudd ma isi, “Warning Signs for Suicide: Theory, Research, and Clinical Applications,” *Suicide and Life-Threatening Behavior*, vol. 36, nu. 3 (2006), 255–62.
5. M. Russell Ballard, i le “Sitting on the Bench: Thoughts on Suicide Prevention” (video), lds.org/media-library.
6. Dale G. Renlund, “E Ala Atu i Fofoga o le Atua,” *Liahona*, Nov. 2015, 94.
7. Tagai i le John R. Jordan, “Is Suicide Bereavement Different? A Reassessment of the Literature,” *Suicide and Life-Threatening Behavior*, vol. 31, nu. 1 (2001), 91–102.
8. M. Russell Ballard, “Suicide: Some Things We Know, and Some We Do Not,” *Ensign*, Mati 1988, 8.
9. Dallin H. Oaks, “Faamalosia e Ala i le Togiola a Iesu Keriso,” *Liahona*, Nov. 2015, 64.

FAITAUGA FAUTUAINA

Jeffrey R. Holland, “Peiseai o se Ipu ua Nutililii,”

Liahona, Nov. 2013, 40–42.

Dieter F. Uchtdorf, “O le Faamoemoe i le Malama-

lāma o le Atua,” *Liahona*, Me 2013, 70–77.

Shayne M. Bowen, “Talu ai o loo Ola A’u, O Le a Ola
foi Outou,” *Liahona*, Nov. 2012, 15–17.

O Upu Faaperofeta. I SE Nofoaga sa Lei Mafaufauina

*O se mekasini sa tuulafoaia o le a
suia ai le olaga o Oscar Castro e
faavavaau.*

Saunia e Colette Lindahl

Ole aso na tuua ai e le ava a Oscar o ia ma le la fanau laiti e toalua, o se tasi o aso sili ona faigata o lona olaga. Sa anoanoai ni faaiuga sa manao-mia ona faia. Sa ia saili mo se galuega, ma o lea la ua ia manaomia se nofoaga fou e nofo ai. Sa foliga atu ia te ia ua faaleagaina lona olaga. Sa ia mafaufau ua lava ia lea, ma e semanu o le tulaga lava lea pe a na leai si ana fanau aulelei e toalua.

I San Juan, Atenitina, e le tele ni fale e maua e lisi atu i le ituaiga o tuge sa maua e Oscar. Ae sa i ai se tamai fale i se pitonuu saogalemu e lei leva ona tuua e se vaega o alii talavou, o lea sa nofolisi ai loa Oscar ma sauni ai e amata se olaga fou ma lana fanau.

I lo latou fale fou, sa taatitia solo ai ni mekasini ma ni tusi i luga o le fola, ma i le mavae ai o se aso atoa o faamama ma tuu ese mea sa maua ai, sa saofai ifo ai i lalo Oscar ma matamata i se tasi o mekasini. Sa maileia o ia e le itulau i fafo mo se mafuaaga. I lalo ifo o le ulutala, *Liahona*, sa i ai se ata o se toeaina matua o loo tu i luga o se olo ma saunoa atu i tagata. Sa faamanatu atu e lea tagata ia te ia ata o perofeta o le tusi paia.

Sa susue e Oscar le mekasini ma amata ona faitau, "Ua iloa uma e i tatou taitoatasi e tatau ona tatou tau atu i tagata tatou te alolofa i ai, tatou te alolofa ia i latou. Ae o mea ua tatou iloaina e le o taimi uma e atagia atu ai i mea tatou te

faia."¹ Sa mafaufau Oscar i upu malolosi sa feupuai ai i le tele o taimi i lo la va ma lona toalua. Sa ia manao e aoao lana fanau ina ia lelei atu nai lo lena. Sa faaauau pea ona faitau Oscar i le mekasini, ma amata ai ona ia lagonaina le tuputupu ae o le faamoemoe i lona loto. A o lei maea le vaiaso, ua uma ona ia faitauina tusiga uma ma manao ai ia iloa atili nisi mea.

I se masina mulimuli ane, sa savalia ai e ni faifeatalai se toalua le pitonuu a Oscar. Sa alu atu Oscar ia i laua ma fesili atu i ai pe o i laua o ni faifeatalai o le Au Paia o Aso e Gata Ai ma pe fia foi se tau e maua ai nisi mekasini faa-pena a le Ekalesia. Sa tau atu e faifeatalai ia te ia o le tau e na o le 20 minute lava o lona taimi.

O le aso na sosoo ai sa asiasi atu ai faifeatalai ia Oscar i lona fale. Sa faamatala atu i ai e Oscar lona masii atu ma maua ai tusi tuai, mekasini, ma tamaitusi ia na ala ai ona ia iloa e uiga i le Ekalesia. Sa ia faamatala atu o le tusiga muamua lava na ia faitauina sa fesootai tonu lava ma lona olaga i lea taimi. Ua ia iloaina nei le ttau o le aiga ma sa manao ai ia iloa atili e uiga i le afiafi faaleaiga ma le tatalo faaleaiga. Sa ia tau atu i faifeatalai isi mea ua ia aoaoina e uiga i le Ekalesia, e aofia ai Iosefa Samita ma le Toefuataiga o le talalelei.

Sa ia pulatoa atu i fofoga o faifeatalai ma faapea atu i upu e fia faalogo lava i ai faifeatalai uma: "Ou te



**Sa papatisoina
Oscar Castro ma faa-
mauina i le mavae
ai o le mauaina o se
lomiga o le konafesi
aoao i le Liahona i
totonu o le fale sa
ia masii atu i ai.**

talitonu o Iosefa Samita o se perofeta a le Atua.” Sa valaulia o ia e faifeautalai ia papatisoina, ma i loimata i ona fofoga, sa taliaina ai e Oscar. I ni nai vaiaso mulimuli ane, sa papatisoina ai Oscar Castro ma faamauina o se tagata o le Ekalesia.

Sa sauniaina e le Alii Oscar, ma sa salamo lona agaga ma saunia e aoao ma tuputupu ae. I lena aso le mafagaloina ma le faagaeetiaina, o le agaga o savali sa i ai i totonu o le lomiga o le konafesi aoao i le *Liahona* sa ootia ai le loto o Oscar. Sa lei iloaina e e na umiaina muamua lea fale le aafiaga o le a i ai i le tuua o ni nai mekasini a le Ekalesia, ae o savali o le talalelei i na mekasini na avea ma se meafaigaluega taua faafaifeautalai. I le taitaiina atu o ia i upumoni sa ia sailia, na latou suia ai le olaga o Oscar e faavavau. ■

*Sa nofo le tusitala i Atenitina a o auaua
atu lana tane o se peresitene o le misiona.*

FAAMATALAGA

1. David A. Bednar, “Ia Matua Maelega ma Mafaufau i le Aiga,” *Liahona*, Nov. 2009, 20.



**Saunia e Elder
Bradley D. Foster
O Le Fitugaafulu**



TALAFAA SOLOPITO O AIGA: FILEMU, PUIPUIGA, & FOLAFOLAGA



Ao auai lou aiga i le faapotopotoina o faamau-mauga, o le faamalologa o loto, ma le faamauina o tagata o le aiga, o le a faamanuiaina e faavavau ma faavavau ai lava oe ma lau fanau.

Ole tala i Le Ekalesia a Iesu Keriso o le Au Paia o Aso e Gata Ai o se tala e uiga i aiga. Pe a ou fai atu *aiga*, ou te le o faapea atu o la tatou vaaiga i aso nei o le Tina, Tama, ma le fanau.

Ou te faaaogaina le faaupuga e pei ona faaaogaina e le Alii, o se upu tutusa mo le *auaiga* po o *aiga i tupulaga e tele*, aua e tofu tagata uma ma se aiga. O le fuafuaga a lo tatou Tama Faalelagi mo Lana fanau e totonugalemu i lenei ituaiga o aiga—ma fanau e maua mai le malosi mai tuaa i le tele o augatupulaga ua tuanai ma matua o e saili e faamanuia a latou fanau mo tupulaga a sau.

I lenei tulaga ua faamatala mai ai foi e le Tusi a Mamona tala o aiga. Ao tatou faitau i nei tala, tatou te iloa ai e lei suia tele lava aiga mai na seneturi ua tuanai. E oo lava ia i latou na soifua i nisi taimi ma nofoaga ua tele lava ina pei o tatou—ma o le finagalo o le Atua mo Lana fanau ia ola fiafia, i ni aiga e faavavau e lei suia lava.

Aisea na faasaoina ai e le Alii faamaumauga o nei tala? O a mea na finagalo o Ia tatou te aoao mai ai? Pe o i ai ni lesona e mafai ona fesoasoani ia i tatou ia tatou taumafaiga e faapotopoto, faamalolo, ma faamau o tatou aiga?

O Se Lesona mai ia Liae

Ou te talitonu o le aiga muamua i le Tusi a Mamona—le aiga o Liae—ua i ai se lesona mamana mo i tatou atonu tatou te lei iloaina. E mafai e le aiga o Liae ona aoaoina i tatou i mea e tele e uiga i talafaamaumau o aiga—pe aisea ua taua ai i le Alii ma aisea e tatau ai ona taua ia i tatou.

Ina ua amata le tala, o loo tausia e Liae ma Sarai o la afafine ma atalii e toafa i Ierusalema, o ola ai i se olaga fiafia naua i lena aai tele. Na suia o latou olaga e faavavau ina ua poloaiina e le Alii Liae e ave lona aiga i le vao.

Na usiusitai Liae, ma na tuua e ia ma lona aiga a latou mea totino ma malaga ese atu i le vao. Ina ua mavae ona malaga mo

sina taimi, na fai atu Liae i lona atalii o Nifae:

"Faauta, sa ou miti se miti, na poloaina ai au e le Alii, ia e *foi* atu ma ou uso i Ierusalem.

"Aua faauta, o loo i ai ia Lapana talafaa-maumau o tagata Iutaia ma le gafa foi o ou muātuaa, ma ua togitogia i luga o papatusi apamemea" (1 Nifae 3:2–3; ua faaopoopo le faamamafa).

Ona o lenei poloaiga, ua faamanuiaina o tatou aiga i le folafolaga maoae lenei o le faatuatua ma le usiusitai mai ia Nifae: "O le a ou alu ma fai mea ua poloaiina e le Alii, aua ua ou iloa e le tuuina mai e le Alii ni poloaiga i le fanauga a tagata, vagana o le a saunia e ia se ala mo i latou ina ia mafai ai ona latou faataunuina o le mea ua ia poloaiina ai i latou" (1 Nifae 3:7).

O papatusi apamemea o se talafaa-maumau. Na i ai tusitusiga paia, ae na i ai foi le talafaaasolopito o le aiga o Liae. Na silafia e le Alii le taua tele o le faasaoina o na talafaa-maumau mo le tele o tupulaga i le lumanai.

Pe na e mafaufau ea pe aisea na le poloaiina ai e le Alii Liae, nai lo ona atalii, e toe foi mo talafaa-maumau? O ia o le peteriaka o le aiga. Na tuuina atu e le Alii ia te *ia* le faaaliga. Pe le tele atu ea se faatosinaga a Liae ia Lapana nai lo ona atalii?

Tatou te le iloa pe aisea na poloaiina ai e le Alii atalii o Liae e toe foi i Ierusalem, ae ua tatou iloa na latou tauivi ia faataunu le mea na finagalo le Alii latou te faia. Na fai-gata le galuega, ma na tofotofoina ai lo latou faatuatua. Na latou aoaoina ni lesona taua ia na aoga lelei ia i latou i la latou malaga i le vao. Atonu o le mea sili ona taua, sa latou aoaoina ai faapea a poloai mai le Alii, Na te saunia moni lava se ala.

E mafai ona tatou fesili ia i tatou lava, o a mea e finagalo le Alii e aoao e o tatou atalii ma afafine pe a latou "toe foi" e aumai a tatou talafaa-maumau o aiga? Ua faapefea ona ia saunia se ala mo i latou? Pe o i ai ni aafiaga e finagalo o ia ia latou maua? Pe o tatou valaaulia i latou ia maua nei aafiaga? O a faamanuiaga o faamoemoe o ia e tuuina atu i o outou atalii ma afafine e ala i le auaunaga o le malumalu ma talafaa-solopito o aiga?



*Na finagalo le
Alii ia maua e le
aiga o Liae nei
talafaa-maumau.
Na latou tuuina
atu i ona tupu-
aga se lagona o
le faasinomaga.*

Ina ua toe foi mai Nifae ma ona uso i le faleie o lo latou tama, "sa ave e lou tamā, o Liae, talafaa-maumau sa togitogia i luga o papatusi apamemea, ma suesue i ai o ia mai i le amataga." O iina na ia maua ai "tusi e lima a Mose," "o valoaga foi a perofeta paia," ma "se gafa o ona tamā; o le mea lea na iloa ai e ia o ia o se e tupuga mai ia Iosefa . . . o le na faatau atu i Aikupito." Ma ina ua "vaai [Liae] i nei mea uma, sa tumu o ia i le Agaga" (1 Nifae 5:10, 11, 13, 14, 17).

Ona aoaoina lea e Liae lona aiga i mea na ia aoaoina mai i papatusi apamemea. Atonu e te faapea mai o lona faleie na avea o se nofoaga autu o talafaa-solopito o aiga ma le aoaoina—e pei lava ona tatau ona i ai o tatou aiga.

E faigofie ona vaai pe aisea na finagalo ai le Alii ia maua e le aiga o Liae nei talafaa-maumau. Na latou tuuina atu i ona tupuaga se lagona po o ai i latou, ma fesootai atu ai i latou i ni peteriaka faamaoni o le taimi ua tuanai ma totoina ai i o latou loto "folafolaga na faia i tama" (MF&F 2:2; Iosefa Samita—Talafaa-solopito 1:39). O nei talafaa-maumau

na taua tele i le faatuatua o tupulaga e lei fananau mai lea na lapataiina ai e le Agaga Nifae faapea a aunoa ma talafaa-maumau, e "fano se atunu [atoa] i le lē talitonu (1 Nifae 4:13).

O le aafiaga o nisi tagata i le Tusi a Mamona ua faa-alia ai le moni faapea a leiloloa talafaa-maumau, ua leiloa le upumoni, ma o taunuuga mo tupulaga i le lumanai e mafai ona matautia.

O sa Moleka na tuua Ierusalem i le vaitaimi lava lea e tasi e pei o le aiga o Liae. Ae e le pei o le aiga o Liae, "latou te lei aumaia ni talafaa-maumau faatasi ma i latou." E oo atu i le taimi na maua ai e Mosaea i latou e tusa ma le 400 tausaga mulimuli ane, "sa lē toe manino la latou gagana; . . . ma sa latou teena le i ai o lo latou Foafoa" (Ominae 1:17). Na latou leiloa lo latou faasinomaga o ni tagata o le feagaiga.

Na aoaoina sa Moleka e Mosaea i lana gagana ina ia mafai ona latou aoao mai talafaa-maumau na ia te ia. O se taunuuga, na i ai se suiga o sa Moleka mai se nuu pua-puagatia, le talitonu i se Atua, i se nuu na malamalamia i le fuafuaga a le Atua o le fiafia mo i latou—ma o latou aiga.

Toefoi ma Lou Aiga

O le malamalamā po o ai i tatou i le faiā ma le Atua ma le tasi i le isi e suia ai le ala tatou te mafaufau ai, amio ai, ma taulimaina ai isi. O talafaamaumau o se vaega taua tele o lo tatou faasinomaga ma le vaaiga. O le toe tepa i tua e saunia ai i tatou e agai i luma.

Matua, pe ua outou valaaulia o outou aiga e “toefoi”? Pe ua tuuveseesea ea lou aiga mai a latou talafaamaumau—pe mai le tasi ma le isi—i se tasi ala po o se isi? Pe ua motusia ea le sootaga a lou aiga i le va o le taimi nei ma le tuanai? O le a le mea na tupu i le talafaasolopito o lou aiga na mafua ai lenei tuuveseeseina? Pe o femalagaaiga, feteenaiga i le aiga, liua i le talalelei, pe pau lava o aluga o le taimi? Na e aapa atu talu ai nei e saili ou tuaa i le FamilySearch.org?

Na faataapeapeina le aiga o Isaraelu, ma i le tele o ala lea e aofia ai le faataapeapeina o o tatou aiga ma talafaamaumau. O lo tatou tiutetauave o le faapotopotoina mai o i latou, i le mea o manaomia ai, e faamaloloina manua o le tuuveseeseina. Ao tatou saili ma le filiga e liliu loto o a tatou fanau i o latou tama, o le a liliu atu foi o tatou loto ia tatou fanau¹ ma o le a tatou iloaina ai faatasi le filemu ma le faamalogaga lena e oo mai ona o lenei galuega (tagai i le MF&F 98:16).

E pei lava ona auina atu e Liae ona atalii e toefoi i Ierusalem mo talafaamaumau paia, ia tatou auina atu a tatou fanau e toefoi mo a tatou talafaamaumau o aiga. E pei lava ona saunia e le Alii le ala mo Nifae, ua Ia saunia le Initoneti ma isi tekinolosi lea o le a mafai ai e a tatou fanau ona faapotopoto mai ma faamalolo o tatou aiga. Ma ua Ia saunia malumalu e mafai ai ona tatou ave i ai igoa tatou te mauaina ma faatumauina la tatou faapotopotoina e ala i sauniga faamau.

Olioli i le Vaomatua

Ina ua ma faaipoipo ma lou toalua, o Sharol, na ma filifili o le a faia se ma fanau tama e toafa. Na ese le fuafuaga a le Alii. Na Ia foai mai ia i maua ni fanau teine se toafa.

Na matou faiimalaga ma le ma fanau teine i le vaomatua. O lenei ua latou faaipoipo ma maua ni fanau ma o loo fai-malaga i o latou lava foi vaomatua. Pe na faigofie mea uma i le ala? Leai. Na i ai so matou sao i le muimui, ma na i ai le tele o tauiviga.

O le olaga i le vaomatua e mafai ona faigata i aiga. Pe a fesili mai tagata, “O faapefea mai oe ma lou aiga?” E masani ona ou fai atu, “O loo matou i le va o faigata i le taimi nei. Faafetai mo le fesili mai.”

Ae e i ai foi taimi o le olioli moni i le ala. I le avea ai ma pteriaka ma tina, ma te faaaluina le tele o taimi e faamalolosia ai la ma fanau mo le vaomatua. Ua folafola mai e perofeta i o tatou aso o talafaasolopito o aiga o le a “puipua [oe] mai le uunaiga faateleina a le tiapolo”² ma o se liua “loloto ma mausali” i le Faaola.³ Oka o se ala mamana e faapotopoto ai, faamalolo, ma faamau ai o tatou aiga.

I le avea ai ma pteriaka o lo matou aiga, na ou fesili i ou afafine e “toefoi” e *saili* talafaamaumau, *ave* igoa i le malumalu, ma *aoao* a ma fanau a fanau. Sa ou talosagaina i latou ina ia faamasani po o ai na latou tupuga mai e ala i le auai i la matou talafaasolopito o aiga.

O Se Folafolaga

Ou te folafola atu ao outou valaauliaina a outou fanau e “toefoi” ma saili mai talafaamaumau o o outou aiga, o le a outou “matuai olioli [faatasij] lava” e pei o Liae ma Sarai ma avatu “le faafetai i le Atua o Israelu.” Ao outou suesue ia outou talafaamaumau, o le a “tumu [outou] i le Agaga,” aua o le a outou iloa ai “[ua] manaomia i latou; ioe ua aoga tele lava.” Ma o le a outou iloa ai “o le poto sa i le Alii sa tatau ai ona [outou] ave o nei papatusi faatasi ma [outou] ao outou malaga “i le vao agai i lo [outou] lauelele o le folafolaga” (1 Nifae 5:9, 17, 21–22).

Ua i ai le Ekalesia iinei e lagolago ma faamalosia lou aiga i lenei faigamalaga. Ou te folafola atu ao auai lou aiga i le faapotopotoina o talafaamaumau, le faamaloloina o loto, ma le faamauina o tagata o aiga, o le a faamanuiaina oe ma lau fanau—lou aiga—e faavavau ma faavavau lava. ■

Mai se lauga, “Gathering, Healing, and Sealing Families,” na tuuina atu i le RootsTech Family History Conference i le Aai o Sate Leki, Iuta, ISA, i le aso 14 Fepuari 2015.

FAAMATALAGA

1. Mo faataitaiga o le ala na aumaia ai e talafaamaumau na maua i papatusi apamemea le faamalogaga i le fanau a Liae, tagai i le Alema 37:8–10.
2. Richard G. Scott, “O Le Olioli i le Faaolaina o e ua Maliliu,” *Liahona*, Nov. 2012, 94.
3. David A. Bednar, “O Le a Liliu Atu Loto o Fanau i o Latou Tama,” *Liahona*, Nov. 2011, 24.



FAAOPOOPOGA I LE INITONETI

Ua folafola atu e Apostolo e toalua faamanuiaga i le autalavou e auai i le auaunaga o talafaasolopito o aiga ma le malumalu. Kopi le QR faailo lenei pe asiasi i le lds.org/go/1016000 e matamata ai i le vitio i le Faaperetania.



Alofa PO O LE TUINANAU

Saunia e Joshua J. Perkey

Mekasini a le Ekalesia

TUINANAU.

E mautinoa lava o se upu mataga. O le toatele o i tatou e le fia mananao e mafaufau i ai, ma e mautinoa lava e le fia aoao e uiga i ai. O le upu e faaosofia ai se lagona le mama, se mea leaga—e faatosina ae sese.

O loo i ai se mafuaaga lelei mo lena mea. Afai “o le manao i tupe o le pogai lea o mea leaga uma lava” (1 Timoteo 6:10), ona mautinoa lava lea o le tuinanau o lana uo faalilolilo. E le mama ma e faataumaoi. O le tuinanau e sua tagata, mea, ma e oo lava i manatu i ni mea faitino e umiaina pe fia maua mai e faamalieina ai se manaoga. Ae afai ua tatou iloaina lena mea, aisea tatou te mananao ai ia iloa atili e uiga i ai?

Aua afai e mafai ona tatou malamalama lelei po o le a moni lava le uiga o le tuinanau, e mafai ona tatou aoao pe faapefea ona mamanuina o tatou mafaufauga, lagona, ma faatinoga ina ia mafai ona tatou aloese ma manumalo ai i ona faatinoga. O lenei mea o le a taitaiina atu i tatou i se fesootaiga vavalalata ma le Agaga Paia, lea e faamamaina o tatou mafaufauga ma faamoemoega ma faamalosia i tatou. Ma o le a taitai atu ai i se olaga e sili atu le fiafia, filemu, ma le olioli.

Faamatalaina o le Tuinanau

Tatou te matele ina mafaufau muamua lava faapea o le tuinanau o le i ai lea o ni lagona le talafeagai ma malolosi o le tosina atu faaletino i se isi tagata, ae e mafai foi ona tuinanau atu pe manaonao i soo se mea lava: tupe, mea totino, mea faitino, ma, ioe, o

AFAI E MAFAI ONA TATOU
MALAMALAMA LELEI PO O
LE A LE UIGA MONI LAVA O
LE TUINANAU, E MAFAI ONA
TATOU AOAO PE FAAPEFEA
ONA ALOESE AI MA FAIA
FILIFILIGA IA FAALATALATA
ATILI ATU AI I TATOU I LE
AGAGA PAIA.



FAAMATALAINA O LE ALOFA MA LE TUINANAU

O le Alofa e taualoa; o le tuinanau e faavaivaia. O le alofa e aumaia le upumoni; o le tuinanau e aumaia pepelo. O le alofa e atina ae ma faamalosia; o le tuinanau e faatamaia ma faavaivaia. O le alofa e logomalie; o le tuinanau e le malie. O le alofa e aumaia le filemu; o le tuinanau e aumaia le feteenaiga. O le alofa e musuia; o le tuinanau e fasiotia. O le alofa e faamaloloina; o le tuinanau e faavaivaia. O le alofa e faamalosia; o le tuinanau e talepeina. O le alofa e faamalamalamaina; o le tuinanau e faapogisaina. O le alofa e faatumuina ma faatumauina; o le tuinanau e le faamalina. O le alofa e fesootai moni lava ma folafolaga; o le tuinanau e nonofo ma le faamaualuga.

isi tagata (tagai i le Taiala i Tusitusiga Paia, "Tuinanau").

O le tuinanau e faamalosia se tagata e saili ia maua mai se mea lena e feteenai i le finagalo o le Atua. E aofia ai soo se lagona po o se manao lena e uunaia ai se tagata ia taulai atu i mea o le lalolagi po o ni faiga manatu faapito—mea patino e fiafia i ai, manaoga, fiafaga, ma le fiafia i meaai—nai lo le tausia o poloaiga a le Atua.

I se isi faaupuga, o le manao i mea e feteenai i le finagalo o le Atua po o le manao ia maua mea i se ala e feteenai i Lona finagalo o le tuinanau lea, ma e taitai atu ai i le le fiafia.¹

O Le Matautia o le Tuinanau Faalefeusuaigna

E ui lava ua uma ona lapataina i tatou agai i le tuinanau o se ituaga o manaoga lautele, i lona tulaga faalefeusuaigna o le tuinanau e faapitoa lava le matautia. Na lapatai mai le Faaola: "Ai se vaai atu i le fafine ina ia manao i ai, ua uma ona mulilua ma ia i lona loto." (Mataio 5:28).

Na lapatai soo mai aposetolo ana-mua e faasaga i le tuinanau i lenei tusiga. I le avea ai na o se faataitaiga se tasi, na tau mai e le Aposetolo o Ioane faapea, "Aua o mea uma lava o i le lalolagi, o le tuinanau o le tino, ma le tuinanau o mata, ma le faalia-ilia o lenei olaga, e le mai le Tama ia, ae mai le lalolagi" (1 Ioane 2:16; tagai foi i le fuaiupu 17; Roma 13:14; 1 Peteru 2:11).

Ma o loo faaaauau pea lapataiga i le aso.² Ua faamatala mai e Elder Jeffrey R. Holland o le Korama a Aposetolo e Toasefululu faapea: "Aisea ua avea ai le tuinanau ma se agasala matautia? Ia, e faaopoopo atu i le

faatamaiaina o o tatou agaga e ala i le tulieseina o le Agaga, ae ou te manatu o se agasala aua na te faaleagaina le sootaga aupito mauluga ma sili ona paia ua tuuina mai e le Atua ia i tatou i le olaga nei—o le alofa o se alii ma se tamaitai i le tasi ma le isi, ma le nau-nau o le ulugalii e aumai ni fanau i se aiga ua faamoemoe ina ia faavavau."³

O le faatagaina o le manao faaletu-nanau e faatupulaia ua avea ma amata-ga o le tele o faatinoga o le agasala. O le mea na amata i le na o se vaai atu lava e foliga e mama e mafai ona tuputupu ae ma avea ma se le faama-oni le mama faatasi ai ma ona tau-nuuga matautia uma. E mafua ona o le tuinanau e tuleieseina le Agaga Paia ma tuua ai i tatou ua vaivai i isi faaososoga ma agasala ma mailei a le fili.

O filifiliga matautia a le Tupu o Tavita o ni faataitaiga faanoanoa ia i le malosi tele ma le ogaoga e mafai ona oo i ai lenei lagona. Na vaai atu Tavita ia Patisepa o taele ma na tuinanau atu ia te ia. O le tuinanau na manao ai ina ia faatino, ma na ia aumaia o ia ma la momoe. Ma, i se taumafaiga sese ia nanaina lana agasala, na poloaiina ai e Tavita le toalua o Patisepa ia tuuina i le taua i se nofoaga e mautinoa ai le fasiotia (tagai i le 2 Samuelu 11). O le taunuuga, na le maua e Tavita lona faaeaga (tagai i le MF&F 132:38–39).

Atonu e foliga matuia le tulaga o Tavita, ae ua mautinoa lava le faa-maonia ai o le autu: o le tuinanau o se faaososoga matautia. O le toilalo ai e mafai ona tatou faia ai ni mea e le mafai ona faia e se tasi e sao le mafaufau. O le mea moni faapea e matautia lava, e faigofie ona faaosofia, ma e malosi tele i le faaososoina o i tatou e liliu ese mai le Agaga Paia ma





O le tuinanau e aofia ai soo se lagona po o se manao lena e uunaia se tagata e taulai atu i mea o le lalolagi po o faiga manatu faapito nai lo le tausia o poloaiga o le Atua.

uunaia lo tatou manao ia faia se mea e faasa ua atili ai le sili atu ona matautia. E mafai ona faaosofia i le matamata i ata leaga, faalogologo i musika le lelei, po o le faia o amioaga militino le tatau. O le taimi lava lea, e mafai ai e lagona faaletuinanau ona uunaia se tagata e saili ata leaga. O lenei fesootaiga faifai soo e matuai matautia lava ma matuia.⁴

O le tuinanau o se natura taufeusuiga e faaleagaina ma faavavaia ai fesootaiga uma lava, o se tasi e sili le taua o le fesootaiga patino lea a se tasi ma le Atua. “Ma e moni Ou te fai atu ia te outou, e pei ona Ou fai atu muamua, o ia o lē e vaai atu i se fafine i le manao i ai, pe afai e mulilulua ni isi i o latou loto, o le a latou lē maua le Agaga, ae o le a latou faafitia le faatuatuaga ma o le a matata’u” (MF&F 63:16).

E pei ona aoao mai Elder Richard G. Scott (1928–2015) o le Korama a Aposetolo e Toasefululu, “O feusuiga le mama e tulai mai ai se pa pupuni i faatosinaga a le Agaga Paia ma avanoa lelei uma e siitia ma faamalamalmaina ai. O feusuiga le mama e mafua mai ai lagona malolosi faaletino ma faalogona taufaaoso. E i ai taimi na te faatupuina ai se lagona faatosina e taaina atu ai le ua solitulafono i se agasala sili atu.”⁵

O Le Mea E Le O Le Tuinanau

O le mafaufau ai po o le a *le* tuinanau, ae e taua foi le malamalama po o le a le mea e *le* o le tuinanau ma ia faaeteete e aua le faailogaina mafaufauga, lagona, ma

manaoga tatau o se tuinanau. O le tuinanau o se *ituaiga o manao, ae e i ai foi manaoga amiontonu*. Mo se faataitaiga, e mafai ona tatou mananao i mea e lelei ma tatau na o le a fesoasoani e faataunuu ai le galuega a le Alii.

Mafaufau e uiga:

- **I le manao ia maua se tipe.** O le manao lava ia, o le manao i se tipe e le leaga. E lei faapea mai Paulo o le *tupe* o le pogai o mea leaga uma. Na ia faapea mai, “o le *manao i tipe* o le pogai lea o mea leaga uma” (1 Timoteo 6:10; faaopoopo le faamamafa). O aoaoga a Iakopo ua faaopoopoina nisi faamatatalaga: “ae tou te lei saili mo le oa, ia outou saili mo le malo o le Atua. Ma pe a uma ona outou maua o se faamoemoe ia Keriso o le a outou maua oa, pe afai tou te sailia, ma ia outou saili e fai ai mea lelei—e faaoofu ai e ua le lavalava, ma fafaga ai e ua fia aai, ma faasaoloto e ua faatagataotauaina, ma avatu ai le fesoasoani i e ua mamai ma puapuagatia” (Iakopo 2:18–19).
- **O le i ai o lagona tatau faalefeusuai i lou toalua.** O na lagona na tuuina mai e le Atua e fesoasoani e faamalosia ai, faamausaliina ai, ma lotogatasi ai se faaipoipoga. Ae e mafai ona i ai lagona le tatau i se toalua. Afai tatou te saili le faataunuuina mo na o i tatou lava, pe na ona faamalieina ai o tatou lava manaoga po o lagona, e mafai ona tatou see atu



Ona ua tuuina mai e le Tama Faalelagi ia i tatou le faitalia, ua ia i tatou le malosiaga i o tatou mafaufauga, lagona, ma faatinoga.

i ni manaoga faaletuinanau, ma e mafai ona faatamaia ai se sootaga faalefaaipoipoga. O le ki i le sailia ma le faatumauina o sootaga vavalalata faaletino e talafeagai i se faaipoipoga o le i ai lea o se faamoemoega mama ma le alofa.

O le mataupu faavae taua o le sailia lea o mea mo le faamoemoega sao—o le fausia o le malo o le Atua ma le faateleina o le lelei i le lalolagi. I le isi itu, o le tuinanau e uunaia i tatou e o ese mai tuaoi talafeagai, ma faamaasi i ai e o tatou manaoga le Atua, tetee i tagata, ma faaliliuina mea faitino, oa, ma e oo lava i le mana i mea leaga lea e faaleagaina ma faatamaia a tatou mafutaga.

O Le Mafuaaga Tatou te Vaivai Soo ai i le Tuinanau

I le tuuina mai o le mafuaaga ua faataumaoi ai ma matautia le tuinanau, aisea la ua matuai faaosooosoina ai ma taatele ai? Aisea ua tatou tuu atu soo ai na te faatoilalo i tatou? I le itu i fafo, atonu e foliga mai o le manatu faapito po o le leai o se loto pulea o le autu tonu lea o le tuinanau. O mea moni na e aofia ai, ae o le pogai moni lava o le tuinanau e masani lava o le leai o se faamoemoe. Atonu e gauai atu tagata i le tuinanau i se taumafaiga le manuia e faatumu se avanoa i lo latou olaga. O le tuinanau o se lagona pepelo, o se suitulaga le lelei mo le alofa

moni, tulaga faatauaina moni, ma le faatumauina o le avea ma soo.

O le puleaina lelei faalelagona, i se tasi itu, o se tulaga o le loto. “Aua e pei ona manatu o ia i lona loto, ua faapea lava o ia” (Faataoto 23:7). Po o fea lava tatou te tuu i ai lo tatou taulai faalemaufau ma le faaleagaga o le a iu lava ina avea ma uunaiga malosi i o tatou mafaufau, lagona ma faatinoga. Soo se taimi lava tatou te lagonaina ai i tatou lava ua faaosooosoina i le tuinanau, tatou te manaomia ia suia lena faaosooosoga i se mea e sili atu le talafeagai.

O le paie e mafai foi ona mafua ai mafaufauga tuinanau. Afai e le tele ni mea o faaalu ai o tatou taimi, o le a sili atu ona lamatia i tatou i faatosinaga leaga. Ao tatou saili ma le malosi ia auai ma le naunautai i faamoemoega lelei (tagai i le MF&F 58:27) ma tauivi e faaaoga lelei lo tatou taimi, o le a faaititia lo tatou gauai atu i mafaufauga tuinanau po o isi uunaiga le lelei.

E pei ona faamatalaina e Elder Dallin H. Oaks o le Korama a Aposetolo e Toasefululua, o manaoga tatou te filifilia e pipii i ai e le gata e aafia ai a tatou faatinoga ae po o ai foi e iu ina avea ai i tatou: “E faaleoina e manao mea tatou te faamuamua, e fatuina e mea e faamuamua a tatou filifiliga, ma o filifiliga e iloa ai a tatou amioga. O manaoga tatou te faatinoina e iloa ai o tatou suiga, o mea ua tatou ausia ma tagata e avea ai i tatou.”⁶

I se isi faaupuga, e tatou ona tatou puipuia e le gata o lagona tatou te faatagaina i tatou lava e faatinoina ae faapena foi mafaufauga na e vave mai pe mafua mai i na lagona. E pei ona aoao mai Alema, afai e le mama o tatou mafaufauga, “o le a tausala-inia foi i tatou i o tatou mafaufauga” (Alema 12:14).

O Le Fofo: Alofa FaaKeriso

O le tuinanau e le faapea e le maalofia. Ona ua tuuina mai e le Tama Faalelagi ia i tatou le fatalia, e i ai lo tatou malosiaga i o tatou mafaufauga, lagona, ma faatinoga. E le tatou ona tatou mulimuli atu i mafaufauga ma lagona tuinanau. Pe a aliae ni faaososoga, e mafai ona tatou filifili e aua nei faafiafaina na mafaufauga ma lagona tuinanau.

E faapefea ona tatou faatoilaloina le faaososoga e tuinanau? Tatou te amata i le atiina ae o se sootaga lelei ma lo tatou Tama Faalelagi ma filifili e auauna atu i isi. Ma tatou auai i amioga faalelotu i aso uma, e aofia ai le tatalo ma le suesue i tusitusiga paia, lea e valaaulia le Agaga Paia i o tatou olaga. I le iuga, o le fua faalilolilo o le alofa FaaKeriso lea—le alofa mama, faamaoni, alofa moni, ma se manao e fausia le malo o le Atua ma le manatu tasi i Lona mamalu. E faatoa maua lena alofa pe a tatou maua le mafu-taga a le Agaga Paia.

O le aveesea o le tuinanau e manao-mia ai le tatalo ma le loto lea tatou te ole atu ai i le Atua e aveese na lagona ma saunia, e suitulaga ai, le alofa mama (tagai i le Moronae 7:48). E mafai lenei mea, e pei lava o le salamo i soo se mea, e ala i le alofa mutimutivale o le Togiola a Iesu Keriso.⁷ Ona o

Ia, e mafai ai ona tatou aoao e alolofa i le ala na alofa mai ai o Ia ma le Tama Faalelagi ia i tatou.

A faaauau pea ona tatou taulai atu i lo tatou Tama Faalelagi, a tatou ola e tusa ai ma le poloaiga e sili muamua ma le lona lua—ia alolofa i le Atua ma o tatou tuaoi e pei o i tatou lava (tagai i le Mataio 22:36–39)—ma pe a tatou faia mea uma e mafai ona tatou faia e ola ai e pei ona Ia aoao mai, e uunaia o tatou olaga e faamoemoega mama ma faamaoni i se malosiaga e sili atu. Ao tatou tuufatasia lo tatou manao ma le finagalo o le Tama, e faaitiitaa faaososoga ma aafiaga o le tuinanau, ae suia i le alofa mama o Keriso. Ona faatumuina lea o i tatou i le alofa mamana lena e suia manaoga leaga o lenei lalolagi i le matagofie o le fausiaina o le malo o le Atua. ■

FAAMATALAGA

1. Tagai i le Dallin H. Oaks, “O Le Olioli ma le Alofa Mutimutivale,” *Liahona*, Ian. 1992, 86; ma le Thomas S. Monson, “Finishers Wanted,” *Ensign*, Julai 1972, 69.
2. Mo na oni nai faataitaiga, tagai i le Mataupu Faavae ma Feagaiga 88:121; Spencer W. Kimball, “President Kimball Speaks Out on Morality,” *Ensign*, Nov. 1980, 94–98; Neal A. Maxwell, “O Le Poloaiga Lona Fitu: O Se Talipupuni,” *Liahona*, Ian. 2002, 90–93; Russell M. Nelson, “O I Fea Ea le Poto?” *Liahona*, Ian. 1993, 6–8. Mo nisi lapataiga faaletusitisiga paia i le tuinanau, iloilo autu nei i le Taiala i Tusitusiga Paia: Mulilua; Faaletino; Alofa; Manao; Faitaaga; Homosensualia; Tuinanau; Faaletino, Olaga Faaletino; Gaoia i Feuiaiga.
3. Jeffrey R. Holland, “Ia Lē Toe Ulu Mai I Lo’u Agaga Lē Ita Mai ia te Au,” *Liahona*, Me 2010, 44–45.
4. Mo nisi faamatalaga i lenei autu, tagai i le Dallin H. Oaks, “Faamaloloina mai le Mailei o Ponokalafi,” *Liahona*, Oke. 2015, 50.
5. Richard G. Scott, “O Le Faia o Filifiliga Sa’o,” *Liahona*, Ian. 1995, 44.
6. Dallin H. Oaks, “Manao,” *Liahona*, Me 2011, 42.
7. Tagai, mo se faataitaiga i le D. Todd Christofferson, “O Le Meaalofa Paia o le Salamo,” *Liahona*, Nov. 2011, 38–41.

O FAUTUAGA E LIMA MO SE OLAGA MAMA

Ua tuuina mai e Elder Jeffrey R. Holland ni fautuaga se lima i le ala e toe maua ai ma faatumauina ai se olaga mama:

1. Amata i lou alu ese mai tagata, tusi, ma tulaga o le a faatamaia ai oe.
2. Saili se fesoasoani.
3. Atiina ae ma faaaoga le loto pulea e faaitiitaa ai faatosinaga leaga.
4. Suitulaga mafaufauga leaga i ata e maua ai faamoemoega lelei ma manatuaga fiafia.
5. Ia atiina ae ma ia i ai i le mea e i ai le Agaga o le Alii.

Mai le “Ia Lē Toe Ulu Mai I Lo’u Agaga Lē Ita Mai ia te Au,” *Liahona*, Me 2010, 44–46.



AUAUNA ATU i Talaatu o Ioritana

Pe po o fea lava se mea e manaomia ai oe e le Aili.

Saunia e R. Val Johnson ma Rachel Coleman

Auaunaga o Mekasini a le Ekalesia ma le Lolomiga
ma le Tufatufaga

Na tele naua le manaomia. I le amataga o le 2013, e toalima tagata na mamai i le misela ia na i ai i le tolauapiga a tagata sulufai i Zaatari i le atunu Tutotonu i Sasae o Ioritana. Na silia ma le 100,000 tagata sulufai Suria, na nonofo i ni nofoaga ua ova le toatele, na lamatia i le mauaina i lenei vairasi e vave le pipisi, ma matautia. Na fuafua e le malo o Ioritana se taumafaiga tele maoae o tuipuipui e taofia ai le faamai mai le pipisi atu. O le fuafuaga o le faia lea o tuipuipui o le aofai e le itiiti ifo ma le 90,000 tagata sulufai Suria e i le va o le 6 masina ma le 30 tausaga i totonus o le periota e lua vайасо.

Ae sa i ai se faafitauli. O le vailaaus i ai i lea i le United Nations Children's Emergency Fund (UNICEF). O le Matagaluega o le Soifua Maloloina o Ioritana sa i ai falemai. O mea latou te lei mauaina o sapalai o mea ia e teuina ma auina mai i totonus o pusaaisa—o tui, pusa e tuu ai meafaigaluega maamaai, kula o vailaaus—ma ua utiuti le taimi.¹

Ona o mai ai lea o Ron ma Sandi Hammond, o faifeautalai matutua a le uelefea na auauna atu o ni faatonu o le atunu i Ioritana mo le Auaunaga Limafoai a le AAG. Ona o Ron ma Sandi ua masani ona

galulue ma le Malo Aufaatasi o le UNICEF ma le Matagaluega o le Soifua Maloloina, na vave lava ona auai i le galuega tuufaatasi i le va o nei faalapotopotoga e fuafua pe faapefea ona fesoasoani le Auaunaga Limafoai a le AAG.

Fai mai Ron, “Na matou fesiligia le tau o le faatauina mai o sapalai o mea e manaomia le malulu. Ina ua latou tau maia ia i maua, na ma fai atu, ‘Ma te manatu e mafai ona fesoasoani mai le Auaunaga Limafoai a le AAG.’ Na latou fai mai, ‘O le a le vave? Ua tatua loa ona tatou faagaoioia vave lenei meal!’”

Na faamaonia e le Auaunaga Limafoai a le AAG i totonus o le 20 itila le faatauina o sapalai o mea e manaomia le malulu. “Ina ua ma tau atua i le Matagaluega o le Soifua Maloloina ma le UNICEF,” o le tala lea a Ron, “na matuai faateia lava i latou. E faapefea e



O Auaunaga Limafoai a le AAG na fesoasoani e faia tuipuipui o le 90,000 o tagata sulufai o Suria mo le misela.



Amman, Ioritana



se FLM [Faalapotopotoga e Le i le Malo] ona vave tele ona gaoioi? E le gata na agai i luma le taumafaiga o tuipupui e pei ona fuafuaina, ae na uunaia ai foi se taumafaiga i le atunuu atoa ia tuipupui le faitau selau o le fia afe o tagata sulufai o Ioritana ma Suria.”

Na puipuia le faalavelave.

Ma le isi, o lenei faigapaaga a le UNICEF, Matagaluega o le Soifua Maloloina o Ioritana, ma le Auaunaga Limafoai a le AAG na fatuina se tulaga faamoemoeina mo ni fesootiga i le lumanaai.

O le ala na oo atu ai Ron ma Sandi Hammond i lena taimi taua i Sasae Tutotonu o se molimau lea o le faatua-tua o le au Hammond ma le uunaiga mai le polokalamo a faifeautalai matutua a le Ekalesia.

Manaomia: Ulugalii Faifeautalai

I le 2012 na auauna atu ai le au Hammonds o ni tagata faigaluega i sauniga i totonu o le Malumalu o Rexburg Idaho. Na i ai se pisinisi faamanuiaina fomai nifo a Ron ma sa faioga i le Matagaluega o Mataupu Faalelotu i le Iunivesite o Polika Iaga-Idaho. Ae o le faatulagaga filemu masani o o la olaga na faafuasei lava ona suia i se uunaiga manino faaleagaga ia auina vave atu pepa e auauna i se misiona. O le taimi na faateia ai i laua. O le la fanau ua faaipoipo na i ai i ni tulaga eseese o le feoaiga i galuega ma toe suia nofoaga, ma e lei i ai se mafaufau o Ron e litaea. Ae na faamautinoa atu e le Agaga ia i laua na manaomia i laua ma o le a lelei mea uma.

O le mea na tulai mai, sa anapopogi ma tatalo taitai perisitua i le laumua o le Ekalesia ina ia maua se ulugalii sao e auauna atu o ni taitai o le atunuu mo le Auaunaga Limafoai a le AAG i Amman, Ioritana.

O LE AUALA E MAUA AI LE 6 PO O LE 12 PO O LE 18 PO O LE 23 MASINA SILISILI ONA LELEI O LOU OLAGA

Emafai ona auauna atu se ulugalii i se misiona i le 6, 12, 18, pe 23 masina, e faalagolago i o la tulaga.

Ma le isi, o le pili e sili ona tele o mea tautupe o se misi-ona—o fale—ua mafai ona fetuunaia ina ia gafatia e ala i le faatapulaaina o le tau o fale ia le sili atu nai lo le \$1,400 tupe

“Sa matuai manino mai lava,” o le tala lea a Sandi, “na muamua atu le Alii ia i maua, ma saunia faamatalaga o le tofiga faapitoa na i ai ia te Ia mo maua. Ma te iloa Na te faia lenei mea mo faifeautalai taitasi e auauna atu. O se faamafanafanaga le iloa ua faatulaga uma e le Faaola mea mo oe e auauna atu ai ae e te lei taunuu atu lava.”

“I le toe tepa i tua,” ua fai mai ai Ron, “ma te faafetai ma te lei faamoemoe pe naunau foi mo se nofoaga faapitoa e auauna atu ai. O le tuuina atu o na mataupu i aao o le Alii na faatagaina ai o Ia e tuu mai ia i maua se aafiaga semanu ma te mauaina lava.”

O lena aafiaga na aofia ai le galulue faatasi ma le aiga tupu o Ioritana i galuega faatino o auaunaga alofa e fia-fia i ai le aiga tupu. Na galulue faatasi le au Hammonds ma falemai o le lotoifale ma falemai laiti e saunia aoaoga

Amerika mo ulugalii o loo auauna atu mai le lunaite Setete, Kanata, Europa i sisifo, Iapani, ma Ausetalia. O i latou mai isi uma atunuu e totogi le mea latou te gafatia.

Mo faamatalaga i le talosagaina mo auaunaga faamisona ma ia faitau atili i tala i ulugalii o e na maua ni masina sili o o latou olaga i le auaunaga faamaison, alu i le lds.org/callings/missionary/senior.



i tagata faigaluega o le falemai o Ioritana i tomai tau faasaoina o le ola i le faamanavaina o pepe faatoa fananau mai, lea na mafua ai se faaitiitiga maoae o le aofai o pepe fou e maliliu. Na ala atu ia la taumafaiga ma taumafaiga a isi ulugalii faifeautalai, na saunia ai e le Auaunaga Limafoai a le AAG aoaoga ma mea faigaluega i falemai o mata ma faalapotopotoga o auauna atu i e le atoatoa le malosi. Faatasi ai ma i latou na lagolagoina e le au Hammonds ma isi faifeautalai uelefea o se nofoaga autu lea e aoaoina tamaitai e le atoatoa le malosi i le auala e mamanu ai ofu ma faia ofu faapitoa ma mea taulima. O nei tomai na tuuina atu ai i tamaiti aoga le avanoa ina ia tausia lelei ai i latou lava ma o latou aiga.

O isi galuega faatino na aofia ai le galulue ma isi FLM ma le malo o Ioritana i le tali atu i faalavelave faafusei ma le sailia o tamaiti aoga Ioritana ia taliaina se sikolasipi e tasi po o le lua foi i tausaga taitasi e auai ai i le Iunivesite o Polika Iaga. O se tasi o aafiaga sili ona faamalie loto i le au Hammonds o le galulue faatasi lea ma le Ekalesia Katoliko Latina e fausia ni potu aoga mo Kerisiano Iraki na leai se nofoaga e potopoto ai.



O Ron ma Sandi Hammond ma isi faifeautalai o auaunaga alofa na galulue faatasi ma le aiga tupu o Ioritana e faaitiitia le aofai o pepe fou e maliliu iina.

Faatasi ai ma le Alii i Lona Tovine

Ao i ai i Ioritana na aoao le au Hammonds i le moni o le folafolaga a le Alii ia i latou e auauna atu ia te Ia: “O le a Ou alu muamua atu i o outou luma. O le a ou i ai i lo outou lima taumatau ma lo outou agavale, ma o le a i ai lou Agaga i o outou loto, ma sio faataamilo outou e au agelu, e sapasapai outou i luga. (MF&F 84:88).

“O loo auai le Atua i le galuega,” ua fai mai ai Ron. “O loo i ai o Ia i lalo i le tovine faatasi ma Ana auauna. Soo se ulugalii lava e o atu i se misiona e faatasi atu i ai i le tovine le Alii o le tovine. E le gata ina ma talitonu i vavega i Ioritana; na ma ola ai.”

E aunoa ma se masalosalo, o agelu na la lagonaina “faataamilo” i luga o i laua na aofia ai ni tino faalelagi, ae na aofia ai foi tino faalelalolagi, ae maise le la fanau, o e na lagolagoina la laua filifliga e auauna atu mamaao mai le aiga.

Ma na faamanuiaina lo la aiga mulimuli ane e le mana puipui, ma le lagolago o le Alii. O filifliga o galuega taua ma fesiitaiga o nofoaga na faia, ma o popolega i faaletonu e ono tutupu i le fanau mai o se pepe na foia ao liliu atu le la fanau i le Alii, fefautuaai faatasi, ma tatalo ma anapopogi mo le tasi ma le isi.

O faamanuiaga na maua e le la fanau na matuai ofoofogia lava ma ina ua valaaulia Brother ma Sister Hammond e faaumi le la misiona e lua-tausaga i le tolu, na faaalia e le la fanau le lagolago fiafia. Na latou lagonaina na faia e le Alii se mea faapitoa lava mo i latou o se taunuuga tuusao lava o le auaunaga a o latou matua.

Ae, na lagonaina lava o se osigataulaga le tuuiseesea o le aiga o le au Hammond. O le mamaao ese mai ia i latou la te alolofa i ai sa faigata. Ae sa lei faigata tele e pei ona semanu e i ai i le taimi ua tuanai. O le tekinolosi na mafai ai mo le aiga ona aafia i olaga o le tasi ma le isi i le tele lava o taimi e manaomia ai. Fai mai Sandi, “E le motusia fesootaiga a ulugalii ma o latou aiga. Sa matou fesootai soo ma aiga o a maua fanau i lo matou aiga. Ona o le talanoa ma vaai i foliga ma imeli, o fanau a ma fanau e toafa, na fananau ao ma auauna atu, na iloa maua ma na fiafia ma faafeiloai mai ina ua ma toefoi atu.”

Tatalaina o Mata ma Loto

I le tele o faamanuiaga na lagona e le au Hammonds na la maua mai le la auaunaga o le tatalaina lea o o laua mata i le agalelei ma le faaauo o tagata o Ioritana. Ina ua faatoa



O se tasi o popolega mo ulugalii faamisiona faaleoleo o le o ese lea mai fanau ma fanau a fanau i taimi taua o o latou olaga. Na aoaoina e le au Hammonds faapea, e faamanuiaina e le Alii, i ni auala maoae, aiga o ulugalii e auauna atu ma ua avea tekinolosi ma auala latou te vavalalata ai pea e tusa lava pe o latou mamao ese.

maua e le au Hammonds le la valaauga, na la le mautonu e uiga i tagata o le a la auauna atu i ai.

“Ae na ma iloaina o a ma uo Mosalemi e agamalu ma agalelei,” sa fai mai ai Ron, “ma ua ma mautinoa a latou lagonaina ua lamatia i maua, latou te faia soo se mea e puipui ai i maua.

“O lo latou alofa e ofoofovogia. E le mananao tagata Ioritana ia iloaina o i ai se isi o manaomia se fesoasoani pe afai e mafai ona latou fesoasoani i ai. Sa latou faafeiloia lava tagata sulufai talu mai le taimi ao lei fanau mai Tavita. O loo i ai i le Tusi Paia le tele o mau faasino i ‘tala atu o Ioritana,’ ma na amata ona sainiina a maua tusi ‘Tala atu o Ioritana,’ o se faailoaga o le auaunaga alofa na faamanuiaina ai i maua e tuuina atu i lenei atunu agaalofa faasolopito. Mo le tele o senituri sa avea ai Ioritana ma nofoaga o le alofa, ma na faamanuiaina e le Alii tagata mo lena mea.”

O le galulue vavalalata ma tagata o Ioritana na mafai ai e le au Hammonds ona atiina ae nisi o faauoga malolosi. “Na valaaulia i maua i ni nai ‘aiga o le Iftar, o le ‘aiga e faai ai le anapogi o le Ramadan i aso taitasi,’” “Na valaaulia foi i maua e a ma uo Moseleimi e auai i pati o faamauga, faaipoipoga, ma isi faatasiga e faatatau i aiga.”

E le talai le Eklesia pe faatagaina le papatisoina o tagata Moseleimi i Ioritana po o se isi nofoaga e faasa ai e le tulafono, o lea e lei faasoaina atu ai e le au Hammonds ni

faamatalaga e uiga i le Eklesia. Nai lo lena, na la taulai atu i le fausiaina ma le faatumauina o fegalegaleaiga—ma le aiga tupu, paaga o galuega alofa o le lotoifale, o isi ulugalii faamisiona na auauna atu ma i laua, ma taitai o lotu ma le malo. Pe a fesiliga e uiga i le Eklesia, e uunaia e le au Hammonds tagata e fesili mai e asiisi i le LDS.org.

O Le Valaauga e Auauna Atu

A mafaufau i le maoae o aafiaga o Ron ma Sandi, pe la te lagonaina pe ua faapitoa i laua i isi ulugalii na valaaulia e auauna atu—pe o le a valaaulia e auauna atu?

Ioe—ma leai. “Na ma auauna atu i le nofoaga ma i le taimi na manaomia ai e le Alii se ulugalii e i ai o ma tomai faapitoa ma aafiaga o le olaga,” ua fai mai ai le au Hammonds. “Ae ua moni lena mea mo

faifeatalai matutua uma lava. Soo se ulugalii lava ua i ai le tomai e auauna atu ai i se misiona ua saunia e auauna atu i ni auala faapitoa mo i latou. Pau lava le mea latou te manaomia o le faatino o le faatuatua ia lava e o ai i le mea e manaomia ai i laua e le Alii, ma o le a Ia faaaogaina i laua e faia se eseesega i olaga o isi.”

“E mafai e ulugalii ona faia se eseesega,” na saunoa mai ai Elder Robert D. Hales o le Korama a Apostolo e Toasefululu: “E mafai e ulugalii ona faataunuina mea ofoofovogia e le mafai e se isi lava ona faia. . . .

“. . . O auala e mafai ona auauna atu ai ulugalii e matua anoanoai lava. E amata mai i le lagolagosua a le ofisa o misiona ma aoaoga faaletaitai e oo atu i potu gafa, o galuega faalemalumalu, ma auaunaga o le fesoasoani atu—o loo i ai se avanoa e faaaogaina ai toetoe lava o soo se tomai po o se taleni ua famanuiaina ai oe e le Alii. . . .

“. . . Ua tele mea ua e mauaina i lou olaga; ia e alu atu ma foafua atu i le galuega a lo tatou Alii ma le Faaola. Ia faatuatua; o loo silafia e le Alii le mea o loo manaomia ai oe. E matua tele lava le manaomia o outou, uso ma tuafafine, ma ua matua toalaiti lava le aufaigaluega.”² ■

FAAMATALAGA

1. Tagai i le “Mass Vaccination Campaigns in Syria, Jordan, Lebanon, Iraq and Turkey Amid Measles Outbreaks,” Ape. 30, 2013, unicef.org.
2. Robert D. Hales, “O Ulugalii Faamisiona: O Se Valaauga e Auauna Atu,” *Liahona*, Julai 2001, 28,31.

AISI ATU MO LE ALOFA MUTIMUTIVALE

I se malaga i se aai lata ane i Esitonia, sa ou vaaia ai se alii o aisi mo se tupe. O le mea e ofo ai, sa ou iloa o ia mai le taimi sa ou auauna atu ai o se faifeautalai i lena aai i le 10 tausaga na muamua atu. Sa ia amoina se ato lapoa o atigi fagu palesitika, e pei lava o le taimi muamua, e ao ma faatau atu mo se tupe. Sa ou manutaina sa fesili i taimi uma o ia mo ni nai tipe faasili, ma a e avatu ia te ia na te fesili mai pe o i ai nisi tipe o totoe ia te oe.

Sa faateia lava au i le vaai atu ia te ia. Ma i le mavae ai o le 10 tausaga o loo tumau pea o ia i le mea e tasi—ae ua fai sina matua teisi, ae sa foliga mai o loo ia ola pea i le olaga lava e tasi o le aisi mo se tupe i lea aso ma lea aso. Sa ou mafaufau i tausaga matagofie e 10 na ou ola ai i lea lava taimi, lea sa aofia ai le faaipoipo atu i le malumalu, faateleina o le aotauina, mauaina o se

galuega lelei, ma le olioli i se soifuaga maloloina lelei.

Sa ou manatu atonu o le taimi mulimuli lea ou te vaai ai ia te ia, ma sa ou lagonaina e tatau ona ou foai atu ia te ia se mea. Ae o le faafitali sa na o se tipe pepa sa ia te au sa sili atu nai lo le mea sa ou loto e foai atu. Sa fai si o'u le fiafia i le filifiliga na ou faia—o le leai o se mea e foai atu ia te ia po o le foai atu ia te ia o se mea e sili atu ma le mea na ou manao i ai. Sa tonu ia te au o le a leai lava se eseesega tele e faia mo au ma o le a lelei ai lona aso, o lea sa ou foai atu ai ia te ia le tipe.

E lei atoa ni aso se lua mulimuli ane ae ou oo i se tulaga faapea, ae o le taimi la lea, o au le tagata lea ua aisi atu nei mo le alofa mutimutivale. Sa fenumiai ia te au le aso mo se tusitalosaga mo se sikolasipi taua lava. Sa ou

manatu na ou auina atua i le lua vaiaso na muamua atu, ae sa lofituina au ina ua ou toe siakia le aso ma iloa ai e tasi le aso na tuai ai ona ou lafoina.

O le aofaiga o le sikolasipi sa faaselauina le aofaiga na ou foai atua i le tagata aisi, ma ou iloa ai o lea tulaga sa le o se mea na faafuveta. Sa oo ina ou aisi atu mo le alofa mutimutivale, i le tatalo i lo'u Tama Faalelagi faapea ai ma imeli na avatu i taitai o le iunive-site. Sa latou faapea mai o le a tuu i totonus le tusitalosaga ae o le a tusi i ai sa tuai atu.

Sa taliina la'u tatalo ma sa faamniaina a'u e maua le sikolasipi, lea sa fesoasoani tele ai ia i maua ma lo'u toalua i mea tautupe. Ae o le mea e sili atu ona taua, o lenei aafiaga na ou aaooina ai se lesona taua tele: pe le o i tatou uma ea o ni tagata aisi? (tagai Mosaea 4:19). ■

Matthew Crandall, Harju, Esitonia

I se malaga i se aai lata ane i Esitonia, sa ou vaaia ai se alii o aisi mo se tipe. O le mea e ofo ai, sa ou iloaina o ia mai le taimi sa ou auauna atu ai o se faifeautalai i lena aai i le 10 tausaga na muamua atu.

O AGELU E SUAFA IA MR. MA MRS. DUNN

Sa ou matamata i le TV ina ua valaaau mai lo'u tina e tau mai ia te au lona tuagane, si o'u Uncle o Floyd ua 92 tausaga le matua, ma lona toalua, o Aunt Mili, sa gasegase i le fulū na sa leai se meaai i lo la fale. Sa le lava foi lo la malolosi e o ai i le faleoloa e faatau mai se meaai. Sa leai se aiga o Uncle Floyd ma Aunt Mili na lata ane, o lea sa leai ai se tasi e fesoasoani ia i laua.

Sa tomanatu lou tina pe mafai ona ou fesoasoani i ai. Ua na o au le tagata o le Ekalesia i lena vaega o lou aiga, ma sa valaauna foi au e fesoasoani atu i ni tulaga faapenei muamua. O le faafitali sa ou nofo i Iuta, ISA, ae o lou aunt ma lou uncle sa nonofo i Hemet, Kalefonia, ISA.

Sa ou fai atu i lou tina e tuu mai ni nai minute sei mafaufau ai po o le a se mea e fai. Sa i ai sau uo sa nofo latalata i Hemet, o lea sa ou valaaau ai ma fesili i ai pe na te silafaina se tasi i Hemet. Sa ia tau mai ia te au se tamaitai sa la faigaluega faatasi i le Malumalu o Redlands Kalefonia e suafa ia Sister Dunn o se peresitene o se Aualofa iiua.

Ina ua tali mai e Sister Dunn le telefoni, sa ou amata fai atu, "Talofa, Sister Dunn. E te le iloaina a'u, ae o lo'u igoa o Nancy Little, ma ou te nofo i Iuta. O a'u o se tagata o le Ekalesia,



Sa augani mai Sister Dunn o le a la aveina ma lona toalua ia meaai i lo'u aunty ma lo'u uncle.

e tau mai ia te au le tala a uncle Floyd e uiga i le la asiasiga. Sa ia fai mai, "Sa taunuu mai ni agelu i lo'u fale e suafa ia Mr. ma Mrs. Dunn. Sa la o mai ma ni lima tutumu i meaai: fualau aina suamalie, fualau faisua, supo na fai i le fale, falaoa, ma kuki. O kuki aupito sili ia ona lelei ua ou ai ai." O le asiasiga a le au Dunn i lo'u uncle, sa fesoasoani ia i laua i o la manaoga, ona sii lea e Brother Dunn lo'u Aunty vaivai o Mili, sa mafatia mai le faama'i o le Galo o Mea, mai lona moega i se nofoafaataavale i totonus o le umukuka ina ia mafai ai e Sister Dunn ona fafaga ia te ia.

Ina ua valaaau atu Uncle Floyd i lo'u tina e tau atu ai ia te ia le asiasiga, sa tagi o ia. Sa ia fai mai na te lei feiloai muamua lava i ni tagata agalelei ma agaalofa faapenei. Sa ia tau atu i lo'u tina ua matua laki lava a'u i le nofo ai i Iuta ma siosiomaina e "na Mamona uma."

I le fa aso mulimuli ane ina ua mavae le asiasiga, sa savali atu ai Uncle Floyd i lana pusameli ae see ai ma pa'u. Sa tau lona ulu i lalo ma i le fa aso mulimuli ane ae maliu o ia. E ese ai mai se tamaitai tausimai, o Brother ma Sister Dunn o tagata mulimuli ia sa vaai i ai lo'u uncle ae lei maliu o ia.

Ou te faafetai mo le faataitaiga FaaKeriso a se tasi o o'u uso a Aualofa na nofo i le faitau selau o maila le mamao, o se tasi ou te lei feiloai lava i ai, sa fesoasoani i lo'u aunt ma lo'u uncle. ■

Nancy Little, Iuta, ISA

O SE VAITAU MO TALAFaaSOLOPITO O AIGA

I le avea ai ma se tina o ni afafine se toalua, e tele lava ina ou faia ni alofaga e faapea e le mafai ona ou auai i nisi o mea ou te fiafia i ai ona e le o so'u "vaitau" e faia ai. O se tasi o na mea o galuega o talafaasolopito o aiga.

E ui sa ou auai i le faavasegaga o igoa o se gaoioiga fiafia o le Sapati i le tuanai, ae sa ou iloaina ai lo'u faia o ni alofaga e faapea e leai so'u taimi po o se malamalama e opomauna ai a'u galuega o talafaasolopito o aiga i lena taimi.

Sa suia lo'u loto i se tasi o taeao po i ni nai masina talu ai a o ou nofonofa ai i totonu o le malumalu. A o ou iloiloina igoa o e ua maliliu i luga o kata o le malumalu, ma tatalo ina ia latou taliaina sauniga o le malumalu na faatinoina mo i latou, sa ou mafau-fau lava ia te au, "Ai lava se manaia pe ana faapea o tagata nei o lo'u lava aiga? Ou te fia faia le galuega mo i latou." Sa faamautu mai e le Agaga ia te au afai o o'u manaoga ia, o le a fesoasoani mai la le Alii ia ou faia au galuega o talafaasolopito o aiga, ae patino lava i le aso Sapati. E mafai ona

fesoasoani mai o Ia ia te au ia maua le taimi ma le malamalama e faataunu ai Ona faamoemoega.

I lena Aso Sa, sa ou alu ai i le fale ma alu i totonu o le FamilySearch.org. Sa faafusei ona tafe mai ou loimata ina ua ou vaaia igoa o ou tuaa. Sa oo ina malosi atu lou sootaga ma i latou. O mea na faaopoopo atu i lo'u alofa mo i latou o ata patino ma pepa o faamaumauga, ia sa lei leva atu ona faaopoopo i ai e lo'u tinamatua, ma na pei ua toe ola mai ai tagata o lo'u aiga mo au. Sa ou lagonaina le olioli i le faaaaofiaina ai o la'u tama e lua tausaga le matua, lea sa aoao e iloa ata o le tama o lona tama matua ma le tina o le tinamatua o lona tinamatua, ma ta'uina o la igoa. Sa ou lagonaina le auala lea na faamatalaina e Peresitene Russell M. Nelson, Peresitene o le Korama a

Aposetolo e Toasefululu:

"Ua maua i le Sapati se avanoa matagofie e

faamalosia ai sootaga faaleaiga. O le mea moni lava, e finagalo le Atua ia i tatou uma, o Lana fanau, ina ia toe foi atu ia te Ia o ni Au Paia ua maua faa-eega paia, faamauina i le malumalu o ni aiga, i o tatou tuaa, ma i a tatou fanau" ("O Le Sapati o se Aso Fiafia," *Liahona*, Me 2015, 130).


Talu mai lena uluai aafiaga, ua faaauau ai lava ona ou auai i galuega o talafaasolopito o aiga i le aso Sapati. Ua faamanuiaina au e faia galuega faalemalumalu mo nisi o tagata o lo'u aiga ua maliliu. O se faamanuiaga faapitoa, o le iloaina lea o ou aiga ma le mauaina o se mafutaga vavalalata atu ma ou matua matutua e le o ni tagata o lo tatou faatuatuaga. Ua faamalosia ai lo'u naunautaiga e tausi a'u feagaiga ma tumau e oo i le iuga ina ia mafai ai ona avea au ma se sootaga malosi i lo'u aiga e faavavau.

E ui e anoanoai pea galuega e fai, ae ou te faafetai i lo'u Tama Faalelagi mo le faateleina o lo'u malosi ina ia mafai ai ona ou auai i Lana galuega, aemaise lava i Lona aso. Mo a'u, o le Sapati o se aso fiafia moni lava. ■

Rachel Lewis, Iuta, ISA



Sa ou lagonaina le olioli i le faaaaofiaina ai o la'u tama e lua tausaga le matua, lea sa aoao e iloa ata o le tama o lona tamamatua ma le tina o le tinamatua o lona tinamatua, ma ta'uina o la igoa.



Sa fai sa'u tamai faatusa o Kapeteni Moronae, ma sa tuu lava i totonus o le taga o lo'u ofutino i le aluga o le tausaga a'oga atoa e fai ma faamanatu o le auala na aoao ai au e Kapeteni Moronae.

ai e faapei o Kapeteni Moronae i le potuaoga: poloai atu, mautinoa, ma faamanuiaina.

Sa ou faitau i le talanoaga ma matauina ai sa tau atu e Moronae ia Saraemina ma sa Lamana sa fai faamalosi i latou e faia se filifiliga: "Ia outou tuu mai a outou auupega o le ttau ia te i matou, ma . . . o le a matou faasaoina o outou ola, pe afai tou te o i lo outou ala ma le toe o mai e tau faasaga mai ia te i matou" a le o lea "afai tou te le faia lenei mea, . . . o le a ou faatonu atu i ou tagata ia latou o atu ia te outou" (Alema 44:6, 7). Sa ou iloaina sa ia faia le mea na ta'u mai e lo'u taitai ia te au e fai! "Tuu atu ia i latou ni filifiliga se lua, ma toetulitatao i ai," sa ia fai mai ai. I le mafaufau ai i lena mea, sa ou sii mai ai le mautauave a Moronae, "Faauta, o le a tatou faauma le ttau" (Alema 44:10).

I le faaauupegaina ai i mataupu faavae sa ou aoao ai mai se tala i tusitusiga paia e uiga i se tasi o a'u toa, sa ou toe foi atu i le vasega ma le mautinoa ma la'u fuafuaga o le ttau. Sa i ai sa'u tamai faatusa o Kapeteni Moronae, ma sa tuu lava i totonus o le taga o lo'u ofutino i le aluga o le tausaga a'oga atoa e fai ma faamanatu o le auala na aoao ai au e Kapeteni Moronae ia puleaina se potuaoga o le aoga tulagalua. A o ou tuu atu i a'u tamaiti aoga ni filifiliga se lua, sa faaleleia a latou amio, sa fai a latou meaaoga, ma sa matou fegalegaleai lelei atu. Sa maea le tausaga, ma sa faigata pea, ae faatasi ai ma le tatalo sa taliina ma le mana o tusitusiga paia, sa mafai ai ona ou "faauma le ttau." ■

Ben Floyd, Uosigitone, ISA

SA FESOASOANI KAPETENI MORONAE IA TE AU E AOAO ATU LE AOGA TULAGALUA

Sa ou i ai i le lotolotoi o se tausaga faigata i le aoaoina o tamaiti 13 ma le 14 tausaga le matutua. Faatoa ou foi mai lava i le fale mai se fonotaga le fiafia faatasi ai ma le sui pule sa siakia sa'u iloiloga lata mai. I le avea ai ma se faiaoga fou ma manaomia ona fatua'i le tele o au lesona, sa ou tauivi ai e faatumauina le faia o meaaoga ma le naunau o tamaiti aoga. O le mea e masani ai o le faaiuga o le talanoaga na manaomia ai lo'u faia faamalosi o au tamaiti aoga e faia se filifiliga—fai o meaaoga po o le oo i faafitauli—ma tulitatao ai i au lapataiga.

Sa ou tuua le fonotaga ma le faanoanoa ma le lofituina. Sa ou faia se

manatu ia avea lenei fonotaga ma fesili o le aso pe a ou suesueina au tusitusiga paia i le aso na sosoo ai. O le mea e ofo ai, sa oo mai tali ia te au a o ou faitauina le Tusi a Mamona.

Sa ou tatalo ia iloa mai tusitusiga paia i lena taeao le auala e avea ai ma se faiaoga e lelei atu. Sa aoao au e le Agaga Paia a o ou faitau e uiga ia Kapeteni Moronae i le Alema 44. I le vaega lenei o le tala, sa siomia ai e Kapeteni Moronae ma sa Nifae ia sa Lamana i le vaitafe o Saitonu ma latou matatau ai lea na mafua ai ona lafoai e sa Lamana a latou auupega. Sa faaaauua ona ou faitau, ma mafaufau i le auala ou te fia avea

ANAPOGI MA TATALO MO EMA

Saunia e Cecilie Norrung

*Ina ua pa'u lau tama teine mai se faamalama, sa ou manatu o le mea sili ona
leaga sa ma fefefe i ai ua taunu nei.*

Faatoa foi mai lava lou aiga mai se tafaoga matagofie. Ina ua mavae le taumafataga o le afiafi sa ou tuu ai le ma fanau toalua, o Markus e fa tausaga ma Ema e tolu tausaga, e taalo i le potumoe pitoaluga o le matou falemautotogi i le fogafale-fa. I Tenimaka, e matafaa malama e pei o ufi faamalama valavalua. E masani lava ona loka ia faamalama, ae sa matou fetagofii faavaiti a o matou o i le matou tafaoga ina ia mafai ona faaea le fale i le taimi o le matou malaga.

A o fufulu au ipu, sa faafusei ona ou lagonaina se mea ua matua sese lava. Sa ou tamoe atu i le potu malolo a o tamoe mai Markus i lalo o le faasitepu. Sa faataio mai o ia ma le fefe, ma faapea mai ua pa'u Ema i fafo o le faamalama—o se faamalama pe tusa ma le 40 futu (12 m) le maualuga mai le alasavali sima. Sa ou tamoe atu i lalo i faasitepu, ma faataio atu pea le igoa o Ema. Sa ou vaaia si au tama teine o taatia mai luga o le sima e peiseai ua uma lona ola. Sa le minoi atoa o ia ina ua ou sii ae o ia i luga, ma sa ou manatu ua faamautuina le mea sili ona leaga sa ou fefe i ai. O lo'u toalua, lea sa mulimuli mai ia te au i fafo, sa ia siiina o ia i ona lima ma vave ona tuu atu ia te ia se faamanuiaga faaleperisitua.

Sa vave ona oo mai le taavale a le falemai, ma sa faia se ma tatalo ma Markus a o galulue le vaega o faalavelave faafusei ia Ema. Sa lei pine ae matou i ai uma i totolu o le taavale a le falemai ma agai atu loa i le falemai.

I le potu tigaina sa vave ona matou i ai

faatasi ma tagata o le matou aiga na o mai e lagolago ia i matou. Sa toefoi atu Markus ma ona tausoga i le fale, ae ma nonofo ai ma si o'u toalua i le falemai, ma le leiloaina lava po o le a se tulaga ia Ema.

Ina ua mavae le mea sa foliga mai o se faataliga umi lava, sa mulimuli ane sau se tasi o fomai ma fesili mai mo se faamatalaga e uiga i le faalavelave. Sa latou fai mai e masani lava o se pa'u mai se maualuga faapea e ono tupu ai ni manuaga i totolu o totoga ma e itiiti lava sina avanoa e ola ai. O loo gau se ivi tua o Ema ma se manu'a i lona ulu, ae o ona maosiosia ua na o ni mea e vave ona toe te'a. Sa fai mai le fomai e masalo sa sapoina o ia e se agelu.

E ui lava o le faasaoina o le ola o Ema o se vavega, ae sa lei malamalama lava o ia ona o ni manuaga i lona ulu. Sa toe faamanuiaina e lo'u toalua ma ni uo mamae se toalua ia Ema. I lena faamanuiaga sa folafola atu ai ia te ia se toe faafosisia atoa o le malosi e aunoa ma soo se faafitauli tumau ma o le a avea lenei mea ma se aafiaga lelei i lona olaga. Sa ou lagonaina se lotofaafetai tele mo le mana o le perisitua. Sa faafogaina a'u aioiga uma i po uma.

Sa ala ae Ema mai le koma i le fa aso mulimuli ane. I na aso e fa, sa anapopogi ma tatalo ai uo, tagata o le Ekalesia, ma isi mo ia. Sa ou lagonaina ia tatalo a le Au Paia faatuatua na siosiomaiaina au, na faamalosia ai a'u ma lo'u aiga. Sa ou lagonaina e peiseai sa opoina au e le Tama Faalelagi i Ona aao ma faatumulia au i le mafanafana.



ATA © ISTOCK/THINKSTOCK



Sa faia e le matou siteki se anapogi i le aso na sosoo ma le aso na ala ae ai o ia. Matou te talitonu sa faafogaina e le Tama Faalelagi a matou tatalo ma o le toe ala mai o Ema o se taunuuga tuusao lea o le anapogi. Mai lena taimi sa vave ai lava ona toe faafoisia le malosi o Ema. I le lima aso mulimuli ane sa ia tautala ai i lana upu muamua lava talu mai le faalavelave, ma i le iva aso mulimuli ane sa te'a ai o ia i tua mai le falemai. Sa ia faaluina le lima vaiaso i se nofoa faataavale ma amata ai loa ana fofo gau mo le toe faaleleia o lona tino.

Pe tusa ma se masina talu ona mavae le faalavelave, sa faafusei lava ona faletonu lo'u tua mai le siiina o Ema. Sa lofituina a'u i se lagona e le gata o le leai o se malosi faale-tino ae ua leai foi se malosi faaleagaga. E mafai faapefeara ona ou faaaau ona tauis ia te ia?

I se tasi po sa matua mamafa ai lava ma lē lavātia le ta'usalaina o le leai o se malosi. Sa ou tuua le fale ma tau atu i se nofoa i le paka, lea sa ou tatalo ai i le Tama Faalelagi pe ā ma se itula. Mo le taimi muamua lava i lou olaga, sa ou lagona ai le lofituina o au i le mana faavavega o le Togiola a le Faaola. O tiga uma ma faanoanoaga sa ou tauaveina ua aveesea mai ia te au; o au avega uma sa aveesea mai i ou tauau ina ua uma lena tatalo. Sa i ai pea Ema i le nofoafaataavale, ma sa faia ni togafitiga masani i lou tua, ae sa faamalosia au e faaaau ona pea.

I le tasi tausaga mulimuli ane, sa mafai ona tamoe Ema, ata, faamatala ni tala, ma mafau-fau o se tamaitiiti e fa tausaga le matua e pei ona tatau ai.

Matou te iloa o loo i ai se Tama i le Lagi alofa, e popole mo i tatou ma silafia i tatou taitoatasi. Na te silafia po o a luitau o loo tatou feagai ai. O le a ou le masalosalo lava i vavega Na te tuuina mai ia i tatou e ala i tatalo, ana-pogi, ma faamanuiaga faaleperisitua. ■


O le tusitala e alala i le Itulagi o le Laumua o Tenimaka



O LE A SE TATOU TALI ATU I TOFOTOFOGA?

"A tutupu ni mea faigata i o taotu olaga, o le a se tatou tali vave atu i ai? O le le mauttonu ea, masalosalo po o le aluese mai ai faaleagaga? O se faa-umatiaga ea i lo tatou faatuatua? O tatou tuuaia ea le Atua po o isi mo o tatou tulaga? Pe o le tatou muai tali atu ia manatua po o ai i tatou—o i tatou o fanau o se Atua alofa? Pe [tatou te] tuufaatasia ea ma se faatuatuaga atoa ua la faatagaina nisi o puapuaga faale-lalolagi ona ua la silafia o le a faamanuiaina ai i tatou, e pei o le afi a le tunuapro, e avea ai i tatou e faapei o la ma ia maua ai lo tatou tofi e faavavau?"

Elder Donald L. Hallstrom o le Au Peresitene o Fitugafulu, "O Au o se Atalii o le Atua," *Liahona*, Me 2016, 27.



Saunia e
Peresitene
Russell M. Nelson

Peresitene o
le Korama a
Aposetolo e
Toasefululua

Tutu Atu o ni Tagata Moni o le Meleniuma

Toatele tagata ua taua outou o *tagata o le meleniuma*. O le a ou talaina faapea a taua outou e tagata suesue i lena upu ma faamatalaina mea ua faaalia e a latou sue-suega e uiga ia te outou—o mea tou te fafia i ai ma le fafia i ai, o outou lagona ma faamoemoega, o outou malosiaga ma vaivaiga—ua ou le mautonu. E i ai se mea e uiga i le ala latou te faaaoga ai le upu *tagata o le meleniuma* lea e faapopoleina ai au. Ma e faigofie lava, ou te faale fafia i mea e fai mai ai *le au popoto* e uiga ia te outou nai lo le mea ua tau mai e le Alii ia te au e uiga ia te outou.

Pe a ou tatalo e uiga ia te outou ma fesili atu i le Alii pe faapefea *Ona lagona* e uiga ia te outou, e matuai ese lava ou lagona mai mea ia e fai mai ai le au suesue. O uunaiga faaleagaga na ou mauaina e uiga ia te oe ua alai ona ou talitonu faapea atonu o le upu

tagata o le meleniuma e fetau lelei lava mo oe—ae mo se mafuaaga e ese mamao lava nai lo le mea e ono malamalama i ai le au popoto.

O le upu *tagata o le meleniuma* e fetau lelei lava mo oe pe afai o lena upu e faamanatu atu ia te oe po o ai *moni* lava oe ma po o le a lou faamoemoega *moni* lava i le olaga. O se tagata moni o le melemiuma o se tasi na aoao atu ma na aoaoina i le talalelei a Iesu Keriso i le muai olaga ma na faia ni feagaiga iina ma le Tama Faalelagi e uiga i ni mea totoa—e oo lava i mea totoa *mama*—o le a ia faia ao i ai iinei i le lalolagi.

O se tagata moni o le meleniuma o se alii po o se tamaitai na lava le faatuatuaina e le Atua e auina mai i le lalolagi i le tisipenisione sili ona faigata i le talafaasolopito o lenei lalolagi. O se tagata moni o le meleniuma o se alii po o se tamaitai o loo ola nei

O outou "o se tupulaga filifilia," na muai filifilia e le Atua e faia se galuega ofoofogia—e fesoasoani e saunia ia tagata o lenei lalolagi mo le Afio Mai Faalua.

e fesoasoani e saunia tagata o lenei lalolagi mo le Afio Mai Faalua o Iesu Keriso ma Lona nofotupu i le meleniuma. Ia e faamautinoa atu—na e fanau mai e avea ma tagata moni o le meleniuma.



O le fesili la “E faapefea ona e tu atu ma ola o se tagata moni o le meleniuma?” E fa au fautuaga.

1. Aoao Po o Ai Moni Lava Oe

Faaalu se taimi e mafaufau ai ma le agaga tatalo e uiga i nei mea moni:

- O oe o se atalii po o se afafine filifilia o le Atua.
- Ua foaoaina oe i Lona faatusa.
- Na aoaoina oe i le lalolagi o agaga e saunia ai oe mo soo se mea ma mea uma o le a e feagai ai i le taimi o lenei vaega o nei aso e gata ai (tagai i le MF&F 138:56). O lena aoaoga e tumau i totonu ia te oe!

O loo e ola i le “itula lona sefulustasi.” Ua folafola mai e le Alii o le taimi mulimuli lenei o le a Ia valaaulia ai e e galulue i Lona tovine e faapopotopotoina le au filifilia mai itu e fa o le lalolagi. (Tagai i le MF&F 33:3–6.) Ma o oe na auina mai ia auai i lenei faapopotopotoina. Ua ou vaiaia pea lava pea i le faatosinaga mamana a tagata moni o le meleniuma ao latou aumaia isi i se malamalamo o le upumoni. O se vaega lenei o lou faasinomaga ma lou faamoemoega o se atalii o Aperaamo (tagai i le Kalatia 3:26–29)!

I ni nai masina talu ai sa ma maua ai ma lou toalua, o Wendy, se aafiaga maoae i se nuu maotua o Saipiria. Faatasi ai ma i latou na matou malaga faatasi i la matou aso sauniuni i Irkutsk o le peresitene lea o le misiona, o Gregory S. Brinton; lona fale-tua, o Sally; ma le la tama ua maea le misiona, o Sam, lea na auauna atu i lana misiona i Rusia. Na matou asiasi

i le Vaituloto matagofie o Baikal ma se maketi i ona laufanua.

Ina ua matou foi mai i la matou veni, na matou iloaina ua leai Sam. I ni minute mulimuli ane na ia toe foi mai ai, faatasi ai ma se tamaitai pe tusa e i le vaitausaga o le 40 lona matua e igoa ia Valenitina. I lana gagana masani faaRusia, sa valaau

mai ai ma le naunautai Valenitia, “Ou te fia feiloai i le tina o lenei alii talavou. E ese lona faaaloalo, atamai, ma agalelei! Ou te fia feiloai i lona tina!” Na tosina Valenitina i foliga fiafia ma le susulu o Sam.

Na faafeiloai e Sam Valenitina i lona tina ma lona tama, tuuina atu ia te ia se tamai tusi e uiga i le Faaola,



ma faatulaga se taimi mo faifeautalai e asiasi ai ia te ia. Ina ua o ane faifeautalai mulimuli ane ma se kopi o le Tusi a Mamona, sa ia folafola mai o le a ia faitauina. O nisi foi o tamaitai sa galulue i le maketi sa fiafia foi e uiga i le tusi fou na maua e Valenitina. Tatou te lei iloaina le iuga o lenei tala, ae ona o le malamalama na faasusulu atu e Sam, na faafeiloai atu ai Valenitina ma nisi o ana uo i le talalelei.

O tagata moni o le meleniuma e pei o Sam ua iloa po o ai moni lava i latou. O i latou o ni soo faamaoni o Iesu Keriso o e faaaoga i taimi uma lava avanoa e fesoasoani ia i latou ma isi e saunia mo le nofotupu o le Faaola i le meleniuma.

O le mea lea, o la'u fautuaga muamua o le aoao *mo outou lava* po o ai moni lava outou. Ole atu i lou Tama Faalelagi i le suafa o Iesu Keriso po o a Ona lagona e uiga ia te oe ma lau misiona iinei i le lalolagi. Afai e te ole atu ma le manatu moni i ai, e oo mai le taimi o le a musumusu mai e le Agaga ia te oe le upumoni e suaia ai le olaga. Tusi i lalo na uunaiga, iloilo soo, ma mulimuli sao i ai.

Ou te folafola atu ia te oe afai o le a amata ona e muuaina tau lava o se vaaiga i le ala e silasila ai le Tama Faalelagi ia te oe ma mea o loo Ia faamoemoe mai ia te oe e faia mo Ia, o le a le toe tutusa lou olaga!

2. Faatalitali—ma Saunia— e Faataunu mea Faigata

E masani lava ona talosaga mai le Atua i Ana fanau o le feagaiga e fai mea faigata. Ona o outou o atalii ma afafine tausi-feagaiga a le Atua soifua i le

vaega mulimuli o nei aso e gata ai, o le a talosaga mai le Alii ia te *oe* e fai mea faigata. E mautinoa lava o le a tupu—o tofotofoga faa-Aperaamo e lei gata ai ia Aperaamo (tagai i le MF&F 101:4–5).

Ou te iloa o le a ai le le fiafia pe a talosagaina e fai se mea e foliga mai e matuai le oo lava i ai lou gafatia. Faatoa 19 masina talu ona avea au ma se tasi o le Korama a Apostetolo e Toasefululua ina ua maliu Peresitene

**Na auina mai oe ia auai
i le faapotopotoina o le
au filifilia. Ua ou vaai pea
lava pea au ia i le faatosinaga
maoae a tagata
moni o le meleniuma ao
latou aumaia isi i se mala-
malama o le upumoni.**

Spencer W. Kimball (1895–1985). I le fonotaga muamua a le au Peresitene Sili ma le Korama a Apostetolo e Toasefululua ina ua mavae le faauuga o Peresitene Ezra Taft Benson (1899–1994), sa ia tuuina atu ni tofiga faapi-toia i le Toasefululua. O ana faatonuga ia te au na aofia ai upu nei: “Elder Nelson, e tatau ona e tatalaina atunu o Europa i Sasae mo le talaiga o le talalelei.”

O le 1985 lena. O le vaitaimi lena o tausaga faigata o faigamalo lea tatou te taua o le Cold War, e le gata na i ai moni lava se pa e vavae ai le aai o Perelini, ae sa i ai foi Europa i Sasae atoa i lalo o faatosinaga sauia

a komunisi. Sa tapunia lotu, ma na faatapulaaina tapuaiga faalelotu e le malo.

Na ou faaaluina le tele o lou olaga faigaluega i le tatalaina o fatu i le faia o ni taotoga faaolaina, ae sa *leai* sou poto masani o le a taitaia au e talitonu e mafai ona ou tatalaina ni atunu mo le talaiga o le talalelei. Ae o lea, ua tuuina mai e se perofeta se tofiga ia te au, o lea na ou alu atu ai e fai le mea sa foliga mai sa matuai le mafai lava.

Mai lava i le amataga, sa i ai le tele o faafitauli i lo'u ala. Na ou taunu i le tele o atunu ma le le iloa po o fea e alu i ai. E tusa lava pe faapea sa ou muuaina le igoa o se taitai talafeagai o le malo, sa le o se mea fou le faaleaogaina po o le tolopoina foi o se fonotaga i se taimi mulimuli lava. I se tasi o atunu, ina ua toe tuu i tua se taimi atofaina mo le lua aso, sa tele ni faaososoga sa tuuina mai e tofotofoina ai au—sa aofia ai ni maketi mo faatauga le mama ma nisi gaoioiga e faasaina. I se tasi taimi, na amataina se fonotaga i le faatonuga ia ou tuua *vave* le atunu!

Ae sa mafai ona faia e le Alii Lana lava galuega (tagai i le 2 Nifae 27:20–21), ma na faamanu-iaina au e matamata i se faagasologa o wavega—i taimi uma lava, ma sei-loga lava ua *uma* ona ou aumaia ou mafauauga sili, au tamafaiga lototoa sili, ma au tatalo sili ona filiga i le galuega.

O le faailoaina o le Ekalesia na faatagaina mai e nisi o na atunu ue ae lei solo i lalo le Olo o Perelini. O le faailoaina mai e nisi na oo mai mulimuli ane. I le 1992, na mafai ai ona

ou lipoti atu ia Peresitene Benson ua faatuina le Ekalesia i atunu taitasi i Europa i Sasae!

I le avea ai ma tagata moni o le meleniuma e faalagolago i ai le Alii, o le a mafai foi e oe ona faataunuina ni mea maoae o le talafaasolopito! O le a talosagaina oe ia taliaina ni tofiga faigata ma avea ma meafaigaluega i aao o le Alii. Ma o le a Ia faia oe ia faataunu mea e faigata.

O le a faapefea ona e faataunuina mea e faigata? E ala i le faia o soo se mea e faamalosia ai lou faatuatua ia Iesu Keriso, e ala i le faateleina o lou malamalama i aoaoga faavae ua aoaina i Lana Ekalesia toefuataina, ma e ala i le sailia ma le filiga o le upumoni. Pe a talosagaina e faia ni mea faigata, i le avea ai o oe—ma se tagata moni o le meleniuma ua faavaeina i aoaoga faavae mama—o le a mafai ona taliaina le tofiga ma le faatuatua ma le naunau malosi ma faia ma le fifia mea uma i lou malosi e faataunu faamoemoega a le Alii (tagai i le MF&F 123:17).

O le a i ai ni ou aso o le a e matuai lotovaivai ai lava. O lea ia tatalo ai mo le malosi ia aua le fiu! O le a e manao-mia lena malosi aua o le a faaaauau pea ona faaitiitia le tautaua o le avea ai ma se Au Paia o Aso e Gata Ai. O le mea e faanoanoa ai, o nisi na e manatu o ni au uo o le a faalataina oe. Ma o nisi o mea o le a foliga mai lava e le talafeagai.

Ae peitai, ou te folafola atu ia te oe a e mulimuli ia Iesu Keriso, o le a e maua le filemu tumau ma le olioli moni. A e tausia au feagaiga ma le faateleina o le maelega, ma ao e puipua le Ekalesia ma le malo o le Atua i le


lalolagi i le aso, o le a faamanuina oe e le Atua i le malosi ma le atamai e faataunu ai mea faigata.

3. Aoao i le Ala e Maua ai le Mana o le Lagi

E tofu uma lava i tatou ma fesili. O le saili e aoao, malamalama, ma iloa le upumoni o se vaega taua o lo tatou

aafiaga faaletino. O le tele o lo'u olaga sa faaluina i suesuega. O le a lelei foi lou aoao i le faia o fesili musuia.

O nisi o outou o loo tauivi i le taimi lava lenei ia iloa le mea e tatau ona e faia i lou olaga. O nisi o outou atonu o mafaufau pe ua faamagaloina outou ia outou agasala. O le toatele o outou o loo mafaufau po o ai ma po o fea



o i ai lau soa faavavau—ma o i latou e le o faia ua tatau ona faia.

O nisi atonu o fesili pe aisea e fai ai e le Ekalesia nisi o mea o loo faia. Atonu o le toatele o outou e le o mautinoa pe faapefea ona maua tali i au tatalo.

Ua saunia lo tatou Tama Faalelagi ma Lona Alo e tali i au fesili e ala i le auaunaga a le Agaga Paia. Ae ua ia te oe le tiute e aoao ai i le ala ia agavaa ai ma mauaina na tali.

O fea e mafai ona e amata ai? Amata i le faaaluina atili o le taimi i nofoaga paia. O le malumalu o se nofoaga paia. E faapena foi le falesa, lea e faafou ai au feagaiga i aso Sa taitasi e ala i le aai ma feinu i le Faa-manatuga. Ou te valaaulia foi oe ina ia avea lou fale mautotogi, le fale o e nofo tumau ai, lou aiga, po o lou potumoe ma se nofoaga paia e mafai ona e nofo saogalemu ai mai faatosi-naga leaga o le lalolagi.

O le tatalo o le ki lea. Tatalo ia iloa mea e taofia le faia ma mea e amata ona fai. Tatalo ia iloa mea e faaopo-opo i lou siosiomaga ma mea e aveese ina ia faateleina le faatasi ai o le Agaga ma oe.

Aioi atu i le Alii mo le meaalofa o le iloatino. Ona ola ai lea ma galue ina ia agavaa e maua lena meaalofa aua a oo mai mea faanenefu i le lalolagi, o le a e iloa lelei lava po o fea e moni ao fea e le moni (tagai i le 2 Nifae 31:13).

Auauna atu ma le alofa. O le auaunaga alofa ia i latou ua leiloa lo latou ala po o ua manunua i le agaga e tatala ai lou loto i faaliga patino.

Faaalu se taimi tele—se taimi e sili atu ona tele—i nofoaga e maua

ai le Agaga. O lona uiga ia tele atu le taimi ma uo o e o loo saili ia maua le Agaga ia i latou. Faaalu ia tele atu le taimi i ou tulivae i le tatalo, tele atu le taimi i tusitusiga paia, tele atu le taimi i le galuega o talafaasolopito o aiga, tele atu le taimi i le malumalu. Ou te folafola atu ia te oe ao e tuuina atu e le aunoa i le Alii se vaega o lou taimi, o le a Ia faateleina mea e ausia i le taimi o totoe.

**O le a talosagaina
oe e taliaina ni tofiga
faigata ma avea ma se
meafaigaluega i aao o le
Alii. O le a la faia oe ia
faataunu mea faigata.**

Matou te lagolagoina tamalii e toa 15 ua faauuina o ni perofeta, tagata vaai, ma tali faaaliga. A tulai mai se faafitauli matuia—ma ua foliga ua sili atu le matuia i aso taitasi—o nei tamalii e toa 15 e tauivi ma le faafitauli, ma taumafai e vaai i taunuuga uma o vaega eseese o faatinoga, ma e latou te saili ma le filiga ia faalogo i le siufogga o le Alii. A uma ona ou anapogi, tatalo, suesue, manatunatu loloto, ma fefautuaai ma ou Uso e uiga i ni mataupu taua, e le o se mea fou mo au le fafaguina i le taimi o le po ma nisi uunaiga e uiga i le faafitauli lea o loo matou popole ai. Ma o le aafiaga lava lea e tasi e maua e ou Uso.

O le Au Peresitene Sili ma le Korama a Aposetolo e Toasefululua e fefautuaai faatasi ma fefaaosoai mea uma ua faatonu mai e le Alii ia i matou ia malamalama ai ma lagonaina taitoatasai ma faatasi foi. Ona matou vaavaai lea ao uunaia e le Alii le Peresitene o le Ekalesia e folafola atu le finagalo o le Alii.

O lenei faagasologa faavalooaga na mulimultaia i le 2012 i le suiga o le tausaga e sili ona itiiti o faifetaulai ma faapena foi i le faaopoopoga talu ai nei o le tusitalima a le Ekalesia, i le sosoo ai ma le faatagaina o faaipo-ipoga o le itupa e tasi i nisi o atunu. I le faatumuina i le agaalofa mo tagata uma, ma aemaise mo le fanau, sa matou fagatua mo se taimi umi lava ia malamalama i le finagalo o le Alii i lenei mataupu.

I le manatuaina pea o le fuafuaga o le faaolataga a le Atua ma Lona faamoemoega mo le ola e faavauvau mo Ana fanau taitasi, na matou mafafau ai i eseesega ma tuufaatasiga e le mafaitaulia o ni ata faamoemoeina e mafai ona tulai mai. Na matou feiloai pea lava pea i le malumalu i le anapogi ma le tatalo ma saili atili le taitaiga ma le uunaiga. Ma, ina ua musuia e le Alii Lana perofeta, o Peresitene Thomas S. Monson, e folafola atu le mafafau ma le finagalo o le Alii, sa matou lagonaina taitoatasai i lena taimi paia se faamautinoaga faaleagaga. O se faamanuiaga mo i matou o ni Aposetolo ia lagolagoina le mea ua faaalia ia Peresitene Monson. O faaliga mai le Alii i Ana auauna o se faagasologa paia, ma e faapena foi le faamanuiaina o oe mo le mauaina o faaliga patino.

Ou uso e ma tuafafine pele, ua ia te outou foi le avanoa i le mafaufau ma le finagalo o le Alii mo lou lava olaga e pei ona matou faia o ni Apostetolo mo Lana Ekalesia. E pei ona manaomia e le Alii i *tatou* ia saili ma manatunatu loloto, anapopogi ma tatalo, ma suesue ma fagatua ma ni fesili faigata, Na te manaomia foi *oe* e faia lena lava mea ao e sailia tali i au lava fesili.

E mafai ona e aoao e faalogo i le siufogoa o le Alii e ala i musumusuga a le Agaga Paia.¹ E pei ona foliga mai e fesoasoani le Google, Twitter, ma le Tusifoliga, latou te le saunia lava ni tali i au fesili e sili ona taua!

Au uo talavou faapelepele, e mafai ona outou iloa le mafaufau ma le finagalo o le Alii mo lou lava olaga. E te le tau mafaufau po o e i ai i le mea e finagalo le Alii e te i ai po o e faia le mea e finagalo o Ia e te faia. E mafai ona e iloa! O le Agaga Paia “o le a tau atu ia te outou mea uma e tatau ona outou faia” (2 Nifae 32:3).

4. Mulimuli i Perofeta


I le 1979, ao auauna atu o se perepitene aoao o le Aoga Sa, na valaaulia au e auai i se semina a Sui Risone i le taimi na tuuina atu ai e Peresitene Kimball se lauga musuia e uiga i le tatalaina o faitotoa o atunu ia na tapunia i le Ekalesia, e pei o Saina. Na ia luiina i latou uma na auai e suesue i le gagana Mandarin ina ia mafai ona ofoina atu a matou tomai faalegaluega e fesoasoani i tagata o Saina.

Ia te au, o le lui a Peresitene Kimball na foliga mai o se faatonuga faaperofeta. Ma o lena lava po na ou fesili atu ai i lou toalua ua maliu, o

Dantzel, pe o le a ia malie ma te sue-sue faatas i le faaMandarin. Sa malie i ai o ia, ma sa maua se faiaoga e fesoasoani ia i maua. E moni ma te lei aoao ia matua lelei i le tautatala faa-Mandarin, ae na lava mea na ma aoaonia ma ina ua valaaulia au i le tausaga lava na sosoo ai (e ala i se faagasologa o ni mea na faafusei lava ona tutupu)

e alu i Saina o se polofesa asiasi e aoao atu le taotoga o se fatu ua tipi, sa ou i ai i se tulaga sili atu e taliaina le valaaulia.

I le lima tausaga mulimuli ane i le 1985, o le tausaga ina ua mavae le valaaulia o au i le Korama a le Toasefululua. I se tasi aso sa ou maua ai se talosaga faanatinati e alu i Saina



e fai se taotoga o le fatu i le tagata pese tautaua o lena atunuu, e lauiloa i Saina atoa o se toa manumanu o le atunuu. Na ou faamatala atu o lou tiute faalelotu i le taimi atoa e le mafai ai ona ou sau, ae na aioi mai fomai i Saina ia ou alu atu loa lava e fai le taotoga e faasaoina le ola.

Sa ou talanoa e uiga i le mataupu i lou peresitene o le korama ma le au Peresitene Sili. Sa latou lagona se uunaiga faapea, i le avea ai ma se auaunaga i tagata o Saina, e tatau ona ou faia le faigamalaga ma faia le taotoga.

Sa ou alu. O le mea e faafetai ai, na manuia le taotoga! O le isi mea, o le taotoga mulimuli lava lena o se fatu na ou toe faia. Sa faia i Jinan, Saina, i le aso 4 Mati, 1985.

Na toe faaaauau le tala i se taimi mulimuli ane, o le taimi lea ia Oketopa 2015. Na valaaulia i maua ma Wendy e toe foi i le Aoga Faafomai o le Iunivesite o Shandong i Jinan. Na faateia i maua ina ua faafeiloaia au ma le fiafia “o se ue ua leva” a Saina ma na toe faatasia ma fomai tipitipi na ou aoaoina i le 35 tausaga talu ai. O se faatumutumuga o la ma asiasiga o le feiloai lea ma le atalii ma le atalii o le atalii o lena tagata pese tautaua. O nei aafiaga ofoofogia uma sa mafai ona faia mo se mafuaaga e tasi: na ou faalogo i le fautuaga a se perofeta e suesue le faaMandarin!

E silasila perofeta i luma. Latou te vaai i tulaga lamatia faigata ua tuuina e le fili pe o le a tuuina i lo tatou ala. E muai vaiaa foi e perofeta avanoa matagofie ma faamanuiaga o faatalitali mai ia i latou o e faalogo *ma le*

manao ia usiusitai. Ou te iloa e moni lenei mea! Ua ou oo i ai mo au lava ia i le tele o taimi.

Ua folafola mai e le Alii ia i tatou Na te le faatagaina le perofeta e taitai sese i tatou. Na folafola mai e Peresitene Harold B. Lee (1899–1973): “Atonu o le a e le fiafia i le mea e sau mai le pulega o le Eklesia. E ono feteenai ma ou taofi faapolokiki. E ono feteenai ma ou taofi faale-olaga nei. E ono

Pe a e iloaina o se perofeta o se perofeta, e mafai ona e tatalo atu i le Alii i le lotomaualalo ma le faatuatua ma fesili atu mo sau lava molimau e uiga i soo se mea ua folafola mai e Lana perofeta.

faalavelave i le ituaiga olaga o loo e ola ai. Ae afai e te faalogo i nei mea, e pei o loo tuuina mai i le fofoga o le Alii Lava Ia, faatasi ma le onosai, ma le faatuatua, o le folafolaga e faapea ‘o le a le manumalo faitotoa o seoli ia te outou; ioe, a e tafieseina e le Alii le Atua le malosi o le pogisa mai o outou luma, ma luluina le lagi mo lo outou lelei, atoa ma le mamalu o lona suafa’ (MF&F 21:6).²

Atonu e te le malamalama i taimi uma i folafolaga taitasi a se perofeta soifua. Ae afai e te iloaina o se perofeta o se perofeta, e mafai ona e tatalo atu i le Alii i le lotomaualalo ma le faatuatua ma ole atu mo sa oe lava

molimau e uiga i soo se mea ua folafola mai e Lana perofeta.

I le vaitaimi o le 40 T.L.M. e toatele sa Nifae na auai i le Eklesia, ma na ola le Eklesia. Ae o taupulepulega faalilolilo na amata ona faateleina, ma o le toatele o o latou taitai pepelo na lalafi solo i tagata ma na faigata ai ona iloaina. Ao faateteleina pea lava pea le faamaualuga o tagata, o le toatele o sa Nifae na “faatauemu i mea ua paia, ma faafitia le agaga o le valoaga ma faaalgia” (Helamana 4:12).

O na lava foi taufaamatau ua i ai ia i tatou i aso nei. O le meamoni matautia e faapea o “auauna a Satani” (MF&F 10:5) ua lalafi solo i le lalolagi. O lea ia matuai faaeteete ai po o le fautuaga a ai e te mulimuli ai (Helamana 12:23).

Ou uso e ma tuafafine, na outou fananau mai o ni tagata moni o le meleniuma. O outou “o se tupulaga filifilia” (1 Peteru 2:9), na muaifaa-uuina e le Atua e faia se galuega ofoofogia—e fesoasoani ai i tagata o lenei lalolagi mo le Afio Mai Faalua o le Alii! ■

Mai se faigaloti i le lalolagi mo talavou matutua, “Avea ma Tagata Moni o le Meleniuma,” na tuuina atu i le Iunivesite o Polika Iaga-Hawaii i le aso 10 Ianuari, 2016. Mo le saunoaga atoa, alu i le broadcast.lds.org.

FAAMATALAGA

1. Ia Fepuari 1847, i le toeitiiti tolu tausaga talu ona maliu fasia le Perofeta o Iosefa Samita, na ia faali ai ia Peresitene Polika Iaga ma tuuina atu ia te ia lenei savali: “Ta'u atu i tagata ia lotomaualalo ma faamaoni ma ia mautinoa o tausia le Agaga o le Alii ma o le a taitaiina sao i latou. Ia faaeteete ma aua nei liliuseina le leo itiiti ma le filemu; o le a aoaoina [oe i meal] e fai ma mea e te alu i ai” (i le *Aoaoga a Peresitene o le Eklesia: Iosefa Samita* [2007], 104).

2. Aoaoga a Peresitene o le Eklesia: Harold B. Lee (2000), 84–85.

O Le Vavega o le

Vevele Feoloolo

Saunia e David A. Edwards

Mekasini a le Ekalesia

Mafaufau faapea o se alii talavou o loo i le fale na o ia ma ua fiaai (e seasea lava fiaai aua e ai sooo, ioe, ae tau ina mafaufau i ai). Ia mafaufau nei ua tonu i lenei alii talavou e taumafai e fai se saunisi faasisi e tao lava e ia mo le taimi muamua lava.¹ Mafaufau sa lei aoaoina lava e matua o lenei alii talavou o ia i le taoina o le sisi ma na te lei matauina lava [lona matua] ma le totoa i taimi la te faia ai.

Faapea la, e ui ua maua uma e lenei alii talavou mea uma e fai ai ma ua sao lelei: falaoa, sisi, sina pata i luga o le patua o le falaoa (ma sina meioneise i totonu ona ua ia atamai). Ona sosoo lea, ua ia toso mai i fafo le falai ma tuu i luga o le ogaumu. (O loo tatou mafaufauina foi e le o i ai sana ogaumu faapitoa e tao ai po o se isi masini mo le faiga o lenei meaai.)

Ia mafaufau nei ua oo atu se manatu patino i lona mafaufau—o se manatu e toatele lava tagata latou te le amanaaina (pe faavalevalea ai foi mo se taimi) e mafaufau i ai: “Afai ou te kiina i luga le vevela, o le a vave ona vela.”

Mafaufau po o le a le mea e sosoo ai. (Po o le masalo foi e te le tau mafaufau i ai.)

FAAMATALAGA

- E mautinoa lava o lenei alii talavou o se Amerika. Sa ono malaga mai o ia mai

O le a ia mauaina a le o le paanunu atoa, ma enaena lelei le falaoa ia po o le liusuavaia atoa ma le piipii o le sisi—ae le o mea uma e lua. E foliga mai lava, o le a ia maua se falaoa e foliga ma galemulemu (ma masalo lava e tofo) pei o se maa o le lava ma se sisi e lei liusuavaia uma, lea e le faatosinaina sesi e aia.

O lona faafitauli, e pei ona outou vaai i ai, o se tuufatasiga o le faavalevalea (lea e faatagaina) ma le le onosai (lea, e ui e malamalama i ai, ae tau le faatagaina). Afai na te toe faia lea measese i se isi taimi, o le a itiiti ifo lona faatagaina, talu ai ona e le mafai ona tuuaia i le faavalevalea ae o le a mafua uma lava mai le le onosai.

Ina ia faia ia sa'o, e ao ona ia iloaina le vavega o le vevela feoloolo.

O LE FEOLOOLO E LE O LE FAAFIUFIU

O le setiina i le feoloolo i luga o se ogaumu ua matua lelei atoa mo le taoina o le sisi ma le tele o isi meaai ona na te faatagaina meaai ina ia vela i le taimi atoa e aunoa ma le mu i le pito i fafo. E na o le pau lava si ona lave e manaomia ai se taimi sili atu ma le gauai, lea e manaomia ai la le onosai.

se isi nofoaga, ma fai ni meaai falai eseese, crêpes, Kartoffelpuffer, Köttbullar, pani-keke, tortillas, po o se araisa mo le taimi

Sa fetalai mai le Alii, “Faaauau pea i le onosai seja faaatoatoaina outou” (MF&F 67:13). O loo Ia saunoa ii e uiga i le ituaiga o atoatoa lea e sili atu i lo le faiga o ni saunisi sisi e tao ia lelei atoa; e finagalo o Ia ia tatou avea atili e faapei o Ia. O Iesu Keriso o le faataitaiga sili o le onosai. Ma o se vaega o le mulimuli i Lana faataitaiga o lona uiga o le faalauteleina o la tatou vaai, ia vaai i tala atu o mea mo na o le taimi nei, ma vaai i taui sili atu e oo mai mai le lotopulea, faatuatua, usiusitai, taumafaiga mausali ma faifai pea, loa ona talitiga, ma le alofa—i nisi upu, ia maua le onosai.

O le uiga la, o le onosai e aofia ai le faatalitali, lea e atonu e faafiufiu, ae e pei ona aoao i tatou e Peresitene Dieter F. Uchtdorf, Fesoasoani Lua i le Au Peresitene Sili, e sili atu nai lo le tau na ona faatalitali: “O le onosai o lona uiga o le faatalitali mataalia ma le tumau. O lona uiga o le faia pea o se mea ma faia mea uma tatou te mafaia—galulue, faamoemoe, ma le faatinoina o le faatuatua; lavatia o faigata i le malosi, e tusa lava pe ua faatuutuu manaoga o o tatou loto. O le onosai e le na o le tumau, ae o le tumau lelei ai!”²

muamua. O le manatu lava e tasi.

- Dieter F. Uchtdorf, “Faaauau i le Onosai,” *Liahona*, Me 2010, 56.



E le na o le tuuina o le saunisi sisi e tao i luga o le apa ma gal o ai; ae o le vaavaaiga ma le feliua'iga i le taimi sa'o.

E le na o le tau na ona alu i le aoga po o le seminare po o le lotu; o le aoao mataalia po o le tapuai.

E le na o le faatalitali mo se molimau o le Tusi a Mamona ina ia faaee mai i ou luga

ona na e ole atu mo se molimau; ae o le faaauau pea ona faitau, suesue, mafaufau loloto, tatalo, ma le ola ai e tusa ma mataupu o lena tusi.

E le na o lou nofo ai iina a o loo faatauemai au uo i lau lotu; ae o le tatalo mo i latou ma manao moni

mo i latou ina ia maua se suiga o le loto ma faia mea e te mafaia e faataunu ai.

E le na o le faatalitali seia atoa le 16 e tafao faamasani ai; ae o le aoao ia fiafia e usiusitai ma taumafai ia malamalama i le auala o le a faamanuiaina ai oe i le mulimuli i fautuaga a perofeta.





FETAOMI ATU I LUMA

“O le faatalitali i le Alii, o lona uiga o le totoina o le fatu o le faatuatua ma tausia ‘ma le filiga tele, ma le ... onosai’ [Alema 32:41]....

“O le faatalitali i le Alii o lona uiga o le ‘tutumau mausal’i [Alema 45:17] ma ‘fetaomi atu i luma’ i le faatuatua, ‘ma se susulu atoatoa o le faamoemoe’ [2 Nifae 31:20].”

Elder Robert D. Hales o le Korama a Apostolo Toasefululua, “Faatalitali i le Alii: la Faia Lou Finagalo,” *Liahona*, Nov. 2011, 72.

MAIMOA I SE VITIO

Maimoa ia Peresitene Dieter F. Uchtdorf a o faamalamalama mai le mea e fai e le onosai i masimelo i le lds.org/go/101656.

KI I LALO LE VEVELA

O le onosai ma le faapaleplae, po o le lotopulea, o vaega uma ia o “fua o le Agaga” (tagai Kalatia 5:22–23). E ui o loo i ai mea faananati e manao-mia ai se faatinoga vave po o se tali vave atu i ai (e pei lava o ni meaai e manaomia se vevela tele), ae e tatau ona e vaai ia te oe lava ua atiaeina se onosai ma se lotopulea sili atu. Afai e te lagonaina o loo tupu lenei mea, o se faailoga lena o loo galue le Agaga i lou olaga.

O le vasega o le vevela feolo-lo e mafai ona avatua ia te oe se saunisi sisi ua tao lelei atoa, aano o hamburger e le foliga i ni maatā hoki e piniki le ogatotonu, e eena ae le uli-uli (ua mu), ma le araisa e vaivai ma maveve nai lo le malō ma paagugu. Ae o le onosai o le a i ai lona “atoatoa [i le] galuega” (Iakopo 1:4) i lou olaga, e fesoasoani ia te oe ia fetaomi i luma

ia avea atili e faapei o Iesu Keriso, ma le aumaiga o le faatosinaga a le Agaga Paia, ma le mea silisili o le fesoasoani lea e taitai atu oe i le ola e faavavau.

A o e matauina ia mea e mafua ai ona e le onosai, mafaufau i lena saunisi sisi e tao (po o soo se isi lava meaai e talafeagai ma oe) atoa ai ma mea e mafai ona e ositaulagaina e ala i le tuu atu i le le onosai e taiala au faatinoga. Afai e te lagona le tausalaina o le lolotau i le le onosai i le tele o taimi, ia, e tupu i tagata uma. E mafai ona e salamo ma toe taumafai e mulimuli i le faataitaiga ma aaoaoga a Iesu Keriso. E sili atu ma le tasi le saunisi sisi e fia taoina, ma e le o tuai lava ona aoao e uiga i le faaatoatoaina lea e mafai ona faia e ala i le onosai. ■

AUAI I LE TALANOAGA

O MEA E MAFAUFAU LOLOTO I AI MO LE ASO SA

- O a ni tofotofoga faifai pea po o ni tulaga o aso uma e tupu ai lou le onosai?
- E mafai faapefea ona e faataitaia le onosai sili atu i nei tulaga uma?

O MEA E TE ONO FAIA

- Suesue i mau e uiga i le onosai o loo lisiina i le Taiala i Tusitusiga Paia.
- Faatasi ai ma lou aiga po o le lotu, e mafai ona outou talanoaina ni sini mo ni mea patino e mafai ona e faia ina ia onosai atili ai.



VAAI FAALEMAFAUFAU IA TE OOE LAVA IA O TOE ATI AE

"Atonu e te lagonaina ua faaleagaina lou olaga.... E mafai ma o le a toefausia i tatou e lo tatou Tama Faalelagi alofa. O Lana fuauaga o le fausia o i tatou i se mea e matua sili atu nai lo tagata na tatou i ai—matua sili atu nai lo tagata e mafai ona tatou mafaufaunia."

Pereitene Dieter F. Uchtdorf, Fesoasani Luu ile Au Pereitene Sii, konafesi aaoa ia Aperila 2016



MANA ETUMAU AI

Saunia e Jessica Turner e pei ona faamatala atu ia Lynne Crandall

Pe tusa ma se masina a o lei oo i lo'u 16 tausaga, sa matou o ai ma le matou aiga i se malaga sopo auala i le Iunaite Setete e asiasi i nisi o nofoaga o le talafaasolopito o le Ekalesia. Sa lei afaina ia te au le nofo ai i totonu o le taavale mo se taimi umi tele ona sa fiafia lava lo matou aiga i taimi uma. Ou te manatua le oso ai i totonu o le taavale i le aso na maea ai ona matou asia ia Winter Quarters, Nebraska. Sa matua timuga lava. Sa ou oso i le nofoa pito i tua, toso mai se palanikeke, ma faapupuu ma faalogo i le timu a o ou moe.

O le mea na sosoo ai sa ou manatuaina o le lagonaina e pei o loo ou taavilivili ma le le mataofiofia. Muli-muli ane, sa ou iloaina na sesee atu le matou taavale ma fetuai ma le pa sima i lalo o se alalaupapa i luga ae o le auala sa matou o ai. Ou te tau manatuaina le fai mai o se tagata ia te au ua gau lo'u vae ma ua matou agai atu mo se taotoga.

I le mavae ai o lena faalavelave a o amata ona toe faasolosolo malosi mai le falemai, sa sau lo'u tama i totonu o lo'u potu. Sa ia nofo mai i ou talaane i luga o lo'u moega ma aapa mai ma uu lo'u lima. Sa pei lava

na ou lagonaina ma iloa le mea o le a ia tau mai.

"Pele," sa ia fai mai ai, "o e iloaina le mea o loo e i ai?"

"O le falemai," sa ou tali atu ai.

"O e iloaina le mea na tupu?"

"Sa tatou lavevea i le taavale."

"Ua tau atu e se tasi ia te oe se tala e uiga i le isi vaega o lo tatou aiga?"

Sa ou nofo ona tali atu lea leai.

Sa ia fai mai o le a sologa lelei tagata uma—sei vagana ai lo'u tina. Sa lei sao mai o ia.

Sa ou faamoemoeina e lagona se faanoanoa lofituina i le taimi lava lea, ae leai. I le muai faateia ai o au, i se auala, mo se mafuaaga, sa ou lagonaina ai le filemu, o se lagona matagofie e mafai ona ou faalagolago i le Atua o le a lelei mea uma.

I le taoto ai iina i le falemai, sa ou manatuaina se tasi o nofoaga patino o talafaasolopito o le Ekalesia sa matou matamata ai i le lua aso a o lei tupu le faalavelave: Martins Cove, Wyoming. E toatele piaonia na maliliu iina mai le fiaaai ma le afaina i le kiona ma le tau malulu. Sa ou manatua le vaaia o ni faaputuga maa na tuu i luga o tuugamau ma mafaufau i le tele o le faatua-tua na faia e le isi vaega na totoe o le au paionia e pik i luga a latou taavale



Faatasi ai ma se vae
na gau ma se loto nutimo-
moia, sa ou manaomia ai
le faamalologa. Sa mafaia
ona o le faamoemoe.

tosolima ma faaaauau le malaga. O lena tala na faagaeetia ai au. A o ou mafaufau i lena aafiaga, sa ou iloa ai sa tutumau le au paionia ma e ao foi ia te au ona tumau, e aofia ai le faamalosi mo ou tei laiti.

O lo'u lagona muamua lava o le filemu sa tumau ia te au mo le isi vaiaso na sosoo ai ma le afa. Sa ou saofai i se nofoa faataavale ma matamata atu i mea faapapa mai le faamalama o le falemai i le Aso Fa o Iulai ina ua taia au—ua mou atu lo'u tina. O le a le i ai o ia i lo'u faauuga i le aoga maua-luga. O le a le i ai o ia iina pe a ou mauaina ou faaeega paia i le malumalu. O le a le i ai o ia i la'u faaipoipoga. Ua maliu o ia.

O iina sa amata ai ona matua faasolo faigata. Sa matautia le tiga o lo'u vae, ma sa le oso so'u fia ai. Sa ou matamata i le TV e aunoa ma le vaai i ai, ma sa tele lava ina ou moe. Sa popole lo'u aiga ia te au ona sa ou lei tagi tele.

Ae sa maligi tele loimata ina ua matou taunu mulimuli ane i le aiga i Oregon i se fale tuufua. Sa faafuasei ona ao ia te au ona faataunuu nisi o tiutetauave a lo'u tina, ma sa tele ina taulai mai ou tei ia te au mo se faamafanafanaga. Sa ou taumafai e faamalosi mo i latou. Ae sa lei faigofie.



O le toe foi atu i le aoga sa faigata. Sa faalogo uma tagata i le faalavelave, ma afai sa latou lei faalogo i ai, sa latou faatoa faalogo i ai ina ua faalauiloa atu au e ou faiaoga o le teineitiiti sa lavea i le faalavelave. Sa ou lagona le tuuatoatasi.

Sa faapitoa le faigata ina ua toe faaipoipo lo'u tama i le mavae ai o le iva masina talu ona maliu lo'u tina. Sa ou iloaina o le a lelei lo'u tinafai mo lo matou aiga ma sa matou manaomiaina o ia, ae sa faigata ona fetuunai.

E ui i lea sa lei faanoanoa mea uma i lea taimi. Sa ou lagonaina le tele o le alofa mai lo'u Tama i le Lagi, lo'u aiga, ma ou taitai o le Ekalesia. O mea sa fesoasoani ia te au e faamalolo ma agai ai i luma ina ua mavae le faalavelave o le faia lea o mea faigofie na faamalosia ai lo'u faatuatua. O aso uma sa ou faaaluina ai se itula a o lei moe e faitau ai tusitusiga paia, tatalo, ma tusitusi i la'u apitalaaga sa i totonus o la'u pusatu. I le faalilolilo ai i totonus o la'u pusatu, sa le moomia ai ona ou malosi mo ou tei. Sa mafai ona ou tagi i le tele ou te mafai ai ma sasaa atu lo'u loto i le Atua. Sa ou ta'u sa'o atu ia te Ia le mea sa ou lagonaina ma le tele o lo'u misia o lo'u tina. Ou te iloa sa Ia faafogofa mai ia te au ona o le tele o le alofa mutimutivale agamalu sa ou lagonaina. Sa oo ina paia le avanoa o le pusatu ia te au.

O le faia o na mea faigofie sa fesoasoani ia te au e tumau ai ona fesootai atu i le Atua nai lo le taumamao mai ia te Ia ma lagona le ita. Na ou lei vaai i le faalavelave o se faamanualiaina e le Atua o lo'u aiga. Sa ou lagonaina

se mana tele atu ina ia onosai ma gauai atu i Lona finagalo ma agai pe a i luma i ou aso faigata. Ma sa i ai ni aso *faigata* moni lava.

Ina ua uma ona toe faaipoipo lo'u tama, sa ou manao ia faia se faataitaiga lelei mo ou tei, ma sa ou le manao moni e i ai ni ou lagona leaga e faasaga i lo'u tinafai, o lea sa ou faaauau ai pe a ona tuu atu lo'u faalagolago i le Atua. O se tasi o gaoioiga i la'u tusi o le Alualu i Luma o le Tagata Lava Ia sa taulai atu i le faaleleia atili o lo'u olaga i le aiga e ala i le faamalosia o la'u sootaga ma se tagata o le aiga mo le lua vaiaso. O le mea taua o le sini sa taumafai ina ia avea e faapei o Keriso ma faaalia le alofa e ala i faatinoga. Sa ou filifili e taumafai i ai ma auauna atu i lo'u tinafai.

I lo matou aiga ua tuufatasia, sa matua tele le ipu. O iina la sa ou amata ai. A o ou auauna atu ia te ia i le isi lua vaiaso na sosoo ai, sa ou lagonaina le mafai ona alofa i lo'u tinafai ma le onosai e ui lava sa ou tau le fiafia i le tulaga ua i ai. O le taulai atu i le auauna atu ia te ia sa fesoasoani ia te au e taulimaina ia taimi faigata ona sa ou lagonaina le Agaga na faatasi ma au.

Ou te le o malamalama pea i mea uma e uiga i le mafuaaga o le faalavelave na tupu i lo'u aiga, ma o loo i ai pe a ni aso faigata. Ae e pei lava o paison, ua ou tuu atua lo'u faalagolago i le Atua ma ua ou maua ai le mana e tumau ai. ■

E alala le tusitala i Itua, ISA.

SII I LUGA LOU LOTO

"Atonu e te lagonaina ua faaleagaina lou olaga.... Atonu e te fefe, ita, faanoanoa, pe o faapologaina e masalosaloga. Ae e pei lava ona maua e le Leoleo Mamoe Lelei o Lana mamoe na leiloa, afai o le a e liliu atu lou loto i le Faaola o le lalolagi, o le a la maua foi oe.

"O le a la laveai ia te oe.

"O le a la sii oe i luga ma tuu oe i luga o Ona tauau.

"O le a la ave oe i le aiga."

Peresitene Dieter F. Uchtdorf, Fesoasoani Lua i le Au Peresitene Sili, "O Le A la Tuu Oe i Luga o Ona Tauau ma Ave Oe i le Aiga," *Liahona*, Me 2016, 104.





**Saunia e
Elder D. Todd
Christofferson**
O le Korama a Aposetol
o e Toasefululua

O LE AUALA E **FAIA AI KERISO MA TOTONUGALEMU O O TATOU OLAGA**

Na maua e Iesu le lotogatasi atoatoa ma le Tama, e ala i le gauai atu o Ia lava, i le tino ma le agaga, i le finagalo o le Tama. Na fetalai Iesu e faatatau i Lona Tama, e faapea, “Ou te faia pea lava o mea lelei ia te ia” (Ioane 8:29). Ona o le finagalo o le Tama, sa gauai atu ai Iesu e oo lava i le oti, “ua tofatumoanaina le loto o le Alo i le finagalo o le Tama” (Mosaea 15:7). O Lona taulai atu i le Tama o se tasi lea o mafuaaga autu na manino ma mamana ai le galuega a Iesu. Sa leai ma se faaluafesasi ma se femoumouai i Lona mafaufau.

I lea lava ala e tasi, e mafai ai foi e oe ma au ona **tuuina Keriso i le totonugalemu o o tatou olaga ma lotogatasi ai ma la** e pei ona tasi o Ia ma le Tama (tagai Ioane 17:20–23). Tatou te amata i le aveesea o mea uma mai i o tatou olaga ona toe tuu lea i ai ma faatulaga faatasi i le faasologa o mea e faamuamua faatasi ai ma le Faaola i le totonugalemu. E muamua lava ona tatou **faatulagaina mea e mafai ai ona manatua pea o la**—tatalo e le aunoa, suesueina ma le mafaufau loloto i tusitusiga paia,

suesue ma le mafaufau loloto i aoaoga faaapostolo, sauniuniga faalevaiaso e fetagofi atu ma le agavaa i le faamanatuga, tapuaiga i Aso Sa, tusitusia ma le manatuaina o mea e aoao mai e le Agaga ma aafiaga ia i tatou i le avea ai ma soo. O loo i ai ma isi mea o le a oo atu i lou mafaufau e faapi-toa lava ona fetaui ia oe i lenei taimi o lou olaga. **A lava loa le taimi ma auala mo nei mataupu, mo le faatotonugalemuina o o tatou olaga ia Keriso, ma ua faatulaga lelei, ona mafai loa lea ona tatou amata faaopoopo atu i ai isi tiutetauave** ma mea e i ai le taua pe a faatagaina ai e le taimi ma punaoa, e pei o tiutetauave faaleaoaoga ma faaleaiga, ma mea e fai e fiafia i ai le tagata lava ia. I lenei ala o le a le tuleia ai i fafo e mea lelei ia mea taua mai i o tatou olaga, ma o mea e itiiti le taua o le a tuualalo ifo le faamuamua pe aveesea atoa lava.

E ui atonu e le faigofie, ae mafai ona tumau pea lo tatou **fetaomi atu i luma ma le faatuatua** i le Alii. E mafai ona ou faamaonia i le aluga o taimi o le a tuputupu ae lo tatou manao ma le gafatia e manatua



NA FAAPEFEA ONA E **FAAAOGAINA LENEI MEA?**

Na matou oo ma lo'u aiga i nisi o tofotofoga tetele, ma o le taimi nei ua le o toe i ai se e umaina le perisitua i totonu o lo matou aiga. E fesoasoani tofotofoga e avatu i tatou i o tatou tulivae i le tatalo. Ou te faafetai lava i le i ai o tusitusiga paia ma le tomai e faiatua i aso uma. Ua latou aoaoina a'u e faapea, e ui lava ina aafia lo'u olaga i faaiuga a isi tagata, ae e tele pea lo'u taua. Ou te faafetai tele lava i le iloaina e mafai ona ou talanoa atu i lo'u Tama Faalelagi i soo se taimi o le aso po o le po. O se faamanuiga lava lenei!

Hailey D., 17 tausaga, Idaho, ISA

pea ma mulimuli i le Faaola. E tatau ona tatou **galalue** ma le onosai e tau i le faaiuga **ma tatalo e le aunoa** mo le iloatino ma le fesoasoaniga faalelagi tatou te manaomina (tagai 2 Nifae 32:9). ■

Mai se faigalotu a le Iunivesite o Polika Iaga-Idaho i le aso 27 o Januari, 2009.

Ao ou talavou, sa ou faaaluina le tele o itula e mata-mata ai i lo'u tina i le umukuka. Na te faia ni meaai sili ona manogi, falaoa, kuki, ma ni pai mo lo matou aiga. Ina ua mavae sina taimi, sa amata ona ou faitauina ni fua, ma mulimuli i faatonuga, ma faia ni meaai. Sa ou lei tau faalagolago i lo'u tina—sa mafai ona ou faia e au lava ia.

E pei foi o le aoaoina o le kuka, tatou te aoao foi le tala-lelei ma atiae a tatou molimau e ala i le faatino. Ina ua uma ona tau atu e Liae i lona aiga lana miti e uiga i le laau o le ola, sa fai atu Nifae sa ia manao foi ia "vaai, ma faalogo, ma iloa e uiga i ia mea" e ia lava (1 Nifae 10:17). I nisi upu, mo Nifae sa lei lava le faalogo atu i le molimau a lona tama. Sa ia manao ia aoao le mea ua uma ona iloa e lona tama.

O le fua mo le aoaoina o le talalelei ua i ai ni nai laasaga faigofie. E mafai ona e faaaogaina manatu nei e fa e fesoasoani ai i lou aoaoina o le talelelei faatasī ma lou aiga, i le lotu, po o taimi o au suesuega faaletagata lava ia.

1. Saunia e aoao.

Amata au suesuega faaletagata lava ia i se tatalo. Ole atu i le Tama Faalelagi e fesoasoani ia te oe ia malamalama i mea o loo e faitauina. Tusi i lalo se fesili se tasi pe lua ma saili mo ni tali. O le a tuu atu e le Agaga Paia se molimau e uiga i le upumoni a o e faitau, mafaufau loloto, ma tatalo (tagai Moronae 10:5).

Sauni mo le aoaoina o le talalelei i le lotu e ala i le fai-tauina o le lesona ae e te lei alu. O lesona o le *Sau, Muli-muli mai ia te Au* e mafai ona maua i luga o le LDS.org ma i le Gospel Library app.

2. Ia auai [punouai] i lou aoaoina.

- Faitau mo le malamalama O le aofai o itulau e te fai-tauina po o le saoasaoa foi o lau faitau e le taua lena e pei o lou malamalama i le mea o loo e faitauina. Atonu e ao ona e toe faitauina faatele nisi o fuaiupu. Faaaoga se lomifefilo i sue ai upu e te le iloaia. Mo se faataitaiga, o le a le uiga o le *tisipenisione*? E mafai ona e faaaogaina le Taiala i Tusitusiga Paia e sue i ai.
 - Fai ni fesili e uiga i mea o loo e faitauina. Atonu e te tuu fesili, "O le a se mea na tupu i Ierusalema i le taimi na o ese ai Liae ma lona aiga? Aisea na le faa-logo ai tagata ia Liae?"
 - Taumafai e tali fesili nei e tolu e uiga i soo se aoaoga o le talalelei: Aisea na taua ai lenei mea i tagata i lena taimi? E faapefea ona faatatau ia i *tatou* i le taimi nei? E faapefea ona faatatau ia te *au*?
 - Saili mo ni mamanu ma ni fesootaiga. Mo se faa-taitaiga, o a ni mamanu i le ala na tali atu ai Nifae i faigata? E faapefea ona pei le malaga a lona aiga i le vao ma le malaga a Isarelui i fafo o Aikupito?

O SE FUAMOLE AOAOINA

*Faataitai auala nei e fa e avea ai le afioga a le Atua
ma mea manogi i lou agaga.*



- Tusi ou lagona ma uunaiga i se apitalaaga. “A o e tusia i lalo ni uunaiga taua, e tele lava ina oo mai nisi uunaiga sili atu. Ma le isi foi, o le malamalama e te mauaina o le a maua i lou olaga atoa” (Richard G. Scott, “Ina Ia Maua le Malamalama ma le Malosi ia Faaaogaina Ai ma le Poto,” *Liahona*, Aok. 2002, 12, 14). Aemaise lava ia tusi i lalo le uiga o manatu i lou olaga.
- Tusi se ata. O le isi auala e faamaumau ai mea e te aoaoina o le tusi lea o se ata. I se tasi taimi sa ou asiiasi atu ai i se ue mo se afiafi faaleaiga, sa faasoa mai e lona tinamatua ni tala patino e uiga i le faatutua ma le tatalo. A o lei amataina le lesona, sa tufa atu e la’u ue i lana fanau laiti ni pepa ma ni vali ga’o ina ia mafai ai ona latou tuisaina ni ata o tala a o saunoa le tina o lo latou tina matua. O le tuisina o ni ata sa fesoasoani ia i latou ia gauai ma faalogo, ma sa latou faia foi ni fesili a o faagasolo ina ia faamanino ai ni vaega o le tala.

3. Suesue ma ola i le talalelei i aso uma.

O le aoaoina e moomia ai taumafaiga; e manaomia ona tatou faatatauina i tatou lava i le malamalama (tagai Mosaea 12:27). Sa fautuina i tatou e Elder M. Russell Ballard o le Korama a Apostolo e Toasefululua ina ia “faamautu se taimi ma se nofoaga e duesue ai tusitusiga paia i se tulaga faaleaso, e tusa lava pe na o ni nai minute” (“When Shall These Things Be?” *Ensign*, Dec. 1996, 60). A tatou duesue soo, e oo ina faigofie atu le aoaoina. Mo se faataitaiga, ua ou iloina a ou fatauina moni lava ia mataupu o le Isaia i le Tusi a Mamona (nai lo le faamisiina), e amata ona ou malamalama i ai.

A oo mai i le aoaoina o le talalelei, e le lava le na o le iloa o se mea i le atamai. E manaomia foi ona tatou faatinoina se mea ua tatou aoaoina. A tatou faatinoina pea le upumoni, e faamautu mai e le Agaga Paia ia i tatou, ma tuputupu ae ai la tatou molimau. A tatou ola pea i lena upumoni, e amata ona tatou sui, ma oo ina liua ia Iesu Keriso.

4. Faasoa atu le mea ua e aoaoina.

O le faamatalaina atu i isi o se mataupu faavae o le talalelei i au oe lava upu e fesoasoani ia i tatou ia manatua lena mataupu faavae ma lagona le Agaga, lea e faamlosia ai a tatou molimau. E masani lava o le taimi lelei e faasoa atu ai o le taimi o le afiafi faaleaiga. E mafai foi ona e faasoa atu pe a outou talanoa ma ni ue i le aoga po o ni tagata o le aiga i le taimi o le taumafataga o le afiafi.

A tatou mulimuli i nei laasaga faigofie e fa ma saili atu ma le filiga ia iloa le Faaola, ua folafola mai ia i tatou e faapea “o le a faaali ia te i latou mealilo a le Atua, e ala i le mana o le Agaga Paia” (1 Nifae 10:19). ■

E alala le tusitala i Iuta, ISA.



O MEA E FA TATOU TE MANAOPIA

“Tatou te le manaomiaina ni fesoasoaniga felanulanuai o duesuega ma e le tatau ona tatou faalagolago atoa i le malamalama faaleagaga o isi. Pau lava le mea tatou te manaomia o le i ai lea o se manao faamaoni e aoao, le mafutaga a le Agaga Paia, o tusitusiga paia, ma se mafaufau ola ma fesilisili.”

Elder David A. Bednar o le Korama a Apostolo e Toasefululua, “O Se Faatanoa o le Vai Ola” (Faeasaite a le Ofisa o Aoga a le Ekalesia mo talavou matutua, Fep. 4, 2007), 3, si.lds.org.



“Ua tau mai e nisi tagata ia te au ou te manaomia ni uo e le tutusa o matou tulaga faatonuina ina ia mafai ona faamalosia ai ou tulaga faatonuina. E moni ea lenei mea?”

Ole mea laualuga lava, o le faamalosia o ou tulaga faatonuina e sau mai le aoaoina ma le ola ai i le talalelei a Iesu Keriso, ma e mafai e uo ona fesoasoani pe faalavelave foi ia te oe i le faia o lena mea. E i ai se faatosinaga tele lava a uo ia te oe—mai le auala e te mafaufau ai, tautala ai, ma amio ai e oo lava i le tagata e avea ai oe. Ua fautua mai le *Mo le Malosi o le Autalavou*, “Filifili ni uo e tutusa a outou tulaga faatauaina ina ia mafai ona outou fefaamalosiauai ma uunaia e le tasi le isi i le ola ai i tulaga faatonuina maualuluga” ([2011], 16). O nei ituaiga o uo e fesoasoani ia te oe ia ola i le talalelei a Iesu Keriso, tausisia ou tulaga faatonuina, ma avea ai oe ma tagata e lelei atu.

Peitai, e le o tagata uma tou te fegalegaleai faatasi o le a tutusa o latou tulaga faatonuina ma oe po o ni tagata foi o le Ekalesia. E taua le faauo i tagata uma ma ia taulimaina i latou i le ala e taulimaina ai e le Faaola i latou—i le alofa ma le agalelei. A o e faaauau pea ona ola i ou tulaga faatonuina, e mafai ona avea oe ma se “faaaao i e ua faatuatua, i le upu, ma le amio, ma le alofa, ma le loto, ma le faatuatua ma le le gaoia. (1 Timoteo 4:12). E ala atu i lau faataitaiga, o le a latou vaaia ai le auala ua faamanuiaina ai oe e ala i le ola ai i tulaga faatonuina maualuluga, ma e mafai ona e faamalosia i latou ia faia foi lea mea e tasi.

Saili atu i le taitaiga a le Agaga Paia—ma maua le lototele e faatino ai Ana uunaiga—a o e filifilia ni uo ma taumafai e faamalosia ou tulaga faatonuina.



Uo Moni

O lou tausaga muamua lava i le aoga tulaglua sa ou popole ai ina nei le mafai ona maua ni au uo o e e faaaloalogiaina ou tulaga faatonuina. I le mavae ai o sina taimi puupuu sa oo ina ou faauo atu i se tamaitiiti o le vasega, ma sa ou tau atu i ai o au o se Mamona. Sa ia fesili mai ia te au e uiga i lena mea, o lea sa ou tuu atu ai ia te ia se tamaitusi o le *Mo le Malosi o le Autalavou*. Sa amata i lena aso ona ia le toe palauvale i ou luma. Afai o au uo o ni uo moni lava, o le a latou faaaloalogia au faaiuga ma fesoasoani ia te oe ia tausisia ou tulaga faatonuina.

Candela M., 13 tausaga, Buenos Aires, Atenitina



Mulimuli i Fautuaga a Perofeta

O nisi taimi e faigata ai ona tetee atu i faaososoaga pe afai tatou te mio faatasi pea ma ni uo e faia ni filifiliga leaga pe taumafai foi e tulei i tatou ia faia ni filifiliga leaga. Ua tau mai e perofeta ia i tatou i le tamaitusi o le *Mo le Malosi o le Autalavou* e faapea o uo “o le a fatozinaina le auala e te mafaufau ai ma amio ai, ma e oo lava foi ina fesoasoani e fuafua le tagata o le a avea ai oe” ([2011], 16). Ou te manatu e tatau ona i ai ni a tatou uo e naunau e faaaloalogia o tatou tulaga faatonuina ma faaali mai le naunau ia i tatou i le tausiga o o tatou tulaga faatonuina.

Calvin W., 16 tausaga, Arisona, ISA

Manatua Ou Tulaga Faatonuina

O uo e le tutusa o outou tulaga faatonuina e mafai ona faavaivaiina

O tali ua faamoemoe e mo se fesoasoani ma ni manatu, ae e le o ni faalauiloaga aloaia o aoaoga faavae o le Ekalesia.



moni ma olopaina ai i lalo ou tulaga faatonuina. Ina ua ou faatoa auai atu i lau aoga fou, sa ou taumafai lava ia taugamalie ma isi e ala i le fai atu o nisi o tala e ono tautatala ai tagata na siomiaina au. Sa toeitiit lava a galo ia te au nisi o ou tulaga faatonuina a o taumafai ai ia faapei o tagata uma. Ua ou iloaina nei ina ia fausia ou tulaga faatonuina, e te manaomaina ni uo e lagolagoina ma tutusa o outou tulaga faatonuina. Ou te faafetai na iu lava ina ou mauaina ni uo faapena ona na latou faamanatu mai ia te au ou tulaga faatonuina.

Logan J., 15 tausaga, Iuta, ISA



Faatumau le Maualuga o Ou Tulaga Faatonuina

O uo e eseese tulaga faatonuina e le mafai ona faamalosia ai ou tulaga faatonuina, ae e ala i le avea ma au uo, e mafai ona e avatu ia i latou se faataitaiga lelei e mulimuli ai. A i ai ni au uo e tutusa o outou talitonuga, e mafai ona uunaia oe e faatumauina le maualuga o ou tulaga faatonuina ma fesoasoani ia te oe e tu atu mo le mea sao.

Warren S., 14 tausaga, Oregon, ISA



O Uo Lelei o Se Faamanuiaga

Afai e le tutusa ou tulaga faatonuina ma au uo, e mafai ona atili faigata ai ona faamalosia ou lava tulaga faatonuina. O le faitauina o le *Mo le Malosi o le Autalavou* na fesoasoani ia te au i taimi uma e filifili ni uo lelei e faaaloalo ia te au. O le taimi nei o loo ou saunia e auauna atu i se misiona, ma ou te iloa o le i ai faatasi ma tagata e tutusa

ou tulaga faatonuina e fesoasoani ia te au ia faatumauina le faamaoni i le talalelei.

Nair M., 19 tausaga, Buenos Aires, Atenitina



Pipiimau i le Ai Uamea

O le i ai o ni uo e i ai ni tulaga faatonuina lelei o le mea tonu lava lena e te manao i ai. E te manao ina ia siomia oe lava i uo o le a fesoasoani ia te oe e tau i poloaiga ma faaosofia oe ia ola amiontonu. Ia faatumauina se uu malosi i le ai uamea, lea e tau atu i le laau o le ola, ae le o le pale tele ma le ateatea. O le siomiaina o oe i le amioletonu o le a taitai atu i faaosoosoga. Ia fai ni uo lelei o e o le a faatosinaina oe e ola i le talalelei.

Annie P., 13 tausaga, Iuta, ISA



Tatalo ia Maua ni Uo

Ina ua matou masii atu ma lo matou aiga i se setete fou, sa ou tatalo pea ina ia maua ni uo o e e mafai ona matou talanoa e uiga i le talalelei. A o ou tatalo, sa ou lagona le faamafanafanaina, ma i ni nai masina mulimuli ane sa ou maua ni uo maoae. Na mafai



O LE FAATOSINAGA A UO LELEI

"E manaomia e tagata uma ni uo lelei. O lau li'o o uo o le a matua faatosinaina ou mafauauga ma amioga, e pei foi lava ona e faia faapena ia i latou. A tutusa a outou tulaga faatauina ma au uo, e mafai ona outou faamalosia ma uunaia e le tasi le isi. Ia taulimaina tagata uma i le agalelei ma le faaaloalo. E toatele tagata le lolotu e o mai i le Ekalesia e ala mai i uo o e sa auai ma i latou i gaoioiga a le Ekalesia."

*Peresitene Thomas S. Monson, "Ina ia Tatou Pa'i i le Lagi," *Liahona*, Ian. 1991, 50.*

ona ou faatuatuaina la latou lagolago, ma na latou fesoasoani ia te au ia atiae se alofa sili atu mo le talalelei. Ou te iloa e taua ia uo ma e mafai ona latou faafraigofieina mo i tatou le ola ai i le talalelei.

Sarah P., 16 tausaga, Rio de Janeiro, Pasila

FESILI O LE A SOSOO MAI

**"E ese mai le tatalo
ma le suesueina
o tusitusiga paia,
o le a le auala sili
e faamalosia ai
la'u molimau?"**

Auina mai lau tali ma, afai e manaomia, o se ata manino lelei ae lei oo i le aso 1 o Novemba, 2016, i le liahona.lds.org po o le i-meli i liahona@ldschurch.org.

Famolemole ia aofia ai faamatatalaga nei: (1)igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e i lalo ifo o le 18 ou tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou atu.

E ono faapupuuina tali mo le uumi po o le manino.

Saunia e Julia Ventura

E faavae i se tala moni

"E i ai so'u aiga i lalo nei. Alolofa ia te a'u." (Tusipese a Tamaiti, 188).

U Mai meafagota. O le taimi o le fagota!" Fai mai ai tama.

Sa ataata Hayden a o ia fetilofai solo. Sa malama ma ūū mea uma. Sa na o i laua i le vaitoa atoa!

I le mulimuli atu ai ia tama, sa savali atu ai Hayden i tua o le taavale ma sii ese le pusa o meafagota mai le pusa o le taavale. Sa mamafa, ae sa le afaina lea ia te ia. O le a ia siiina se isi pusa e faaluaina le mamafa e pei o lea pe afai o le fagotaga ma Tama.

Sa milo faatasi ofe fagota a o tosina mai i fafo e Tama. "E foliga mai ua moe ia Dan," sa ia fai mai ai. "E mafai ona e fafaguina o ia i luga?"

Sa tau mapuea ia Hayden.
"Ia, lelei."

Sa toeitiiti lava a galo ia te ia

sa sau foi lona uso laitiiti ia Dan. O taimi uma lava e tamoe solo ai Dan ma pisapisao. Na te faasesegia ese uma nei ia i'a!

Sa ia tilotilo atu i le faamalama sa matala. "Dan, nofo loa i luga."

Ae sa moe gapepe pea Dan.

Sa tu Hayden. Faatasi ma se laki, e ono moe ai Dan i le taimi atoa o le malaga.


Sa toso lemu atu e Hayden le pusa o meafagota i le nofoaga fagota a Tama i luga o le auvai.

"Le maunu lea, anufe ma isi mea uma!"

Sa avatu e Tama le pusa o meafagota mai ia te ia. "Faafetai lava." Ona tepa ae lea o Tama i luga. "O fea lou uso?"

Sa tepa atu Hayden i le taavale. Sa faafuasei ona ia tomanatu pe o le a *sona* lagona pe afai e ala ae ua

Ua O



na o ia i se nofoaga fou. E le lelei, sa tonu ai ia Hayden. O le mea moni, e masalo lava e matua lagona lava lona fefe. Ae sa na o le lima tausaga o Dan.

“Faatali la, Tama. Ou te toe vave mai lava.” Ae ina ua ia tilotilo atu i totonu o le taavale, ua leai se Dan!

Sa le toe mafai ona lagonaina e Hayden le ūū o iniseti. Sa foliga mai ua filemu mea uma.

“E le o iinei Dan!” Sa alaga atu ai Hayden.

Sa faataalise atu Tama ma vave ona siaki le taavale.

“Masalo lava o loo ia sue ia i ta’ua,” sa fai atu ai Tama. “O lea faatoa minute. E le o mamao ese atu o ia.”

Sa taumafai Hayden ina ia toamalie, ae sa matua atuatuvala lava o ia. “E mafai ona ou faia se tatalo?”

“Ou te iloa o se manatu lelei tele lena.”

Sa faafetai atu Hayden i le Tama Faalelagi mo lona uso laitiiti ma ole atu ina ia la mauaina loa ia Dan ina ia ona le lagonaina le fefe.

Ina ua uma le tatalo a Hayden, sa uma foi ma le tatavale o lona fatu.

Sa tuu atu e Tama lona lima i luga o le tauau o Hayden. “Ae faapefea pe ana faapea o oe o Dan? O fea e te ono alu i ai?”

Sa matauina e Hayden le faitotoa i le isi itu o le taavale sa matala. Masalo sa lei iloa atu e Dan i laua i luga o le auvai. Sa faasino atu Hayden i se alasavali lata ane. “Masalo o le a ou amata savali atu i le auala le la,” sa ia fai atu ai.

Sa la faanatinati atu i lea auala.

O sekone uma sa lagonaina le telegese ma le mamafatu. A o savali,

sa faaaauua pea ona faia ia tatalo a Hayden i lona loto. I le mavae ai o ni nai laa, sa la tau atu ai i se pioga i le auala ma iloa atu ai Dan i luma atu.

“Dan!” Sa alaga atu ai Hayden.

Sa faliu mai Dana ma ata. “Sole, o fea sa oulua o i ai?”

Sa toe saoasaoa le taimi. Sa tamoe atu Hayden ia Dan ma fusi mau mai o ia.

“Ua ou fiafia lava ua ma maua oe,” sa fai atu ai Hayden. Sa ia faia se tatalo puupuu o le faafetai i lona loto.

Sa ataata Dan. “O fea la ni i’ā?”

“Sau, o le a ou faaali atua ia te oe,” sa fai atu ai Hayden. Sa le mataofiofia lona momo’ē atu i le vaituloto. “Sei vaai la po o ai e mauaina le i’ā muamua. O le a ou fesoasoani ia te oe e fai le maunu o lau matau.” ■

E alala le tusitala i Georgia, ISA.

e Fagogota

*Sa le manofonofo Hayden i le fia
alu e fagota! Pe ana faapea la sa
lei sau foi ia Dan. . . .*





Saunia e Elder
Gary E. Stevenson

O Le Korama
a Aposetolo e
Toasefululua

E mafai faapefea ona ou fesoasoani e faia lo'u fale o se nofoaga filemu?




E mafai ona tatou faia o tatou
fale o se nofoaga filemu ma paia
e pei o le malumalu.



Fesoasoani ia tausia le
mama ma le faatulaga
lelei o lou fale.



Tautau se ata o lesu po o se ata
o le malumalu i lou fale.



Tuu tusitusiga paia i totonu o
potu i mea e mafai ai e lou aiga
ona suesue ma aoao faatasi ai.

O LA TATOU ITULAU



Sa matagofie le o atu i le malumalu ma lo'u aiga. O se malaga umi mai le matou aai i le malumalu—toeitiiti lava 14 itula. Sa matou faaaluina se vaiaso e latalata i le malumalu. Ua ou pulunaunau lava ia atoa lo'u 12 e fai papatisoga mo ou tuaa. O se tasi o pese ou te fiafia lava i ai o le "Ou te Fia Vaai i se Malumalu." Ou te fia faaipoipo i le malumalu ma maua se aiga e faavavau. Ou te iloa o le malumalu o le maota o le Alii.

Júlia Q., 11 tausaga (i le taimi na pue ai le ata), Goiás, Pasila




Saunia e Allen E., 10 tausaga (i le taimi na tusia ai le ata), San Salvador, El Salvador



Ma te fiafia lava ma lo'u uso laitiiti e o i le malumalu i Merida, Yucatan, Mekisiko, i taimi uma e tofia ai le matou uarota e malaga. Ma te faaaluina le taimi i togalaau, ma e matou te tatalo ai faatasi ma isi tamaiti e o mai i le malumalu. O loo ou sauniuni e ulufale atu i le malumalu i se aso.

Martha S., 6 tausaga (i le taimi na tusi ai le ata), Yucatán, Mekisiko



MATOU TE FIAFIA E VAAI I LE MALUMALU

A o ou tusiaina lenei ata, sa ou mafaufau afai ou te mulimuli i poloaiga, o le a mafai ona ou ulu atu i le malumalu i se aso, e pei lava o ou matua, ma faamauina ma faia so'u lava ia aiga e faavavau. Ou te alofa i lo'u aiga ma lo'u Tama Faalelagi.

Manolita G., 8 tausaga (i le taimi na tusia ai le ata), Chimaltenango, Kuatemala



Talofa, uo!

O lo'u igoa o Tala. Sa ou ola i Turkmenistan.
O se atunuu i Asia Tutotonu. Ou te fiafia e
faitautusi, tusiata, ma su'isu'i. Ou te
fiafia e matamata i fetu ma lo'u tama.
Sa na o a'u ma lo'u aiga ia tagata
o le Ekalesia i le atunuu atoa!

O Se Tala e uiga ia Tala

Saunia e Jill Hacking
Mekasini a le Ekalesia

TATALO MO MISI

I se tasi aso ina ua mavae se afa tele lava, sa leiloa ai le pusi, o Misi, a la'u uo. Sa matou sueina i le nofoaga atoa, ae sa le mafai ona matou mauaina o ia. Ona ou fai lea i ai e mafai ona matou tatalo. Sa lei mautinoa e a'u uo pe faapefea ona fai, o lea sa ou faaali atu ai ia i latou. Sa matou tootutuli uma i lalo ma fai le tatalo a le tagata lava ia. Ona matou tutu lea i lugia ma amata ona toe sue. Sa tamoe mai se teineitiiti ia i matou ma faapea mai ua ia mauaina Misi! Sa ou fiafia ona na ou faasoa atua se vaega o le talalelei i a'u uo.



AOAO MAI LE TASI MA LE ISI

*Sa ma o ma lo'u uso
o Sarai i se a'oga e i
ai tamaiti mai le tele
o atunu. Sa ma fia-
fia e aoao mai le tasi
ma le isi ma maua
le fiafia.*



MEATAULIMA MA LE FIAFIA

*Sa ma valaauliaina ma Sarai
a ma uo e o mai matou te
taaalo. Sa matou valivali,
faia ni meataulima, ma fai ni
tafaoga. I le taimi o le Keri-
simasi matou te faatino ai le
tala i le fanau mai o lesu ma
a matou uo i le pitonuu.*



AUINA MAI IA I MATOU LOU TULAGAVAE!


E faapefea ona e mulimuli ia lesu
e ala i lou tu maualuga? Tusi lolomi
le ata o lou tulagavae ma
auina mai ia i matou lau tala
ma le ata, faatasi ai ma le
faatagaga a ou matua. Auina
mai i le initoneti i le liahona.
lds.org (kiliki le "Submit an
Article") pe imeli mai i le
liahona@ldschurch.org.



LOTU I LE FALE

*Ona na o i matou tagata o le Eka-
lesia, o lea sa faia ai a matou lotu
i le matou fale. Sa faia a matou
sauniga faamanatuga, taimi o
pesepesega, taimi o fetufaaiga, ma
lesona a le Peraimeri. Sa ou taina
le piano mo taimi o pesepesega.*





Saunia e Elder
Jairo Mazzagatti
O Le Fitugafulu

O Lesona mai ia Tina



FESILI I SE MATUA!

O le a se mea e sili ona e fiafia i ai i le avea ai ma se matua?

O le a le vaega e sili ona faigata?

O le a se mea na te faafafiaina oe?

O le a se mea e sili ona taua e te faia i aso uma?

O faapefea ona fesoasoani le talalelei ia te oe ia avea ai ma se matua e lelei atu?


O le a le mea mulimuli lava e te faia i aso uma?

O a nisi fesili e mafai ona e fesili ai?

Avea ma se fesoasoani mo lou tina po o lou tama mo se aso! Tusi pe tusi se ata i totonu o lau apitalaaga e uiga i se mea ua e aoaoina. Faafetai i ou matua mo mea uma o la faia.

Ao ou tuputupu ae, soo se taimi lava matou te mauaina ai se tupe, e ave ai lava e lo'u tina tupe pepa sili ona lelei—tupe pepa ia e le maanuminumi tele pe palapala—ma avatu i le faifeau o le lotu matou te o i ai. Sa ia faia lenei mea i lona olaga atoa. Sa ia fai mai, “O le mea lenei e a le Atua.” O na upu ua tumau pea ia te au talu mai lena taimi. Ina ua papatisoina au i Le Ekalesia a Iesu Keriso o le Au Paia o Aso e Gata Ai o se tagata matua, sa lei faigata mo au ona totogi le sefuluai ona sa aoao a'u e lo'u tina ia usiusitai i lena tulafono.

Sa aoao foi a'u e lo'u tina ia faamaoni, e tusa lava pe oo ina faia ai ni mea faigata. Sa toto e lo matou tuaoi ituiga eseese uma o laau aina suamalie ma fualau aina fai sua. O nisi taimi e falala mai ai ana laau aina suamalie i le pito o le matou pa. Sa i ai se taimi na ou tauina ai nisi o ia fua ma avatu i lo'u tina. Sa ia tepa mai ia te au ma faapea mai, “E le o ni a tatou mea na.” Sa ou le mafai ona talitonuina. Sa ou fai atu,




“O le a le uiga o lau tala? O loo i le tatou pito o le tatou pa!” Ae sa ia toe fai mai, “E le o ni a tatou mea na.” Ona ia uu lea o lo'u lima ma ma savavali atu i le fale o le matou tuaoi. Sa ma talosaga atu mo se faamagalogia mo le tauina o fua o ana laau. Sa fai mai lo'u tina a matou mananao i se mea, e manaomia ona matou mauaina ma le faamaoni.

Atonu o ou matua e le o ni tagata o le Ekalesia, pe e te le ioeina foi i

taimi uma a la filifiliga. Ae e mafai lava ona e aoaoina ni mataupu faavae moni mai ia i laua, e pei o le faamaoni, tiutetauave, ola-tutoatasi, ma le galue malosi. O na mataupu faavae o le a avea ma ni faamanu-iaga silisili i lou olaga. ■

O Toa Tamaitai i totonu o le Tusi a Mamona

Eanoanoai tamaitai i le Tusi a Mamona o e o ni faataitaiga lelei mo i tatou. O kata nei o toa e toatolu e faa-
opoopo atu i lau faaputuga! Tatou te le iloaina uma o latou igoa, ae e mafai pea ona tatou aoao mai
i a latou faataitaiga. E mafai faapefea ona pei oe o nei tamaitai o le Tusi a Mamona?



Mata e mafai ona e mauaina isi tamaitai nei i totonu o tusitusiga
paia? Fai ni au oe lava ia kata o toa mo i latou ma auina mai ia
i matou se ata!

- 1 Nifae 7:19. Na faaalia e nei tamaitai le lototele e ala
i le tutu atu mo Nifae. O ai i latou?
- 2 Nifae 5:6. O nei tamaitai na talitonu i le Atua ma na
mulimuli atu ia Nifae i le vao. O ai i latou?
- Alema 56:47–48. Sa aoao atu e nei tamaitai a latou fanau
e uiga i le Atua. O ai i latou?

[Tali: o le afafine ma le ava a Isameeli, o tufafine o Nifae, o tina o le autau talavou]



Oti, gagau, ma teu nei kata o lui!



E Mafai Ona Maua Sa'u Molimau!

Sa maua e Sarai se molimau e faapea o lana
tane, o Liae, o se perofeta a le Atua. E mafai
foi ona pei oe o Sarai e ala i le mauaina o sau
oe lava molimau ma faasoa atu i isi!

- Faitau le 1 Nifae 5:7–8.
- Tusi i lalo lau molimau pe faasoa atu
foi i se uo po o se tagata o le aiga.
- Ou te luiina au lava ina ia . . .



E Mafai Ona Ou Talitonu!

Sa i ai i le ava a Lamonae le faatuatua ia Amona o se perofeta a le Atua. E mafai ona pei oe o le ava a Lamonae e ala i le mauaina o le faatuatua i lo tatou perofeta ma aposetolo i aso nei!

- Faitau le Alema 19:2–5, 8–10.
- Maimoa i se lauga a Peresitene Monson mai se konafesi. Pe e te talitonu ea o ia o se perofeta a le Atua?
- Ou te luiina au lava ina ia . . .

O LE MASIOFO



E Mafai Ona Ou Tautala Atu!

O Morianetona o se tagata amioleaga. Sa ia fasia se tasi o ana auauna, ma sa tonu ai [i le auauna fafine] e ta'u atu ia Kapeteni Moronae mea sa faia e Morianetona. E mafai foi ona pei oe o le auauna fafine e ala i le tautala atu pe a i ai ni mea e le sa'o!

- Faitau le Alema 50:30–31.
- Afai e sauia se tasi ia te oe, pe e te vaiai foi se tasi o soona fai e nisi, ia tau atu i se tagata matua e te faatuatuaina.
- Ou te luiina au lava ina ia . . .

O LE AUAUNA FAFINE

Faimalaga atu i le Nuu Folafolaina



Sa nonofo Iareto ma lona uso i se vanu faatasi ma o la aiga ma uo. Sa asiasi atu Iesu Keriso i le uso o Iareto. Sa Ia faatonuina o ia e fau ni vaa e ave ai lona nuu ma asaina atuvasa e agai atu ai i le nuu folafolaina.



Sa fauina e le nuu ia vaa e aunoa ma ni faamalama. Sa popole le uso o Iareto pe o le a faapefea nei ona latou manava ma vaai. Sa fetalai atu i ai Iesu e tatau ona latou faia ni pu i vaa mo le ea.

Ae faapefea le malamalama?
Sa faia e le uso o Iareto ni
maa manino se 16. Sa ia
ole atu ia Iesu ina ia pa'i i
ai Ona tamatama'i a'ao ina
ia susulu ai.



Sa vaia e le uso o Iareto ia
Iesu o pa'i Lona tamatama'i
a'ao i maa taitasi. Sa matua
susulu mai maa. Ona sa
matua tele lona faatuatua,
sa vaai ai le uso o Iareto
ia Iesu Keriso!



Sa auina mai e le Atua ni matagi malolosi e feula atua vaa i luga o le vasa. Ina ua latou taunu i le nuu folafolaina, sa tatalo le au sa Iareto e faafetai atu i le Atua mo le puipuiina o i latou.

E mafai foi ona pei i tatou o le uso o Iareto pe a tatou faalagolago i le Atua ma faatuatua ia Iesu Keriso. ■

Mai le Eteru 2-3; 6

E Faafiafiaina A'u e Musika





Saunia e Peresitene
Gordon B. Hinckley
(1910–2008)

O LE ATAMAI FAALELAGI O LE EKALESIA A LE ALII

*Ua faataunuina e le Atua Lana galuega
e tusa ma Lana lava fuafuaga sili.*

O le atamai faalelagi o le faatulagaga o lenei galuega ma valaauga e avea ma taitai ua manino lava. O le Au Pulega Aoao o ni tagata taitoatasi uma, e tofu lava le tagata ma ona lava uiga faalia. E aumai e i latou taitoatasi i o latou tiutetauave se eseesega lautele o poto masani ma talaaga. A tulai mai ni mataupu e talanoaina i aufono faaleautaitai o le Ekalesia, e saoloto uma i latou e faaali o latou manatu. A matauina e se tasi lena faagasologa mataina o faagaoioi, e mataina tele le molimauina o le mana o le Agaga Paia o uunaiaina nei tamalii. E eseese lava o latou manatu ae e le faaalia ma le mateletele, ma e faamaluina lava manatu i le gasologa ma oo ai ina autasi i le lotogatasi. “O lo’u fale o se fale o le maopoopo,” ua fetalai mai ai le Alii (tagai MF&F 132:8). I le molimauina ai o lenei faagasologa i le galuega, ua ou lagonaina ai se faafouga faifai pea o le faatuatua. . . .

Ua faaalia e nisi le popolega e faapea e foliga mai o le Peresitene o le Ekalesia e ao lava ona avea ma se toeaina matua, lea ou te tali atu ai, “O se



faamanuiaga!” O le galuega o lenei tisipenisione sa muai faatulagaina e ala mai i le tufugaaao [o le Atua] le Perofeta o Iosefa Samita. Sa talavou ma malosi o ia i lena taimi, o se tasi sa lei mafaufau o ia pe fua ana faiiuga i uputuu o ona aso. O lona mafaufau sa talavou lea sa mafai e le Alii ona mamanuina e pei o le mamanuina o se omea fou ma iila a o Ia amataliaina Lana galuega.

O le taitai na sosoo ia Iosefa sa talavou foi i le taimi na fetaiai ai ma tiutetauave ogaoga o le taitaiina o se nuu atoa sa asaina le vao e faatoa se nuu fou.

Ae o mea faavae o la tatou aoaoga faavae ua faatulagaina lelei, ma ua tatou mautu ma le mausali o se nuu, seiā oo ina toe poloaiina e le Alii se isi gaoioga. Tatou te le manaomiaina nisi auala fou e fai ai ni mea. Tatou

te manaomiaina le tuuto atu ma le usiusitai i mataupu faavae paia ua fetalaia. Tatou te manaomiaina le faamaoni i lo tatou taitai, o le ua tofiaina e le Atua. O ia o lo tatou perofeta, lo tatou tagatavaai ma le talifaaaliga. E le mafai lava ona tuua i tatou e aunoa ma se perofeta pe afai o le a tatou ola agavaa mo se perofeta. E le manaomia ona talavou o ia. Ua ia te ia ma o le a faaauau pea ona ia maua ni alii talavou ifo [ia te ia] e faimalaga i le lalolagi atoa i le galuega o le auaua atu. O ia o le faitaulaga sili pulefaamalu-malu, o le e umiaina ki uma o le peri-situa paia, ma o le siufogfa o faaaliga mai le Atua i Lona nuu.

E i ai se muagagana anamua e faapea, “Autalavou mo le faatinoga. Aumatutua mo le atamai.”

I lo’u manatu o loo i ai se mea e matua faamautinoa mai lava i le iloaina e faapea mo le lumanai ua muai vaaia e ao ona i ai se tatou Peresitene o le ua faautauta ma aoaoina, tofotofina ma faaosoosoina, o lona faamaoni aiai i le galuega ma lona amiosao i le faataunuina o le galuega ua mamanuina i le tele o faigata o le galuega, ua lava lona faatuatua, ma lona latalata i le Atua ua faafaileina i le tele o tausaga. . . .

E le manaomia ona tatou fefefe i le lumanai pe afai tatou te taofimau i mataupu faavae ua faaalia. ■

“E Le Tulemoe o Ia, e le Moe Lava,” Liahona, Jul. 1983, 5–8. Ua faalaugatasia faailoga ma mataitusi tetele.

MALAMALAMAAGA



O fea e mafai ona ou maua ai le lototele e faaauau ai pea?

"Atonu e te lagonaina ua faaleagaina lou olaga. Atonu ua e agasala. Atonu e te fefe, ita, faanoanoa, pe o faapologaina e masalosaloga. Ae e pei lava ona maua e le Leoleo Mamoe Lelei o Lana mamoe na leiloa, afai o le a e liliu atu lou loto i le Faaola o le lalolagi, o le a la maua oe. O le a la laveai ia te oe. O le a la sii oe i luga ma tuu oe i luga o Ona tauau. O le a la ave oe i le aiga."

Presitene Dieter F. Uchtdorf, Fesoasoani Lua i le Au Peresitene Sili, "O Le A la Tuu Oe i Luga o Ona Tauau ma Ave Oe i le Aiga," *Liahona*, Me 2016, 104.

E I AI Foi i le Lomiga Lenei

MO TALAVOU MATUTUA

Tutu Atu o ni
Tagata Moni
ole Meleniuma

i.46 O le avea ma se tagata moni o le meleniuma e sili atu i lo lou matua—e faatatau i le fesoasoani e saunia le lalolagi mo le Afio Mai Faalua o lesu Keriso.



MO LE AUTALAVOU



MANA
ETUMAU AI

i.58

I le lotolotoi ai o tofotofoga aupito sili ona faigata o lo'u olaga, sa fesoasoani nai mea iti faigofie ia te au e fesootai ai pea ma le Atua nai lo le tuleiina ese o la ma oo ai ina oona.

MO TAMAITI

i.72 **O Lesona**
mai ia Tina

Fesili atu i lou tina ma lou tama i fesili nei ia iloa ai mea la te fiafia i ai e uiga i le avea ai ma ni matua!

